

宋

會

要

全唐文

提點司
宋會要

兩朝國史志提點司有提點同提點提點並以朝官以
上充掌提轄諸縣刑獄兵民賊盜倉場庫務兼管勾溝
洫河道之事勾押官一人典七人元豐改制因之

十一
字另
低二板

全唐文

宋會要

提舉常平倉農田水利差役

神宗熙寧二年九月九

日制置三司條例司言近詔置京東等路常平廣惠倉
欲量逐路錢物多少選官分詣提舉詔差官充逐路提
舉常平廣惠倉兼管勾農田水利差役事於是屯田郎
中支公弼太常博士王廣廉河北路駕部員外郎蘇洵
太子中書劉瑄陝西路太常博士胡朝宗殿中丞張復
禮京東路太常博士李南公殿中丞陳知儉京西路都
官員外郎熊本殿中丞徐倣淮南路太常博士張洵秘
書丞侯叔獻兩浙路都官員外郎林英開封府界都官

員外郎許懋太常博士曾誼江南東路太子中舍張次
山江南西路職方員外郎梁端比部員外郎謝卿材河
東路太常博士吳審禮喬敘荆湖南路都官員外郎田
君平荆湖北路太常博士李元瑜成都府路都官員外
郎姜師孟秘書丞田祐梓州路虞部郎中王直溫都官
員外郎張吉甫利州路虞部員外郎韓彥殿中丞張授
夔州路屯田員外郎游烈廣南東路太子中允闕杞廣
南西路太常博士嚴君貺福建路又差同管勾大理寺
丞朱紱京西路著作佐郎曾亢淮南路前益州司理叅
軍王醇兩浙路大理寺丞王子淵京東路著作佐郎張
果之陝西路台州天台令蘇漸江南西路前睦州桐廬

縣令曾黜福建路著作佐郎范世京荆湖北路謝仲規
成都府路楊汲楊南東路俞允廣南西路就差楊汲提
舉開封府界十二月三日詔近分遣官往諸路管勾常
平廣惠倉等付與條目事皆有狀行之歲月當議考察
竊恐所差去官及轉運提刑司未悉朝廷之意令遍指
揮三十二日改差秘書丞田祐提舉河北路常平廣惠
倉兼管農田等事先是命提舉夔州路上以祐本定州
人今使裁治夔州路事恐非所詣可改河北或京東一
路故有是命 三年七月六日詔諸路提舉常平廣惠
倉兼相度農田水利差役事官依前降指揮疾速計會
監司州縣相度利害以聞二十五日詔閣門今後諸路

提舉常平廣惠倉官到闕並令辭見或有陳陳合上殿如諸路提點刑獄例 四年二月四日提舉成都府路常平廣惠倉等事李元瑜奏見募人充役本路有管勾官及知縣不切遵奉推行者許差官對移從之四月十八日兩浙路提舉常平廣惠倉等事職方員外郎林英勾當官著作佐郎王醇並衝替提舉官太常博士張岫服闋依衝替人例施行以英等在任不推行新法也九年五月十四日權開封府界提點諸縣鎮等事蔡確言府界提舉官乞專差官一員更不令司農寺丞兼領從之八月六日詔陝西等五路提舉常平倉司具降指揮令諸常平存留一半錢遇斛斛價錢許趁時收糴後

至今夏糴到是何斛斛及若干數目速具以聞勾當管
勾十月十二日詔常平錢穀莊產戶絕田土保甲義勇
農田水利差役坊場河渡委提舉司專管勾轉運使副
判官兼領其河渠非為農田興修者依舊屬提點刑獄
司 元豐元年正月十九日詔提舉官並差朝官資任
服色添給錫賜序官人從並依轉運判官例其當舉官
於開封府界提點諸路轉運使副判官提點刑獄見舉
官數內均減立法其立法諸路提舉所舉官計二百二
有九人內二百有一人均減增定二
月五日詔府界諸縣並依已行義倉法仍隸提舉司三
月二十七日詔河東永興軍等路各增提舉官一員以
判司農寺蔡確言近制提舉常平官不令他司兼領誠

為至便然有所部閩遠如此數路者恐獨負之事故也
四月十三日詔兩浙路提舉增置一員以判司農寺蔡
確言兩浙路州縣戶口衆多提舉司所管錢穀三百餘
萬乞擇能吏倚以辦劇故也五月八日熙河路經畧使
張詵乞舉文資一員準備差使點檢常平錢穀從之十
三日詔諸路州軍並差官一員主管常平錢穀十縣以
上二員分治即廣南無通判職官州軍委知州主管並
下縣點檢給納聽次曹官或知縣代之六月十四日詔
提舉官自今與轉運判官以資任相壓同者序官其添
給當直接送人船遞馬兵士並同轉運判官例九月十
三日詔三司司農寺各同罪舉陞朝官五人充諸路提

舉官限十日以名聞十月十九日判司農寺蔡確言諸路提舉常平司舊兼領轉運司極有擅移用司農錢物自分局以來河北東路提舉司申轉運司所移用錢二十餘萬緡江東提舉司申轉運司所移用錢穀十二萬餘貫石蓋轉運司兼領則不能免侵費之弊今川廣等路未有提舉官並轉運司兼權及提舉官假故亦轉運司承例兼權欲乞提舉司闕官處令提點刑獄兼權如廨舍稍遠即量留吏人照管官物等委知州或主管官就便提轄其提舉官時暫在假亦委知州或主管官權本司文字又言自今提舉官稱職者乞令久任候有成效與遷提點刑獄及以上差遣從之二十六日詔罷開

封府界提點司幹當公事官二員並轉充提舉司主管
官 三年九月四日詔委轉運司及提舉官每州於通
判幕職官內選差一員不妨本職專切管勾令通點檢
在州及諸縣錢斛遇有糶糴俵散收納即許往來點檢
催促務令濟辦十一月十六日詔諸路如管一縣以上
州軍許差管勾官兩員從制置三司條例司所請也時
京西路提舉官陳知倫言每州有至十縣以上雖不及
十縣而地分大段闊遠乞委官兩員分頭管勾河北路
支公弼亦言亢京管下十縣地理闊遠乞差管勾官兩
員制置司以為言故有是詔 四年八月二十三日司
農寺言諸路提舉常平官課績已許本寺考校升絀其

管勾官即令提舉司一面保明申量功績大小酬獎從
之 六年正月二十六日戶部上諸路提舉官散斂常
平物增虧之數詔三年四年散多斂少及散斂俱少處
戶部下提舉司分析以聞六月二十三日詔尚書戶部
移置錢百萬緡均與永興秦鳳路提舉司 七年七月
三日奉議郎徐彥孚提舉荆湖北路常平等事彥孚知
衛州黎陽縣言青苗息錢可用常平法聽民非時吉凶
匱乏用抵保稱貸立期輸官不報又言保甲逃亡恐責
以歲月寢虧本數乞立責正長法下開封府界三路保
甲司相度以聞故有是命九月四日詔諸路科買上供
圓融抑配委轉運司提點刑獄提舉司舉劾逐司互察

十二月十六日詔常平免役場務錢穀剩數提舉常平司立限移於帥臣所在及邊要州封樁及詔三路州軍封樁常平錢物半年一具數上都省 八年四月二十二日淮南東路提舉常平司言皇帝登位乞依發運提點刑獄官例以本司錢進奉從之 哲宗元祐元年閏二月八日司馬光言諸路提舉官並罷從之提舉官專行苗役之政既廢官隨罷焉二十八日戶部言乞罷諸州常平管勾官從之五月二十一日詔鄜延環慶涇原秦鳳河東五路經畧安撫常平倉司勾當官並罷 紹聖元年閏四月二日詔復置提舉常平等事官以右朝散郎陸師閔為河北西路提舉左朝奉郎馬瑄京東西

路右承奉郎劉當時荆湖北路左朝奉大夫范峒福建
路左朝奉郎王森利州路左朝散郎徐彥孚成都府路
左朝散郎張琬江南東路左承議郎程筠開封府界右
朝奉郎韓宗直淮南東路左朝請郎王奎河北東路左
奉議郎徐常廣南西路左朝奉大夫蕭世京廣南東路
左承議郎崔邁淮南西路左承議郎許幾京西南路左
朝奉郎曾孝序秦鳳路左朝奉大夫吳荀永興軍等路
左奉議郎鄭僅京東東路右朝奉郎梁子美梓州路右
朝議郎董遵茂州路右朝奉郎呂溫卿兩浙路左奉議
郎周純江南西路左奉議郎王博聞京西北路左朝奉
郎郭時亮河東路右承議郎茹東濟荆湖南路三日詔

提舉常平官資序請給序位服色人從並視轉運判官以資序相壓同者序官到任二年三省具奉行役法能否取旨同日又詔元祐罷提舉官遂於府界置提刑司今提舉官已復提刑司可罷五月七日詔提舉常平官如曾任提點刑獄與提點刑獄序官同日太府寺丞高筠言開封府界提舉常平司請依元豐條復置管勾官二員許本司舉差詔復置一員二年五月六日戶部尚書蔡京言常平免役等事請依元豐制專任提舉官他司勿關與從之七月二日詔應免夫錢並隸提舉常平司六日奉議郎周純言今復置常平官而詔告乃止於免役法恐名未正也元豐稱常平等者謂常平免役

坊場農田水利戶絕保甲義倉撫當也願詔大臣斟酌
損益如免役之法則常平官名實正矣詔送詳定重修
敕令所二十八日提點京西北路刑獄徐君平言提舉
官與監司舊帶勸農者乞據所分巡州縣括其地之不
墾闢周知頃畝縣為圖籍詢究其弊之所在為抹之之
術從之 元符二年五月九日權提舉永興軍等路常
平吳黯言諸路奏差管勾官乞特依熙寧元豐互注法
從之同日淮南兩浙察訪孫傑言按察兩路監司職事
體訪得徧遠州縣多有提舉常平司不曾到處請自今
提舉官雖與監司互分巡歷並須本司官二年遍詣所
部從之 徽宗崇寧二年三月二十三日宰臣蔡京劄

子秦農田水利山澤市易抵當皆常平職事悉以利民
所用錢物合支常平息錢仰提舉常平司審量支給一
萬貫石以上申尚書戶部限三日行下支給從之五月
十三日詔兩浙路添置提舉常平一員 三年四月五
日戶部狀據荆湖南路提舉常平司申近承符勘會坑
冶事撥隸提舉常平司管勾外其轉運司并提點坑冶
更有是何所領職務本司契勘舊管坑冶已係轉運司
應付過錢本去處合隸轉運司提點坑冶鑄錢管勾外
所鑄到錢入常平庫送納於近降朝旨即無明文許與
提點坑冶鑄錢司通管詔自降指揮日舊來坑冶自合
屬提點錢錢轉運司自後新置合隸提舉司管勾餘路

準此 大觀三年七月三日臣僚上言竊觀常平免役之書神考所以理財之政垂萬世而不可易者也常平之息非緣常平事免役積剩非緣免役事皆不得輒用而他司輒敢陳乞借支並科違制之罪陛下彤之詔書罔不委曲曉諭則常平之息免役積剩實有助於仁政欲乞明詔申飭有司遵奉神考成憲庶幾財用各足不致侵紊詔戶部右曹錢物舊有條約禁止頗嚴近來官司陳乞破條支借甚失元豐成憲可疾速申明行下政和元年十二月四日戶部奏臣僚言乞應州縣擅支用常平錢穀不以自首原免其提舉司知而不舉者委提刑司覺察聞奏詔可令戶部條畫申尚書省將上取

旨本部相度欲乞應州縣擅支用常平錢穀提刑司知而不舉亦乞依擅支用條法科罪仍乞依臣僚所乞專令提刑司覺察施行若提刑司知而不糾亦科杖一百之罪兼提舉司所管錢物不止常平一色如允所乞其提舉司應管常平等錢物並乞依此施行從之 七年八月二十五日詔陝西河東京畿京西提舉香茶礬事司並罷令逐路提舉常平司兼十一月三日詔試尚書戶部侍郎任熙明尚書戶部員外郎程邁奏戶部右曹掌常平免後敕令大觀中被旨頒降旁通格式令諸路提舉司每歲終遵依體式其實管見在收支編成旁通次年春附遞投進又本部取諸路錢物之數編類進呈

治將十年未嘗檢察鉤考以見金穀之登耗盈虧與提
舉州縣官之能否勤惰幾為文具竊見政和六年旁通
其間違戾隱廢者凡七事一俵散常平錢穀隨稅斂納
去歲未納數多路分一常平糴穀所糴數少路分一農
田水利堙廢無措置興修路分一市易歲終收息數少
路分一抵當歲終收息數少路分一熟藥歲終收息數
少路分一免役錢依去計一歲募直應用之數立為歲
額多準備錢不得過一分有不敷準備錢却有準備錢
過歲額處如有逐件違犯即是官司違法緣旁通冊內
並不曾開說乞委官徧行點檢因加賞罰以示懲勸詔
令逐路提舉常平司具析逐項因依聞奏仍令諸路今

後將每年所申戶部旁通四量行開說因依謂如是常
平散斂元若干已斂若干未斂若干其未斂之數內若
干係災傷倚閭若干係逃亡戶絕若干係拖欠未納又
如場務元管處所若干已賣若干未買若干其未賣之
數內若干係因敗闕停閉若干係過月未賣之數候到
仰戶部逐一檢察鈎考具以聞八日戶部言乞初除提
舉常平司官上殿稟聖訓訖許赴右曹講議仍給紹聖
常平免役敕令政和續附各一從之宣和二年十二
月三日詔新提舉兩浙常平陳隆壽且令依舊在鹽香
本任依已得指揮專一管勾鑑湖田事不簽書鹽香職
事三年四月二十八日詔尚書省申飭諸路常平官

遵守詔令內合免執奏者非再奉御筆不得施行如尚
敢蹈襲違慢當重行黜責先是提舉江東常平王瞻言
常平專置使者付以刺舉不得支移許以執奏比緣用
度寢廣乃有臨時指揮支移他用仍俾有司免執奏有
司選儒委靡不能援法建明於是借兌不繼殆非熙豐
立法之意乞飭戒有司各請遵奉故有是詔 六年十
二月十一日講議司奏勘會諸路監司承朝旨支撥封
樁錢糴買及諸般支用近來官司乘支用急迫更不關
會所掌官司一面支撥至有數陪於合支之數及虛指
別州縣錢斛兌那其實元無見在侵耗封樁錢物虛掛
張籍有誤緩急欲取索措置從之仍委提舉常平官措

置二十五日中書省尚書省言荆湖北路提舉常平司
狀檢會先承宣和四年正月二十六日敕諸路州軍所
收無額錢物令諸路州軍式勘會每月供申提舉常平
司仍委本司官常切取索干照文歷點對根磨等契勘
諸州無額錢已有立定年終合起錢數即無別合根磨
錢物所有諸州合申無額錢月狀并本司通及兩季合
申都狀即未審合與不合供申戶部勘當無額上供錢
緣已承朝旨自宣和六年為始令轉運司量州軍認數
依限椿發外今來常平司自不消根磨供申詔依戶部
所申 七年正月二十一日手詔朕嗣承先烈罔敢怠
忽永惟元豐稽若先王修水土之政興田疇之利省繇

役之科嚴凶荒之令澤被生民施及後世博矣粵自初
載大綱小紀具在方冊舉而行之二十年間何其盛哉
乃者用非其人誕慢欺罔改法廢令借熙豐紹述之名
以庇貪污營私之惡緣役存興盜賊多有百姓流離享
踏莫之能恤常平賑貸度支調度盜賊移用莫之能懲
惕然內思豈不戾遵制揚功之孝乎皆見四方章奏為
之太息可應提舉常平官屬並罷令尚書遵守按前後
有罪惡顯著失守漫法應不許支用而輒支用應當執
奏而不執奏者並重寘典型竄之遠方仍令三省修已
廢之法協奉公之心輔承先志以稱朕懷三月二十三
日詔直秘閣京畿提舉常平官程昌弼到職未踰兩月

親行所部檢舉已廢法令悉力奉行具載十冊來上可
特遷一官直徽猷閣以勸能吏五月六日詔曰諸路提
舉常平茶鹽官近已之任尚慮因朝廷黜陟之際觀望
畏避懷不自安遂致曠廢自今各安爾職究心奉行修
舉職事毋致減裂當議較其功罪而俟以賞刑播告四
方明聽毋惑十一月三十日中書省言講議司劄子戶
部右曹奏欲乞截自宣和七年正月為始應常平等錢
物責見任提舉官遵守成憲因緣申請直承朝旨支借
並申本部執奏宣和六年以前諸司支借過錢物委見
任提舉官逐一開項年分名色所借數申陳逐路取旨
責限撥還庶幾不致拖帶混淆有實還到之數詔今後

不緣官司陳請直降指揮支借常平錢物並令戶部執
奏仍令本部契勘見實欠數目自是何年月日支借逐
一開具申尚書省 高宗建炎二年六月十四日詔諸
路提舉常平司併歸提刑司令本司將見在錢穀器皿
等拘收具數申尚書省七月一日詔令提刑司將常平
司見在金銀並起發赴行在八月九日京畿轉運判官
上官悟言軍興之際養兵犒賞費出不貲理宜廣行蓄
積以贍邦計竊見諸路常平近已廢罷州縣坊場市易
等錢合諸路所有見在萬數別無支用去處乞下諸路
委自己以根刷除免役錢外盡數起發庶幾贍給軍費
不致窘匱詔令逐路提刑開具見在常平錢物數申尚

書省十七日詔令諸路提刑司開具舊常平司山澤坑冶課利等錢物自崇寧後來至宣和七年終因何不行起發有無侵欺擅用如曾承指揮支使亦開具見管數申尚書省從戶部所請也二十一日戶部言諸路常平司併歸提刑司所有人吏貼書欲乞減三分之一其存留人取入役年月先後所貴公當其諸州兼主管官吏欲乞依舊庶幾逐處拘催錢穀不致闕悞詔三分內存留一分餘依九月二十四日戶部尚書黃潛厚言諸路提舉常平司依法每歲限三日已前具舊收支見在旁通本部編類諸路數限秋季終進呈竊緣本部依元豐法每歲已有限秋季終攢類進京常平等錢物總數政

目大冊今來旁通見各支破食錢虛費無補乞除依元
豐法進呈政目外將旁通並罷詔從之十二月五日福
建路提舉常平司言本司自併歸提刑司除已遵依施
行外今根刷到泉州見在常平等錢米物貨若干竊恐
遠方官吏以減併常平專司遂沿習軍興巧作侵支隱
落緩急非泛輒斂及民以致搔擾欲乞嚴降指揮以所
具數付提刑司椿備專候朝廷處分指定名色方得支
遣詔從之十八日知濠州連南夫言被旨下諸路將常
平錢物計置輕齎金帛差官押赴行在交納今刻刷起
發到常平司在下係封椿錢若干貫變轉到銀若干兩
并預買絹抵當金銀及軍資庫見在未起夏稅匹帛等

已計置赴行在交納奏聞乃詔預買絹紬并軍資庫物帛既非上供額數自合椿留充本州本路軍兵衣賜餘赴行在送給諸路依此二年五月六日都省言常平錢物除罷散歛外其餘名色不少各有支用窠名若不關防檢察竊慮官司欺隱移用有誤支使詔令諸路提刑司各取索管下州軍未撥付提舉司以前三年逐色收支錢物內以一年酌中之數具狀申省如所收數多不擾於民及有虧失數目各具當職官吏職位姓名并所虧因依具申仍仰提刑司常切檢察若有欺隱及妄支移用去處按劾以聞八月一日詔復諸路提舉常平官臣僚等伏見神宗皇帝修講常平之政置提舉官錢穀

充足不可勝校崇寧中始取以充學校養士之費政和中又取以供花石應奉之資僅費三十年所有無幾邇來罷提舉官而常平之財所存一二以億萬計方時多事財用為急望復置常平官講補助之政從之同日是臣僚言昨置常平歸提刑司朝廷實遵祖宗法以利民今來常平一司所有應係官錢諸路計萬數不少往往官吏欺弊遂至失陷乞朝廷逐路專差官一員驅磨所屬州縣立限追納別作一項椿管從之十月十一日三省進呈復置常平官事擬詔語曰近緣臣僚論列已復置常平提舉官勘會常平之法歲久多弊自來以紹述為名雖知有公私不便合行增損改易事件莫敢申陳

今來復置提舉官止為推原常平本意與民為利所繫
不細他司難以兼領尚慮蹈襲日前却置致使民受弊
可除青苗散斂法依已降指揮永不施行外應見行條
法委侍從官三員專一討論限半月條具奏聞取旨施
行上以手指青苗散斂永不施行八字顧謂宰臣曰此
事宜令進奏院先報行使遠近聞之知朕復常平官實
為民也上又曰從官差誰討論潛善曰翰林學士葉夢
得屢於臣處說常平提舉宜置給事中孫覲上殿劄子
乞復常平提舉中書舍人張徵詳練久作民官欲差葉
夢得孫覲張徵從之十七日戶部言右曹歲奏常平等
錢物總數秋季具冊以聞今年合攢類建炎元年分總

數諸路提刑司并涇原環慶等路安撫司已預行會問
終不齊集乞免進一次其來年合申數目望嚴賜指揮
諸路提刑安撫司常切遵守條限供申詔據已到數攢
造投進餘依十二月八日翰林學士葉夢得給事中孫
覲中書舍人張徵言常平法起自西漢本以惠民祖宗
行之已久熙寧初緣類推廣附以青苗免役市易抵當
坊場河渡農田水利等事其意亦在寬恤民力只緣創
法之始急於功利委任非人觀望掊刻遂致議論不一
紹聖間再行修定已稍損益但拘守紹述之說必於盡
行故如青苗敏散追呼騷擾市易物貨苛細爭奪農田
水利之官謾誕欺罔之類明知其弊不能革去所以民

至于今以為病其後應奉花石取以資不急之用遂失
創法本意近又緣軍興調發諸司或許借貸於是移易
侵漁掃地殆盡建炎需恩首罷青苗法蓋得之矣然未
幾併罷常平使者以他司兼領吏無專責漫無統紀舊
法雖存無復修舉人實惜之今朝廷復置常平使者命
官討論竊詳聖意非是再欲盡行熙寧本法及別有創
立正為法本惠民於此艱難民力困弊之後務欲寬繇
後省科斂通有無濟乏絕使得博採羣議與時變通擺
去拘礙之議應干害民之事盡行刪除存其經久利便
者使有司專一持守以遺將來實為美意尚慮中外不
能究知妄有測度或請欲根刷已放債欠或請欲營求

非理羨餘以為足國用之計動搖民聽不無疑駭欲乞
明降詔首先次播告使上下通知然後於實德州縣人
內遴選通曉世務習知民事篤厚忠信之人以充使者
使之奉行言修政舉人被實德則上可廣惠民之實下
可明革弊之意矣 三年正月十一日吏部尚書呂頤
浩等言奉聖旨討論常平法自來常平所蓄不得非常
支用昨因廢法將常平所入輒分他用失陷儲積不可
勝數如戶絕并折納到田產昨撥充贍學今來諸路既
科舉取士其元撥田產并學事司因撥到上件田產後
來營置到錢物依建炎二年六月十六日勅下發運司
將東南諸路收到錢物依江西已得指揮更充糴本一

年農田水利東南所入甚厚如越州鑑湖湖州廣德湖
潤州練湖所收租課依靖康元年五月五日指揮發運
翁彥國拘收專充糴轉般代發斛斛本錢皆係常平司
所管田產始者取充應奉次取充漕計見取充發運司
糴本伏望追還常平司椿管以待朝廷緩急移用更有
似此之類候除常平提舉官到任先次拘收所貴常平
有以為本從之閏八月九日臣僚言臣聞漢昭元年罷
榷酤均輸之法唐順宗即位罷月進羨餘之貢如拯溺
救焚唯恐其不及所以固邦本於不拔延世祚於無窮
恭惟 陛下即位之元年即降指揮罷提舉常平官吏
蠲放常平錢穀詔下之日無遠無近鼓舞歡忻仰戴惟

新之政而去歲之冬初復有指揮置提舉官根刷諸司
侵支催理民間舊欠諸司侵支固豈入已非軍期犒賞
則月給錢糧逼使撥還亦非已出奪彼與此有何利害
民間舊欠所在皆然非逃亡人民則庸胥猾戶迫令輸
納號令不行良善編氓例遭抑配開猾吏衣食之源道
平民椎剝之苦人心駭愕物論紛紛使陛下重失民心
特在此舉繼聞有旨委從臣詳議渡江之後未即施行
而遠方官司奉承不暇修飾廨舍召置吏人供帳什物
之資增給祿廩之費不知其幾何也近據監察御史林
之平申福州一州已使過錢三千餘貫則其餘州縣計
不減此提舉官差與不差提舉司置與不置元無明降

指揮徒使四方奉行違戾切惟斂散本非良法知取債
之利而不知還債之害前言固已曲盡於人情而今乃
督責於既已放免之後則其為嗟怨豈特還債之比邪
臣願明降睿旨一依建炎元年指揮罷提舉常平官吏
放見欠錢數仍令追理耗用椿充錢本復講舊平糴之
法不惟陛下恤民之詔不為空言而使斯民復見祖宗
之政詔降諸路復置常平官指揮更不施行十一月四
日江南東路提刑司言罷提舉常平司併歸本司今取
會到本路一十州軍四十八縣見管錢斛金銀真珠銀
器絲帛等詔令本司將金銀物帛等先次計置起發押
赴行在外見錢米依舊椿管不得別作支用仍開具窠

名申尚書省 四年六月二十二日詔諸州常平官吏
月給食錢並罷 紹興元年六月二十八日戶部言諸
州縣常平賑濟糶糴義倉鄉村場務免役在保推排家
業陞降等第盡于民務依法立常平免役按專置人吏
行遣元豐以來隨州縣大小立定額食錢數推行重法
又諸州見任官內選充主管官統轄隨縣多寡立定月
給食錢所行文字許主行常平等事吏人兼管昨罷青
苗散斂承建炎四年六月二十二日朝旨應諸州常平
官吏月給食錢並罷即合減罷常平主管官依格月給
食錢并兼行文字人吏內有見添破食錢去處亦合住
罷所有常平免役按人吏依祖宗法並行重祿其合支

本身重祿錢不應減罷今措置並依逐州役法元載內
顧食錢數支給從之先是建康府申今來既罷提舉官
即應干官吏月給食錢並罷本府未審上謂罷支主管
官并主管司人吏食錢惟復本府五縣見行常平免役
按人吏重祿食錢並罷止支與常平法食錢故有是詔
二年六月十七日詔諸州常平主管官合支食錢並
許依舊支給仍仰專催督常平諸色租課及應干錢穀
遇有替移並令批上印紙明言常平錢穀別無拖欠失
陷方許離任候到吏部如點檢得不經批書不許參部
從兩浙東路提刑孫近奏也十二月二十九日度支員
外郎胡蒙言常平之法靖康初廢提舉官唯罷散斂錢

穀餘則其法具存悉兼領於憲司七八年矣未聞朝廷
每歲終以格法較諸路措置推行之能否以責其實效
也而軍旅未息用度百出則收常平程課以助經費況
殘破郡縣逃絕田產不可以數計坊場河渡託以停閉
地界利源盡入於私室及神霄已廢額學校未養士二
浙又有所謂湖田草田米之類名色不一臣欲乞申嚴
期自兼領使者至州縣守令立為殿最之法歲終稽考
而勸懲之詔令戶部立法申尚書省本部今修立下項
諸令佐催納免役錢舊常平司諸色租課限滿委知通
取索應催納欠之數批書印紙仍申提刑司本司類聚
每歲將任滿之人考較以足而不擾為優有欠而最多

為劣各三人限次年二月終具事狀保奏

無或不足而足聽闕

不擾者陞半年名次欠而最多者降半年名次詔從之

三年正月三日詔諸路提刑司官各給敕一道兼提

舉常平等事於衙內添入仍許直幹辦官一員於置司

州軍差屬官一員兼管常平等事其本司人吏與存舊

額之半內提刑官兼提舉常平等事與依舊支破提舉

官食錢其本司應干田產錢物委逐州主管官根括驅

磨候新差到幹辦官逐一取索檢察如得見主管官却

有隱漏令提刑司按劾施行以戶部尚書黃叔教等罷

司之後不置專管其提刑司及州縣當職官吏觀望苟

簡不務振舉職事坐令失陷官物滋長姦欺故也三月

九日江西提刑司言諸州主管常平官在法許本司選
差通判幕職官充竊慮其間有主管替移任內有拖欠
失陷常平等錢穀避免責罰計會本州官吏只依式批
書任內勞績其拖欠失陷錢更不批上印紙一面前去
參部省部無由幾察今相度今後應本司選差諸州主
管官並今所屬即時批上本官印紙照驗方得放行逐
月添支食錢如遇替移即遵依已降去年六月十七日
指揮餘路依此詔從之四月十二日江南東路提刑兼
提舉常平事張匪狀戶絕等田產近緣兵火官司不曾
盡實根括拘收及已前亦有冒占官產之人不少乞限
一月招名冒占之人許自陳首

自出榜
日為始

如能依限出首

即與免罪給賞却將所管田產紐立租課依舊給與承佃若限滿不首即別許人陳告除依法給賞外更與犯人名下每上戶追錢一百貫等給與告人充實戶部契勘除告賞自合遵依見行勅條外如見曾冒占人自今限內自首給佃從之餘路依此十九日江浙荆湖廣南福建路都轉運使張公濟言被旨拘轄檢察常平錢物今點檢得秀常等州有違法侵漁充使過常平錢穀欲乞朝廷各責限半年撥還數足如限滿不足將合干官吏特賜行遣戶部勘當欲並限一年盡數撥還起赴行在送納如違限不足並依已降指揮施行庶使侵欺財計官吏有以畏憚并下都轉運司照會更切嚴緊催促

從之五月七日戶部言江西提刑兼提舉常平等事丁彬狀乞立限責委諸州主管官根括驅磨常平司田土租課錢物欲依本官所申限一月如稍有違慢漏落亦乞依已降指揮按劾從之九月二十戶部狀據江南西路提刑兼本路提舉常平等事丁彬劄子契勘提刑官闕在法係轉運司兼權若將來提刑官任滿或非次替移其提刑職事依法牒送轉運司官兼權所有提舉常平司職事若依例前去轉運司官兼權其州縣官吏觀望定是依前違法侵用常平官物今相度如提刑司官闕欲依條許將提舉常平職事牒送提點鑄錢提舉茶鹽官或縣宇所在文臣知州時暫發遣庶幾常平官物

不致侵紊從之餘路準此十月十八日都省言今秋諸路大稔正當米斛上市之際雖依法合行收糴深慮常平官不為盡數剗刷錢本及收糴後時却致價賤傷農詔令兩浙東西江南東西廣南東西路提刑兼常平官將應干州縣見在常平等合充常平糴本錢物專委任主管官親誼逐縣同令佐盡數剗刷逐旋闕撥乘時措置開報盡本收糴米斛椿管其糴到數仰知通認數就元糴州縣常平倉別項封椿仍仰提刑官嚴切約束所委官將合取撥糴官先次椿垛錢本遇有人戶中即仰躬親監視兩平交量不得過收加耗即時支還價錢無令少有科配騷擾及容縱請託入中巧偽混惡米斛如

違仰提刑司官按劾仍仰逐司各先其上件合剋刷稟
名且約度半年錢數及可以收糴米斛各若干并旬具
剋刷到錢本已糴買到米數各開具申尚書省十一月
十六日詔提舉常平司主管官並依常平舊法先是戶
部看詳欲諸州並以通判充主管官不得別差他官臣
僚言元豐紹聖立常平令諸州聽提舉司選通判幕職
官充主管官蓋通判或材力不能辦事即令人許於幕
職官選差此通法也 五年閏二月十二日詔諸路提
舉常平併入茶鹽司仍以提舉茶鹽常平等公事為名
內無茶鹽去處依舊令提刑兼領先是臣僚言財用利
源有旨令戶部講究條具申尚書省內一項欲以常平

茶鹽合為一官稍重其選故有是詔四月三日總令司
言據兩浙東路提舉茶鹽常平等公事司申據紹興府
中契勘有管義倉米貳萬一千三百餘石雖依條唯充
賑給其米經年陳次欲比街市價例量減錢出糶近緣
明州申請米價踴貴細民闕食乞將義倉米出糶已承
朝旨特令明州於上件米內借支一萬石候秋成日却
行依數收糶撥還不得拖欠仍令常平司拘催椿管仍
免執奏及再得旨奏知不行今看詳欲乞於收到義倉
米內借支一萬石令紹興府置場出糶餘並依明州已
得指揮詔依即不得糶與公吏之家務要實惠細民七
月二日都省言諸路提舉常平已降指揮併入茶鹽司

無茶鹽司去處依舊提刑兼領專置幹辦官今訪聞逐
司為系併入兼領職事並不逐一講究致他司妄用失
陷錢物有悞朝廷緩急支用詔令諸路提舉常平事務
恪意奉行無得苟簡致有失陷錢物如敢少有減裂戶
部按劾申尚書省取旨重行典憲八月七日詔應諸州
軍曾兼主管常平官罷任到行在如係合堂除差遣人
令閣門候朝見日具職位姓名報吏部依元降指揮取
索印紙點檢如不經批書即具狀申中書門下省未得
與堂除差遣十二日福建路轉運判官薛昌宋言諸路
州軍借撥過常平司錢物亦皆緣應副軍期即非侵欺
失陷又已經年歲今來若必令責還要之盡取於民而

已欲乞將七州軍以前年分借過常平司錢物乞依福州已得今年三月二十二日聖旨並特與除破使福建一路之民均被朝廷寬恤之恩詔並特與除破今後如更敢擅支常平錢物依法施行 六年五月一日詔自今諸路提舉茶鹽常平官有闕並取資歷已深呈實素著之人或於郎官以上選擇任用從殿中侍御史周必言也詳見提舉茶鹽司門二十五日詔令江南東路轉運常平司行下所部州縣將本路應未納并今後合納職田租米令輸納本色隨市價盡數收糴充義倉米別項椿管專充賑濟支用其合支本錢許取撥本路常平司所管錢如不足將本路係省錢相兼應副旱傷闕食餘路州軍

有職田去處依此施行 七年二月二十四日浙東提
舉常平司主管官趙椿言今來逐路乞置提舉常平司
主管官一員並依轉運司主管文字官體例施行欲乞
許常平主管官往詣管下州縣檢察將點檢到事件申
提舉司及遇有要切事並從本司差委庶幾所至州縣
檢察違戾驅催錢物不致失陷從之仍詔餘路準此八
月二日詔令逐路轉運司據借兌過常平數目候起納
稅日並限一月依數先次椿還仍令常平司不住催促
各具已交還數足文狀申尚書省十二月二十五日有
旨天下苗米其不熟處除依條放免外止令納錢却運
錢於熟處糴米如此則公私兩利臣椿奏曰此乃劉晏

之法也見行措置 八年正月二十一日詔今後提舉
常平及常平主管官除代不過一員其已差下人並令
依舊從御史中丞常同奏乞在外堂除窠闕依做在內
除授之限故也十二月十九日參知政事李光言政有
避其名而失其實者有無其實而徒存其名者常平之
法本出於漢耿壽昌今州縣錢穀有屬常平司者名色
非一悉總於戶部右曹今乃以王安石之故而廢之既
使香鹽司兼領又別差主管官一員有司莫知適從錢
穀因致失陷豈非避其名而失其實乎欲望廢罷常平
司主管依舊令香鹽司兼領庶幾名正而事成尋進呈
上曰常平法既出漢耿壽昌今豈可以王安石而廢之

其常平提舉自可復置庶幾一司錢穀不致失陷令三省措置條具以聞 九年四月六日詔令後諸路常平司幹辦官遇出陸巡按州縣許差破般檐人一十名以江淮荆浙閩廣等路經制使司申明紹興格監司屬官差出止許破般檐人六人委是使用不足故也七月十七日臣僚言諸路常平錢物昨罷提舉官不無陷失近既設官主管而命經制司領之若使本司常切拘催奉行不許諸司支借移用則此一司所積緩急亦不為小補但其間有近降指揮令解付行在者計天下諸司錢物亦多矣雖未能盡如古人三分以一為凶年之備獨不可損此一項邪蓋州縣之間有此一項錢物豐年增

價以糶凶年減價以糶物價自平農末俱利所濟既多而又有以備朝廷之緩急何苦而不為近見楚州乞將連水縣所有常平錢五百貫文準備奉迎兩宮及樞密樓焘宣諭回日支遣戶部已申明許行支用夫楚州雖關乏何至少此五百緡哉政恐開此端緒使州縣各自侵用非戶部所當爾也臣愚欲望聖慈特詔常平一司錢物並遵守戶部右曹敕條雖內有近降指揮許解行在者並令依舊法於所在處椿管不許支用移易仍追寢楚州許用常平錢指揮庶幾有以為國家根本之計不勝幸甚詔令戶部遵守見行條法九月十四日戶部言諸路主管常平官近因置經制司改作經制某路幹

辦常平等公事今來經制司若罷即合依舊稱呼又契勘建炎元年内罷諸路常平司其職事令提刑司兼管後來紹興五年内改令茶鹽司兼管其無茶鹽司路分安提刑司轉運司兼領近因經制司總領其逐司並已罷兼今來若罷經制司所有常平職事若依舊止令一幹辦官主管竊恐體輕難以按察州縣無以革絕前日失陷之弊兼常平一司所管錢物并糶賣賑濟等事言常平和糶之法祖宗以是惠賙艱饑其來久矣比年州縣類為文具有廢而不舉者有苟簡以塞責者以新易陳此成法也間有積歲蝕腐而未嘗問不許借貸此成法也間有悉充他用而實無儲願詔諸州縣乘今日賦

稅未畢之時以常平錢差官置場悉數和糴委常平官徧行省按有不虔者必罰無赦從之 十二年五月二十三日權發遣和州馮由義言前知州蔡伸因去歲支散官吏軍兵請給大軍經過犒勞遂致錢糧罄匱以常平司二項錢共八千餘貫米二千餘石逐急支散本州已累申乞除破雖蒙割下淮西常平司令指定施行其常平司至今移文折難竊緣月給錢糧自不能繼無由可以撥還欲乞特與除破從之八月五日詔令諸路提舉常平司主管官遍詣所部州縣點檢將日前糴米并以陳易新未還之數乘此秋熟收糴撥還早令數足如法椿管仍開具本路州縣已未補還實數保明申尚書

省當議覈實賞罰施行先具知稟狀聞奏以尚書省勘
會州縣多以兌易為名輒行侵用故也 十五年六月
二十一日戶部言民間生子不舉者已降指揮於常平
或免役寬剩錢人支四千緣免役寬剩錢所收微細竊
慮州縣留滯欲令諸路常平司行下州縣於見管常平
義倉米內改支米一石從之八月二十六日詔諸路提
舉茶鹽官改充提舉常平茶鹽公事先是戶部侍郎王
鐵言常平法始於漢宣帝用耿壽昌之疏施於邊郡以
致中興國朝行之大郡錢穀有至百萬其下猶不減五
六十萬建炎初罷提舉官兼以他司初不以為不惠於
民不利於國也徒以追咎改作遂併其官官廢事闕法

令無復修舉故紹興六年復置主管官然權輕不能振
職名存實亡無補於事非祖宗利國惠民之旨也夫常
平之設上以收開闔斂散之權下以抑兼并豪彊之家
備水旱而救札瘥視豐凶而平物價科條實繁其利不
一有義倉和糴之儲坊場河渡之入以產制役欲使平
均以陳易新俾無紅腐一有饑饉則開發倉廩以濟艱
食豈一主管能勝其任哉建言者將欲省官而主管復
將欲省吏而胥徒如故獨能一提舉官而姦弊百出州
縣苟且無所畏憚封樁錢物借貸移易多致陷失凶年
饑歲賑濟之法漫不加省蓋以主管官威令既不能有
制而職事又不得自專勢使然也今雖隸於憲司而獄

訟繁多不能究心其能責以利國惠民之實效乎欲乞
復置常平提舉官以主管官為幹辦公事其他無所損
益而積弊可除庶幾良法美意不為虛文故有是詔九
月八日權戶部侍郎王鐵等言已降指揮諸路提舉茶
鹽官改充提舉常平茶鹽公事緣成都潼川府利夔州
路即無提舉茶鹽官及淮西京西路提舉茶鹽見係逐
路轉運提刑兼管廣西路提舉茶鹽見係提刑兼管及
諸路常平司主管官所掌職事並合取自朝廷指揮詔
四川廣西令提刑淮西京西令見兼提舉茶鹽官兼領
主管改充常平司幹辦公事依轉運提刑司屬官體例
十二月二十八日吏部言常平官今來改充提舉常平

茶鹽公事合依舊法為監司與轉運判官序官及歲舉
改官五員縣令三員大小使臣陞陟八員承務郎以上
五員試刑法官七人合依舊盡還本司從之 十六年
三月三日戶部言臣僚言常平一司專為賑濟設實國
家之仁政也自兵興以來州縣紆目前之急移易他用
習以為常比復常平提舉官則向來借兌之弊已在累
任難以遽令填還欲自未復提舉以前凡有借兌寬立
程限分以三歲撥還仍釋其罪違時拖欠必寘常法自
已復提舉已後即仰州縣遵守舊憲不得借兌提舉官
每歲考核少有違戾並不以赦降去官原減庶幾往者
既獲自新而來者有所畏憚本部措置欲下諸路提舉

常平司開具節次借兌因依若干數目從本司量度年月遠近申取朝廷指揮隨其多寡立限撥還餘依臣僚所乞從之二十一年十一月二十一日上因論水利謂輔臣曰須是常平官得人若監司用心此等事無慮聞近時監司多是端坐不出巡歷仍詔諸路州縣灌溉民田陂湖往往為人侵占令戶部行下提舉常平官躬親措置申尚書省二十七年八月四日戶部言逐路常平司保明到本路州縣所立平準務合用本錢除不及一千貫去處不立賞罰外今相度比擬條法將立到本錢一千貫以上去處以本多寡參酌立定監官候一歲終以本計息賞罰格自收息及三分以上陞一季

名次不及一分五釐展一季名次五千貫以上收息及
三分以上陞半年不及一分五釐展半年一萬貫以上
收息三分以上陞一年不及一分五釐展一年三萬貫
以上收息不及分以上減一年磨勘不及一分五釐展
一年磨勘本部除已相度監官歲終收息分數賞罰外
竊緣立到本錢既多寡不同即難以一等添破食錢欲
乞將不及一千貫以上本錢去處比擬條法除不賞罰
外每月收息及二分止與添破食錢三貫文外有立到
本錢一千貫以上添五貫文五千貫以上添七貫五百
文一萬貫以上添一十貫文三萬貫以上添一十五貫
文如不及二分即依已降指揮不支食錢欲下逐路常

平司行下州縣遵守施行餘依見行條法指揮從之十
三江淮南東路提舉常平司言分委官前去諸州軍點
檢到見在常平義倉斛斛即無侵支移易虛椿之數戶
部將本司奏到今年四月分見在斛斛數目比較一路
總計奏到一十四萬二千一百石點檢到共一十二萬
六千三百二十四石廬光州安豐軍比奏到增七百一
十六石和舒蘄濠黃州無為軍虧一萬六千四百九十
二石詔令本路常平司取虧少數目嚴立限以督之九
月十四日戶部言殿中侍御史王珪言常平賑糴所以
相兼并濟貧弱此良法也每歲夏秋之間禾稼未登或
小有水旱民方艱食之時富人閉糴以規厚利若官糴

少損其直則閉糴之家不能乘人之急而價自平所濟貧乏其利為不小也竊見諸州郡每歲輸納秋租自裝發綱運之後倉廩一空所存止有常平義倉斛斛軍糧吏俸及揆發上供不足之數百色支費皆取給於此受納苗米然後遂旋撥還所在成例是名為常平而專以備州郡急闕至飢民艱食則坐視而無以賑之殊非立法之意前日朝廷委諸路常平提舉差官盤量所欠動以數萬計其間如借充耗折雖責之分限補填終不可得亦恐見存之數未必皆可得實也近聞福建有貴糴之處父老訴之州郡冀欲賑濟而郡官占吝不發米價頓增人多困斃此其意必欲留為州郡急闕之備或已

借兌無見存之數不暇恤民間之空乏也臣願委諸路
提舉常平徧巡諸州躬親閱眎以知其實有遇合賑濟
而州郡占吝不發者許人戶越訴監司互察臺諫按劾
以聞有中下之州所積不多賑濟不足則令提舉計以
一路有餘之處通融取撥以應其乏免致流離轉徙此
亦古者移粟就民之意近年以來州縣遇合賑糴之時
官吏但欲塞責其所給散多只於州城之內近者可得
而遠者不能及至村落之間無所得食而不逞之輩藉
以鼓唱有攘奪剽掠之患況饑民往返數十里之間或
至綏死於道路今若許令隨所在差撥就近應副庶當
均給而實惠可以及人也本部看詳欲下諸路提舉司

依奏躬親遍詣所部州縣點檢見管米斛令項如法封
椿如遇合賑糴闕少米斛須管於就近有米斛去處多
方允撥那融應副依條賑糴不得占吝務在存恤如有
違戾去處從本司按治依條施行若本司失於按治即
仰轉運提刑司互相按察從之二十九年三月二十六
日中書門下省言諸路出沒沒官戶絕田宅價錢昨降
指揮許常平司取撥三分應副糴本今來措置盡數起
發難以更行分撥詔令戶部行下諸路如常平司有闕
糴本令開具申朝廷支降七月五日詔逐路提舉常平
官躬親措置沒官戶絕等田宅如能率先出賣數多仰
戶部具申尚書省取旨優異推恩或出賣數少當行點

責州縣當職官能用心措置亦於已立賞格外增重推賞或令常平官按劾聞奏重作施行先是戶部提領官田所狀契勘江浙等路沒官戶絕田宅近承指揮州委知通縣委令丞措置出賣今訪聞有奉行違戾去處致引惹弊端欲乞令提舉常平官嚴行檢察今措置下項一人戶見佃田宅依指揮令州縣官躬親監督依鄉源體例肥瘠高下估定實價與減二分如願承買並限十日經官自陳日下給付蓋欲優恤見佃之家今訪聞估價之時其所委官並不躬親監督致合干人作弊受有力之家計囑低估價直便令承買或見佃人未有錢即計囑高擡錢數要得出賣不行今措置欲未賣田宅並

依條出榜許實封投狀自出榜日為始限一月拆開封以最高錢取問見佃人如願依價承買限十日自陳與減二分價錢給賣如不願承賣即三日批退給價高人若見佃人先佃荒田曾用工開墾以二分價錢還工力之費如元佃熟田不在給二分之數限滿無人投狀再限一月若兩限無人承買即量行減價出榜召賣一見佃人戶已買田宅既於官中低價承買却又增價轉手出賣或借貸他人物收買後却行增價準折之類欲許諸色人經官陳告以所買田宅價錢三分給一分與告人充賞餘拘沒入官別行召人實封投狀買庶幾隔絕姦弊一人戶所佃田宅若其間有已前冒占及說名挾

田至今耕種居住送納課米或二稅既已施工力終是見佃之家竊慮州縣不許作見佃人承買致引惹詞訴今措置欲並作見佃人戶承買一今來合賣田宅其間有官戶形勢之家請佃往往坐占不肯承買致阻障他人亦不敢投狀今措置如出違前項折封日限無人投狀承買即依官估定價直就勒見佃人承買其所納錢令作三次限一百八十日納足違限不足即依已降指揮施行如依前坐占不肯承買即仰州縣具名申常平司本司具因依申取朝廷指揮施行一人戶投狀承買田宅折封日見得著價最高合行承買却稱不願買者依已降指揮以所著價十分追罰一分入官仍給賣以

次著價最高人又不願亦追罰一分錢竊慮有狡猾之人用意阻障妄增錢數既至拆封却稱不願承買又將合沒一分錢數用情計囑不為送納攪擾見佃之家今措置欲似此合追罰一分錢數限一月追理納足仍令常平司常切覺察如州縣不為追理或頑猾人戶不為送納即具名申取朝廷指揮施行所有人戶實封投狀著價最高若見佃人與投狀人皆不願買即將次高錢數先次取問見佃人施行一契勘出賣浙西營田已承指揮權住賣外所有其餘路分營主官莊屯田前後已降指揮即不該載今來並不合出賣一訪聞常平司并州縣人吏多受情囑邀阻乞覓及不將前後措置多出

文榜曉示雖出文榜隨即隱藏不令人戶通知或州縣作弊欲使人抵價買得榜內更不寫出田段價直却令買田人先低價投狀臨時於紙縫內用紙撓入所買田土外人無從得知致出賣稽違欲下逐路常平司官嚴行覺察稍有違戾按劾申朝廷重作施行人吏決配一今來措置止係補圓未盡事件即不衝改前來指揮欲下兩浙江東西湖南福建二廣西川提舉常平司疾速行下所部州縣遵依施行仍令州縣分明大字多出文榜州縣要關及鄉村坐落去處曉諭民戶通知無令藏匿若常平司不檢察乞令提刑司覺察按劾詔依權置事理施行於是中書門下省言江浙等路出賣沒官等

田宅前後措置指揮纖悉具備全在常平州縣官恪意奉行近據逐路申到所賣田宅大段數少蓋緣常平官視為虛文不切督責及州縣知通令丞弛慢全不究心覺察容縱吏人受囑高下估價隱匿文榜百端欺弊致出賣稽違理宜申嚴約束故有是詔同日戶部提領官田所言諸路寺觀絕產已降指揮令常平司拘收令項椿管中取朝廷指揮至今未見申到已椿管數目詔令諸路提舉常平司依已降指揮疾速開具申尚書省三十年十一月一日右諫議大夫兼侍講何溥言臣契勘常平義倉所以為水旱盜賊之備祖宗立法雖顆粒不得移用其意深矣臣訪聞沿海州軍比以裝發海州

權宜濟急支費畧盡有司因循不補終恐亡以待卒欲乞特命提舉官巡歷諸州稽其已支之數量其合糴之實或將他州贏餘以濟目下窘乏有無相補輕重適均庶幾新陳之交有以相接而緩急之際不足為憂從之

孝宗乾道元年八月十四日詔諸路提舉常平官下諸州主管官契勘以新易陳借兌數目於今秋苗米內依數撥還仍開具申尚書省 四年五月十四日詔諸路提舉常平官每歲春季躬親巡歷逐州點檢常平倉米要見椿管實數申尚書省六月七日詔諸路提舉常平官督責所部州縣候秋成湏管將人戶納義倉米數依條限拘催盡實收椿仍將見管錢趁時收糴米斛如

法椿管不得違戾七月十二日詔提舉官日下遍詣所部盤量常平義倉米斛所至具實數即時開申如州軍元申數內却有虛椿將當職官吏重寘典憲提舉官徇情隱庇亦當一例黜責八月十八日詔諸路提舉司差官根刷應諸司吏人所借常平雇役錢在五年內者盡行追納自後州縣敢擅借支者依條按劾以聞六年八月二日權戶部侍郎王佐奏臣攝空民部日受四方詞狀而訴冒役者居其半乞令提舉常平司委主管官限兩月取索屬縣額內公吏看詳委有違條冒役即行勒罷如收斂應法自合聽令在役仍將各縣公吏姓名揭於板榜其再入役者畧其所斂之因俾民通知歲終

一易自今以後論訴冒役者必須指其元來所犯刑名
與收斂不當因依如根究得實監司守令當職官依紹
興二十六年八月指揮坐以違制之罪倘或姦民挾私
妄訴亦科反坐刑名庶幾州縣稍得安靜從之 七年
六月二十四日臣僚言近歲以來常平之法寢以不修
抵當平準之柄悉取而用之戶絕水利之田欺隱於奸
吏帑庾之積所至空虛方粒米狼戾之際無本以收糴
殆野有餓莩始為移粟之舉取之鄰州別路道路既遠
時月亦淹救助未至而民之骨已槁矣願陛下申詔提
舉官檢覈管下諸州常平糴本有支移侵盜去處各令
隱括椿辦以俟將來新穀既登穀賤傷農之際增價收

糴以惠斯民從之十月二十四日提舉兩浙西路常平
茶鹽公事李結言奉旨令禮部給降到度牒一百八十
道及左藏南庫支到會子一十四萬八千貫付本司收
糴米八萬八千二十餘石除已州委主管司法縣委縣
丞收糴椿管契勘目分正係米斛收糴之際若候變到
度牒價錢竊慮失時乞先次於左藏南庫支借會子七
萬二千貫付本司趁時收糴所有度牒令所屬旋行轉
變拘收錢會發納左藏南庫從之 八月四月十七日
詔諸路常平官限半月委逐州主管官取索五年的實
收支義倉數目開說逐年有無災傷檢故及支給過若
干并見在之數實計若干自今在甚處椿管申戶部稽

考從權戶部尚書楊侯之請也 九年七月二十一日
戶部尚書楊侯奏乞令諸路提舉常平官將諸州軍常
平倉錢斛委鄰州官點檢截日見在數目內米一萬石
已下盡行盤量一萬石以上抽摘盤量結罪申提舉司
從本司覈實保明限一月奏奏如日後發露其所委官
并提舉官並行按劾取旨重作施行若提舉司不按月
聞奏亦乞從臣等比較最遲去處按劾從之

全唐文

續宋會要

御史臺主簿

大興卷一千一百十七

此條原夾在本卷第二頁內

元豐三年李定請增置一員點檢六案文字元豐六年九月中丞黃履言本臺有主簿兼檢法官二員乞復置分治職事詔置主簿并檢法官一員從八品又奏本臺主簿檢法官係分掌站籍參預定刑所領職事與他司不同元祐元年大理寺右斷刑架閣庫專委主簿主管

接上寫
不空行

全唐文

續會要

淳熙元年三月十日京西運判胡仰言襄陽居民繁多
乞下本路常平司置藥局一所依免役令以抵當務官
兼計置藥材修製出賣從之 二年閏九月二日詔諸
路常平司每歲秋成之際取見所部郡縣豐歉各及幾
分如有合賑糶賑給去處即約度所用及管米斛若干
或有闕少合如何措置移運並預期審度施行仍於九
月初旬條具聞奏 三年四月二十九日詔廣東提舉
依已降指揮作提舉廣南東路常平茶鹽公事禁銜八
月十八日詔提舉常平茶鹽官遇闕如文武臣提刑有

兩負去處令以官序兼權從江西提刑趙煜請也 八

年九月十四日詔自今諸路提舉官毋得輕授雖差替

人不得過一政兼須履歷有政績之人以待御史黃洽

言湖南提舉張仲梓未嘗更練喜怒任情仲梓既罷因

有是命 九年十二月五日前福建常平提舉周頡言

常平三弊一曰公吏非時借請二曰選人支破接送在

人錢三曰給散乞丐孤貧米乞下諸路將前後公吏已

借請錢依元豐令剋納五分官在錢數家止得就寄

居處保明幫請如紹興三十一年三月內臣僚所奏事

理施行至於支給乞丐人米則與申嚴行下責在提舉

常平司嚴行稽察將州縣違戾去處痛與換劾懲治從

之十六年九月十五日臣僚言常平所在樁管元有定數乞令各路提刑司刷出州縣所管常平見在之米其間或有少損則以陳易新須管及額樁留外有常平錢量支添糶以實廩庾如法藏貯無致移易從之嘉泰元年八月十四日臣僚言今歲夏秋之交雨澤稍愆諸路州郡間有旱歉雖未見申到被旱分數然度其事勢向去未免舉行荒政全仰常平使者究心民事預期措置竊慮間有常平使者年老昏繆全不事事或貪庸失職受成吏胥或素無風采人不畏憚今若付以一道之重俾之提振荒政必致誤事欲望睿旨明詣二三大臣相度被旱州郡精擇素有才望之人付以常平使者

之職自今在任有如臣前所陳者倘無顯過且於別路
兩易其任若或素無治狀已試罔功衆論之所不與者
令御史臺具名覺察即賜罷黜別選精力彊敏優於政
術一路官吏之所畏服者畀以是任庶幾官得其人民
無捐瘠從之 開禧二年三月一日戶部言大理正費
培奏竊見江西提舉置司于袁自紹興年始徙于撫本
州軍兵提舉司占破二百餘人衣糧借請悉倚辦于本
州去歲送迎提舉官前後凡五次每一次為費畧以借
請一項計之不下萬有餘緡況又有非時差出少者一
二十人多者五六十輩每名借請三月或半年皆從本
司先次充支續移文幫勘不踰畧刻便行解發叢爾小

郡坐受困弊將何以堪乞行下江西提舉司以撫州係
置司去處供億百費已是不貲特免差撥兵卒其破人
數却於本路十州軍分撥差使季一更代或有違犯聽
從本州行遣如遇迎送差使徑就各處借請庶幾免致
專困一郡可以少蘇民力從之

全唐文

宋會要

提舉茶鹽司 淳熙元年五月十六日詔浙西茶鹽司
幹辦公事二員內減罷一員可令復置專一往來諸場
措置催督鹽課及復置海鹽縣砂腰催煎官一員從提
舉葉謨請也 三年四月二十九日詔提舉東常平茶
事改作提舉廣南東路常平茶鹽公事繫御 六年八
月十八日詔提舉常平茶鹽官遇闕如文武臣提刑兩
員去處令以官序兼權 八年九月十四日詔自今諸
路提舉官毋得輕授雖差替人不得過一政須履歷有
政績之人十二年六月二十三日詔廣東西鹽事併為

一司應合得事件令吏戶部長貳同共條具聞奏已而
吏部尚書蕭燧等言罷廣東提舉一司改置提舉廣南
路鹽事司照昨來廣西帥臣詹儀之陳請且就梧州置
司專管兩路賣鹽序位在兩路轉運判官之下所有常
平茶事廣西依舊係提刑兼管廣東乞委運司兼管其
廣路鹽事司幹辦公事一員廣西路鹽事司主管一員
並改作廣南路提舉鹽事司幹辦公事今來併司委是
利便若只置幹官兩員慮檢察不及乞更添置準備差
遣一員詔並從之十三年三月知容州譚惟寅初除都
提舉廣西路鹽事 淳熙十六年九月十一日淮東提
舉錢端忠言竊見淮東諸處鹽倉支發袋鹽依元降指

揮每袋於客人名下收取別納袋息錢肆百肆拾文專
一應副鹽事官兵請受吏祿紙札船運脚乘等用季終
有餘起發赴鎮江府椿管近所以來添差鹽官不釐務官
請受於上項錢內支給泰州二十六員高郵軍一十六
員通真州六十三員每員月請百千上下積歲累月必
當侵耗鹽本詔特派差人且令終滿更不作闕差人

紹熙元年十一月二十七日廣南西路經畧安撫轉運
提刑司言照對提舉廣南路鹽事王先祖乞復置監石
康縣鹽倉及回環庫窠闕下吏部注識字小使臣逐司
照對石康倉係交收白石場發到鹽支付常運司般運
前去欽州武利倉及鬱林州都鹽倉交卸應副諸州府

般賣兼回環庫係收轉運司發到錢支撥應到車丁般
運鹽脚支用其所管錢鹽數目浩漭若從朝廷差注正
官監當守給委是便利從之 三年三月二十五日廣

東提舉趙不迂申廣州賣鈔庫都鹽倉開到收納客人
窠名錢數內每羅增收鹽斤錢三百文省照得自淳熙
十年四月一日二廣通行客鈔東路住賣鹽每羅增收
鹽斤錢應西路漕計至淳熙十六年一十月十六日指
揮罷都提舉廣東西鹽事依舊例給賣所有增收鹽斤
錢却仍前交納除已行下廣州都鹽倉日下住收鹽斤
錢却仍前交納除已行下廣州都鹽倉日下住收外其
多收到錢貳萬捌仟捌百捌拾玖貫肆伯省銀五十六

兩六錢乞並撥入鹽本錢文歷收附添助買納鹽貨支
遣客鈔詔廣東提舉司將上件錢銀一就認數椿管非
奉朝廷指揮不得擅行支用仍月具帳狀申尚書省
嘉定七年七月二十七日臣僚言檢照開禧二年內因
浙東提舉司幹官申請於慶元府温州各創置分司幹
官一員專一提督鹽倉收支點檢諸場買納至嘉定
六年內因白劄子陳述温州鹽課利害行下本司相度
本州自辟置分司幹官以後支發袋鹽較之經減新額
仍前赴辦不敷遂將原辟差幹官繼行者罷孰不謂宜
外有慶元府分司幹官事體一同當時議者偶不及之
遂得仍舊自創置及八年課額虧陷如故而一司吏卒

需索倉場騷擾亭戶不能安迹乞將慶元府分司幹官
照温州例特與省罷其已辟差人別與一等堂除近次
差遣仍劄下慶元府守倅湏管每歲登及元額如有虧
欠取旨責罰若措置增羨乞與旌賞照得浙西提舉司
嘉定四年內因臣僚申請乞做浙東體例創置司幹
官一員於嘉興府華亭縣置司蒙降指揮許於本路官
屬內辟差比年以來所辟本路官屬率為權要親舊所
得其挟勢騷擾弊亦如之併乞住罷或有場分職分廢
弛令行提督只於本司屬官內差委往來點檢措置施
行從之 嘉定十七年三月二十三日淮東總領所言
經費一月何啻陸拾萬緡鎮江務場認發幾半全藉發

賣茶鹽鈔引以應供億其兩浙鹽司確意指置不患課
入不登今來臨安平江紹興三鹽倉積壓鈔引壹拾柒
萬袋無鹽可支安得客人復來請買是致本所支遣不
給詔令三府帶行浙西江東淮東總領所主管茶鹽官
入銜到罷從本所批書庶得專意督辦

全唐文

宋會要 都大提舉茶馬司

自熙寧七年四月差太子中舍三司幹當公事李杞著作佐郎梓潼路察訪司准備差遣蒲宗閔相度成都市易務得旨令市易司經畫收買茶貨專充秦鳳熙河路博馬更不相度市易當年十一月權發遣三司鹽鐵判官公事提舉成都府利州路買茶公事李杞同提舉成都府利州路買茶公事蒲宗閔應買茶博馬州軍並令杞等提舉謂秦鳳階成熙河等路遂命杞與提點刑獄序官蒲宗閔與提舉常平序官後又令與轉運判官序官自後因之置都大提舉及主管同主管各因其資品

高下除授云 哲宗正史職官志都大提舉茶馬司掌
收摘山之利以佐調度凡市馬於蕃夷者率以茶易之
產茶及市馬州郡官屬得自辟置視其數之登耗以詔
賞罰 神宗熙寧七年六月二十五日熙河路經畧使
王韶言奉詔募買馬今黑城夷人頗以良馬至邊乞指
揮買馬司速應付從之仍令李杞據見茶計步乘般運
具已撥數以聞 七月八日中書奏勘會達涪州稅到
客茶不少詔宜令相度成都府等處收買茶貨李杞等
相度此兩州茶色額如可以應副秦州博馬即合如何
擘畫津般到得本處應副支用速具的確事狀以聞
九月十六日詔經畫成都府利州茶貨李杞買物帛應

副熙河路博買馬仍具所博買茶數以聞 十月十四
日太子中舍三司幹當公事經畫成都府利州路茶貨
李杞等奏與成都府路轉運司同共相度到於雅州名
山縣蜀州永康縣邛州在城等處置場買茶般往秦鳳
路熙河路出賣博馬 十一月二日又奏准朝旨於本
路出產茶州軍相度計置買茶津般往熙河秦鳳路出
賣勘會洋州集州興元府出產茶貨內集州近已廢罷
本處產茶不多難以置場收買外有興元府洋州廣產
茶貨自來通商興販乞與轉運司同共相度於興元府
洋州置場收買津般往熙河秦鳳路出賣從之 三日
詔李杞蒲宗閔並專令提舉買茶等事更不管幹三司

職事李杞於秦州蒲宗閔於成都府路逐空閑廨宇居住杞與提點刑獄序官宗閔與提舉常平倉序官 十一日詔戎州軍事推官張昌宜令流內銓就注充本司幹當公事其戎州推官員闕勘會施行仍令本司候將來任滿無過犯具勞績保明聞奏從李杞請也 十月十二日權發遣三司使公事章惇奏已差李杞等提舉收買川茶省司已應副本錢今更有事節今來乞於職位內稱提舉成都府利州秦鳳熙河等路茶場公事如向去事務繁多更合要官員幹當乞許本司奏差今來初勅置茶場官中本息錢數有限慮恐熙河路輒有侵使乞於茶稅息錢內每年認定四十萬貫應副熙河等

馬并糴買粮草餘外錢物並本司樁管從之 八年正月十九日李杞蒲宗閔奏準詔許同罪保舉無贓罪京朝官班行選人五員充本司幹當公事今已差新授秀州司法叅軍孫鼂牀充本司幹當公事本司差出諸路州軍幹當亦已令來遞馬支驛券從之仍令流內銓差注 二月二十日又奏乞差右班殿直段緘充本司幹當公事從之 閏四月二十六日中書門下言提舉熙河路市易司申明與提舉成都府利州奏鳳熙河等路茶場司有無統轄勘會成都府買茶於熙河路博馬元係都提舉市易司擘畫昨差李杞蒲宗閔前去相度遂就差提舉買茶即是熙河路市易司一事今相度其茶

場司合併入熙河路市易司為買茶稅場李杞蒲宗閔
合兼提舉熙河路市易司仍各依舊分頭幹當並隸都
提舉市易司統轄從之 六月詔三司具未置熙河路
買馬場以前買馬錢物歲支若干於是何官司出辦自
用茶博馬後如何封樁申中書取旨 八月六日提舉
成都府利州秦鳳熙河等路茶場公事兼提舉熙河路
市易司奏茶場司已併入熙河路市易司所有市易司
已與比部員外郎汲逢等同共幹當及連銜申發文字
其諸州茶場亦合令汲逢於御位內添入同提舉成都
府利州秦鳳熙河等路茶場公事並隸都提舉市易司
協力幹當從之 二十三日權發遣三司鹽鐵判官提

舉成都府利州秦鳳熙河等路茶^場稅言賣茶博馬乃
是一事乞同提舉買馬歲以萬五千匹為額詔杞兼提
舉買馬且以二萬匹為額候二年取旨杞以為數多再
詔以萬五千匹為額十一月十六日中書言川茶元
法於茶稅并息錢內歲認定應副熙河博馬及糴買糧
草乞令提舉買茶官歲給熙州岷州大竹并洋蜀州茶
各三百駝以為應副市糴於茶場應副糧草數內除割
從之九年四月二十三日都提舉熙河路買馬司言
監牧司闕乏見錢^欠市易司錢物而市易司欲俟還足方
肯應副買馬遙相推倚實誤博馬日用欲乞馬價盡用
茶貨折之若馬客願貼錢就整請茶者亦聽候所貼見

錢數多即許與茶兼支庶幾公私兩利其年額博買茶
貨乞令茶場相度合用數支撥與四場候數足然後以剩
數撥與轉運司糴買糧草從之 十年九月二日詔提
舉成都府等路茶場司李穰乞應干本司職務措置申
請辭訟等事他司毋得干與如處置有屈抑許經歷司
申理從之 四日詔提舉成都府利州秦鳳熙河等路
茶場司更不隸都提舉市易司亦罷兼秦鳳路市易司
十月二十八日詔茶場司許不依常制舉辟勾當公
事官三員 元豐元年四月七日提舉成都府利州秦
鳳熙河等路茶場公事李稷奏議者常言茶價高大國
馬過絕臣以謂博馬官司既不用責茶自當以銀帛和

市往時劉佐定熙河名山茶每駝直三十七貫省呂大
防用慕容允滋價減為二十五貫一百六十省然去冬
民間且二十七貫足由是觀之劉佐知增而不知減呂
大防知減而不知增是皆立法不能變通今且畫一起
請一諸出賣官茶令提舉茶場司立定中價仍隨市增
增減應增減者本州本場體訪詣實增訖申茶場司本
司為覆按若後時及妄謬不實並隨事大小奏劾施行
應減者申茶場司待報一臣竊詳茶法官利在價高以
得厚利處之無術而并與法壞者劉佐是也買馬官司
利在茶價低價低則蕃部利厚而馬有可擇近蒙朝廷
已立對行交易法銷去買馬官司爭價之弊臣不復論

列臣以謂既許隨市色增竊恐逐州止務添價却致賣茶數少須立定每歲課額及酬賞格法使人人赴功則事務不勞而辦今勘會熙寧十年賣茶倍於常年欲立條下項諸博馬場所用茶秦州額熙寧十年支賣茶五千九百二十四駝今定六千五百駝熙州額熙寧十年支賣并博馬共一萬三百七十九駝今定一萬九百駝通遠軍熙寧十年支賣并博馬共六千九百六十駝今定七千六百駝永寧寨熙寧十年支賣并博馬共七千九十一駝今定七千五百駝岷州熙寧九年賣并博馬共三千九百四十六駝熙寧十年賣并博馬共三千三百八十六駝今定賣并博馬共四千駝並從之 五月

二十一日提舉茶場李稷言三路三十六場大小使臣
殆及百員乞不限員數舉三班使臣詔從之內歲舉官
十員候三年茶法成序取裁 六月十一日提舉成都
府等路茶場蒲宗閔言乞依李稷舉勅官吏詔宗閔與
理轉運判官資序比李稷所舉人三分之一其州縣官
吏於茶場司職務有違亦許按劾 九月十六日李稷
又奏已降指揮般茶鋪令提舉茶場司選三班使臣一
員具名奏差今選到三班奉職楊廣乞差充巡轄秦鳳
興利般茶鋪填瓶置闕從之 二年四月二十五日三
司鹽鐵判官國子博士李稷奏臣檢會茶法元條每年
收息稅四十萬貫應副博馬及糴買糧草續準朝旨盡

數應副博馬以其餘助轉運司往時所收息稅不能敷辦元額止隨手支充博馬本息畧盡近準條與買馬司對行交易以此本司錢物出納分明緣前後條貫各經衝改更無合應副轉運等司年額定數臣竊計三路官茶稅錢茶場司既以通認十五萬貫即諸州出入所得盡係茶場司年額往時轉運司亦曾應急申請支過茶稅錢致本司所認歲入頗成散落竊恐因循寢越常守欲乞自今後於年額息稅內歲以五萬貫給轉運司餘悉待公上詔用取進止合入提舉成都府利州秦鳳熙河等路茶場司敕從之五月十三日詔右贊善大夫同提舉成都府等路茶場范純粹序官廩給人從視提

舉常平官薦舉官分李稷之半別給都大提舉茶場印
付稷聽稷純粹同轉運司舉官知洋州並從稷請也
三年十二月二十五日詔提舉成都府利州秦鳳熙河
等路茶場公事官每年合舉官三分減一李稷等蒲
宗閔每年合舉京官三人縣令一人使臣陞陟三人同
提舉陸師閔舉京官一人縣令一人使臣陞陟三人
四年五月十二日陝西府路轉運使都大提舉茶場李
稷言臣典領茶法五年選辟官屬同心一力奉宣條詔
令所差諸州官罷滿及期乞本司自今奏辟雅州漢州
知州印彭利州通判名山永康綿谷順政知縣所貴維
持法度久並不懈詔如轄下官弛慢令茶場司奏易劾

罪以聞

七月九日奉議郎權發遣羣牧判官公事郭

茂恒奏臣近準詔訪聞陝西轉買蕃部馬并斛斗所用
錢物不如蕃部所欲致收買數目不多差臣相度若專
以茶博馬以綵帛博糴斛斗及將茶場買馬併為一司
如何措置可以經久施行詳具畫一聞奏臣於本路體
訪得蕃部所欲大抵惟茶為急自來將馬中官請到折
價銀絹等只是將三二分歸蕃其餘往往却赴茶場博
買茶貨其買馬司所支銀絹絹等又例各折價高大茶
場却只依市價量添些小錢數博易其鈔亦隨時各有
虧損約計一匹馬價虧蕃部錢多者至四貫以上是以不
如所欲致買數不多及少肯將好馬入塞臣今相度若

少者亦三貫以上

專以茶博馬委是利便兼勘會舊日亦是用茶充折馬價雖兼用金帛等亦從其便自事局既分祇於近歲已來專用銀絹及錢鈔等不復用茶况賣茶買馬事實相須今若將提舉買馬官通管茶場不惟職務相濟兼蕃部得茶如其所欲中國可致多馬以充戰騎實為兩便所有博羅斛斛勘會見今熙河等路諸司各置場博羅或用見錢或用茶或用鹽鈔等各從蕃部之便今若專以絲帛博羅緣其間亦自有願要見錢或茶之類者臣今相度欲乞兼用絲帛博羅謹具逐項措置經久可以施行畫一如後一蕃部將馬中官其價錢並以茶充折約計每馬一匹支茶一駝如馬價高茶價少即將餘數

以銀絀絹及見錢貼支內銀絀絹並依逐處在市見賣
實價紐折不得有虧官私其見錢仍計每匹價直不得
過十分之一如不願請銀絹等只願以餘數筭請零茶
亦聽從便如馬價少茶價高即許貼錢請茶或合併就
整請領或據錢數筭請零茶貼黃稱以上件馬價若支
一分見錢每年約用五萬餘貫提舉買馬司逐年有收
到雜支租課內贓等錢約六萬餘貫可以應副支用一
蕃部牽馬赴場候揀中據合請茶數限當日出給關子
赴場請茶畫時支給所有願貼請銀絀絹及見錢等只
就買馬場亦限當日支給已上如稍稽滯干繫官吏並
從嚴斷一今來所支博馬茶並須取蕃部情願不得押

勒一今來買馬額數已立定每年二萬匹委提舉司拋
降與逐場認數收買仍於額外廣謀收市候至歲終會
計賞罰其額外買到數仍比額內合該賞典優與推恩
每年具數比較聞奏貼黃稱臣近與提舉買馬司同共
會計到每年本息錢共五十五萬六千八百八十八貫
六百一十八文省計合買馬二萬一千三百二十八匹
今來既不用鹽鈔其納絹又依市價從蕃部即更無合
收息錢只有本錢并收地租課等共四十九萬六千三
百三十五貫五百八十七文紐算只合買得馬一萬九
千三百六十五匹今定二萬匹為額少着錢二萬三千
餘貫已據數於賣茶息錢內除破其自來所收息錢只

是有賣出字馬等合收息錢數亦不多一自來德順軍階州所買馬不係年額數內見今支折馬價亦用銀細絹等臣今體訪得階州賣馬蕃部亦是多願要茶今已并依熙州等場定到新例外德順軍多是側近淺蕃將馬中官不願請茶兼本軍亦無賣茶場只是於稅務寄賣數目不多今只及時將本軍見支折馬價除見錢依見行則例更不增損外其細絹銀等並依市價紐算支折仍聽從便請領

內階州貼支細絹自依舊以川小細絹

充之貼黃稱德順軍買馬係於陝西年計一萬五千匹外添買今來既將買馬錢本盡數會計立定新額其德順軍亦係支用買馬司錢合將本軍所買馬收入年額

令提舉司給與熙州等場一處拋買仍令廣謀收市一
以提舉陝西買馬監牧兼同提舉成都府利州秦鳳熙
河等路茶場司為名一茶場司息錢年額萬數浩瀚買
馬錢本數亦不少各存舊額以備鈎考今欲乞將朝廷
所給買馬絀絹除蕃部願請外并鹽鈔租課並委本司
同共擘畫變轉移用候歲終將實收到錢數與見錢并
支博買茶數各行計會如支過茶數多買馬錢數少補
償不足即於茶場司事提舉買馬監牧官並通管一提
舉茶場買馬官資任坐次相壓及諸般請給當直人等
事並各依舊條施行一臣今體度得自來蕃部將斛斛
入漢界見今沿邊州軍諸官司收糴所支錢物不一如

轉運提舉常平倉司多用見錢茶場只是用茶經制司
多用鹽鈔已是各從蕃部之便臣今相度乞將紬絹與
茶相兼博糴斛斗並從之 十二日詔雅州名山茶今
專用博馬候年額馬數足方許雜賣 十八日中書門
下奏據提舉成都府利州秦鳳熙河等路茶場司幹當
公事官五員未有印記乞下少府監先次鑄造銅記五
面並以提舉茶場司幹當公事朱記一十一字為之如
降送本司責憑給付逐官行使從之 八月二十一日
奉議郎新差專切提舉陝西買馬監牧兼同提舉成都
府利州秦鳳熙河等路茶場公事郭茂恂奏下項事一
臣近相度茶場買馬併為一司元奏請畫一條件內一

項乞將朝廷所給買馬紬絹等除蕃部願請外并鹽鈔
租課並委本司同共擘畫變轉移用今既蒙朝廷專以
馬事付臣兼領茶司緣提舉茶場官不兼買馬之職故
條約事件尤須明具今來雖專以茶博馬其錢帛等亦
須寬作計置應付臣昨會計每年馬價內支一分見錢
約數只是將買馬司合得錢紐筭自可應副得足租課
收歛有時內贓錢散在陝西諸州軍或後用未至即恐
須要鹽鈔就買馬變轉見錢應副支用其紬絹既許將
馬價零數取情愿貼請亦未能便見的實合用數目兼
朝廷改法本要致馬之多已將紬絹依市價折筭若蕃
部有願要多請紬絹者須其所欲如此則一歲所支未

易預計臣今欲將買馬錢帛等先委買馬司移用逐旋約度餘剩之數節次關報茶場司同共變轉無昨會計立到買馬年額二萬匹盡計馬司錢物實數已有不足若至歲終會計除本色支用外見在之數並合撥歸茶司充茶價錢即於歲初川路紬絹未到及收積支撥鈔錢未備新陳不相因之際買必致闕用欲乞每歲終會計後許馬司却於茶司交撥過錢物內借撥應副支使於年內據撥還所有昨會到每年買馬少著錢二萬三千餘貫乞於賣茶息錢內除破只是約度計筭到數緣逐年收買馬數不足如向去支過價錢多並合據數除豁一臣竊聞朝廷已降指揮名山茶專用博馬候年額

馬數足方許雜賣此有以見陛下留意馬政之切至也
今蕃部所欲茶大抵多欲名山一色然亦時有願得其
他色額如大竹洋州之類者竊恐茶場司為有今來朝
旨不敢兼用別色臣今欲乞特賜指揮除名山茶依前
降朝旨外如蕃部有願請其餘色額茶者亦聽從便並
從之 十月二十七日提舉陝西買馬監牧同提舉成
都府利州秦鳳熙河等路茶場司奏準詔買馬價錢仰
依條畫時支給又詔令經制熙河邊防財用司指揮許
令弓箭手依官價自買及格堪披帶馬赴本司呈印訖
給付買馬場當日支給價錢仍充買馬司年額之數本
司歲額所入見錢不多欲乞今後弓箭手自賣到馬價

錢許以茶及銀細絹見錢相兼支給所貴易為應副支用從之 十一月二十五日中書劄子提舉成都府利州秦鳳熙河等路茶場司奏準朝旨名山茶專用博馬候年額馬數足方許雜賣又餘色茶如蕃部願請亦聽博馬支用即不妨茶場司出賣竊緣本司年額課利浩大只熙河一路逐年椿認應副錢二十萬貫及非泛支撥在外諸雜茶色變轉絕少全藉出賣名山茶起辦若伺候馬足雜賣監牧司買馬必是年終數方足備纔及歲首又須却止住出賣應副博馬如此則本司無有貨賣名山茶之期今來雜色茶亦博馬即本司買賣左右為法所拘竊慮收趣課利不足有悞支用兼蕃部出漢

買賣非只將馬一色興販亦有將到金銀斛斗水銀麝香茸褐牛羊之類博買茶貨轉販入蕃若不令本司旋行出賣即蕃客別買物貨不惟大段虧失本司財利兼名山茶却有積壓買馬蕃部未必盡皆要茶次下等一匹馬價自不及茶一馳之直大約每歲不過用茶一萬五六千馳乞賜指揮除依今來朝旨諸色茶亦聽博買不妨出賣外名山茶亦乞責辦本司應副博買年額管足所有餘數並許出賣貴得兩司各不妨闕詔從之以上續國朝會要

元豐五年二月十八日提舉陝西買馬監牧兼同提舉成都府利州秦鳳熙河等路茶場公事郭茂恂奏奉聖旨陝西逐路諸軍關馬至多仰臣具

合如何擘畫可以招誘蕃部廣行收買支填得足速具
事理聞奏一勘會熙河路州軍各有蕃官如包順包誠
趙純忠之類並是近上首領蕃部素所信服其勢力足
以招致蕃客乞賜敕書令各官誘誘蕃部販馬入塞每人
且令結買五七百或一千匹仍乞委自逐處守臣丁寧
慰諭之或要預借茶絲仍乞應副支借約定期限如能
招置數足即乞量賜恩獎歲月之間必有成效一體問
得舊日券馬上京馬價甚高每匹大約不下三十貫而
茶價其初頗賤每馳不過十二貫今則馬價減於舊日
茶價倍貴於前緣蕃客往來販易須有所得乃肯趨利
而來臣今相度若將博馬茶比之用錢及別物貨博買

者別為兩等其博馬茶量減錢一貫已來如此則蕃部自然多販馬入塞矣若以謂稍虧茶價緣賣茶之息甚大馬來既衆則售茶亦多茶價高即馬來者少不若稍減以致多馬是其實無損也一自來買馬自四赤七寸至四赤一寸七等中各以一寸為差而價錢自三十二貫至十六貫其等第差降少者祇一貫三百文多者至五貫一二百等量之際蕃部以爭較等第分寸不肯中賣謂如四赤四寸馬二十七貫三百文如有虧分數須作四赤三寸收買價直二十二貫二百文即是寸爭一寸便較錢五貫二百文價直相遠往往不肯作四赤三寸中賣臣今相度欲乞將諸等價衷合重行均定使相

較不致絕遠如此則易於收市兼勘會熙岷秦州馬價
並合一般其蕃部就秦州中賣比熙岷州遠七八程有
芻秣裹糧之費欲乞因今來均定馬價於逐等內將熙
岷州各減五百文秦州各添五百文所貴稍得均當一
勘會自來依條每月將門戶蕃部勾招到中官馬數比
較最多者支與絲一匹銀碗一隻重半兩自來不計馬
數多少只取最多者一名支與臣今相度乞重別立定
每月勾招蕃馬中官及一百匹已上者不限人數並各
支與上項例物如月各不及百匹即取一名最多者支
與絲一疋銀碟子一片重二錢所費錢物不多而有所別
異可以激勸蕃部兼舊條蕃部中馬其賣馬蕃部並給

酒二升自來只是紐計價錢支給相兼既久祇與馬價
一家請領不復知有犒設之食今乞除依自來條例外
委逐州長吏每旬於中馬稍多日分量給酒食犒設賣
馬蕃部亦足以使遠人知朝廷之意樂於致馬入塞詔
所乞預借茶絹恐致失隘外餘並從之 五月二十四
日朝散郎同提舉茶場公事蒲宗閔奏臣伏見今來新
開拓蘭州定西城與通遠軍熙州隣近蕃部所嗜略同
體問得川茶亦可博賣近經制司奏新添城寨費用增
廣令添助歲額錢十萬貫今欲擘畫津般茶貨往蘭州
定西城委監酒稅官兼管漸次貨賣就近添助不得公
私興販往彼候見次第即依熙州通遠軍等處先得指

揮例擘畫差官置場其餘約束並依本司條貫施行從之同日同提舉成都府等路茶場蒲宗閔言成都府路產茶縣及利州路興元府洋州已有權法今相度巴州等產茶處亦乞用權法從之六年正月十七日同提舉茶場公事蒲宗閔奏監牧司新條乞買馬錢帛等先委買馬司移用等事欲乞將博馬茶價錢物不須先令馬司移用其馬司若額外更要錢物乞令申奏本司於息錢內正行支借批送兵部檢准元豐元年正月九日指揮仰羣牧司關牒行司據所要茶以錢帛對數交易不得預行指占致妨滯茶場司歲額又元豐四年八月二十一日郭茂恂奏乞將買馬錢帛先委買馬司移用

逐旋約度餘剩之數節次關報茶場司同共變轉每歲
終會計後計馬司却於茶司支撥過錢物內借撥應副
支使於年內據數還本部看詳乞依元豐元年正月九
日指揮所有元豐四年八月二十一日條例更不施行
從之 四月三日同提舉茶場公事陸師閔奏伏自買
馬司兼領茶場而茶法不能自立蓋有所藏既專以多
馬為務而又得與茶事則其勢不免於取此以益彼如
貢馬司用茶並乞依舊條以錢帛對數交易仍不許別
司取撥茶貨詔令蒲宗閔陸師閔共同詳具利害奏聞
同日提舉成都等路茶場陸師閔言文州與階州接
境有博馬及賣茶場龍州舊 通商乞以文龍二州並

為禁地其秦州本司差官一員造帳計置川路羨茶徧
入陝西路出賣仍於成都置博買都茶場從之 五月
三日提舉陝西買馬監牧司奏據階州申元買馬蕃部
請大竹茶每駝一十四貫六百四十文所有近茶場司
每駝添錢五貫三百六十文近累申上衙只每駝減錢
一貫文為茶價高大買馬不行本司看詳階州茶價添
起錢數其馬價若只依舊恐蕃部不肯將馬中賣須致
量增馬價詔只依舊價如蕃部不願請茶並以見錢物
帛收買 六月七日兵部狀勘會提舉陝西買馬司郭
茂恂奏內一項節文臣昨於去年中奏乞將博買茶比
見錢及物貨博買者每駝錢一貫文即蒙施行緣今來

茶價比之日前增數至多又添長不已而買長價如舊
所較數日相遠殊甚臣今相度若欲稍添馬價緣一增
之後難復減損而日後它物價平腳費稍少則茶固應
可減不若只將茶價減數博買所貴他日易於裁損可
復如舊臣今欲乞權將應係博馬茶每駝量添色高下
及馬等第參酌於見折價上更與減一二貫以來仍從
本司相度隨時增損候向去腳費漸少茶價稍減即依
舊每駝祇減錢一貫文所貴蕃部可販易於招誘竊恐
茶場司以減錢數多仍乞從依前降旨減價錢外今
來所減茶價錢本司管認別作項次撥還如此則自不
虧損茶司財利詔提舉買馬司更不兼茶場司其博馬

茶每馳比見賣價更與減二貫文所減價更不撥還許
理茶場司課息所有買馬司用過茶價限歲終撥還取
足不得拖欠 二十二日提舉成都府等路茶場郭茂
恂言昨準詔專提舉買馬兼提舉茶事而茶場司不兼
買馬既不任責遂立法以害馬價每馳有增十餘千者
恐蕃馬歲不入上悞國事乞併茶場買馬為一司庶幾
茶司同任買馬之責 降旨 關 閏六月十二日吏部狀
準都省送下提舉成都府利州陝西等路茶場司奏乞
秦熙河岷階州通遠軍永寧寨茶場並乞令本司不拘
常制踏逐諸曉事法有心力京朝官選人小使臣奏乞
差充監官本部檢會聖旨內外官司舉行悉罷今來係

是本處創有陳請合取自朝廷指揮詔特依 十三日
提舉茶場公事陸師閔劄子奏竊見新修茶場司敕尚
未全備擇出合行通用條貫三十八件內有於新法干
礙者略加刪正下項諸提舉官於轄下官吏事局相干
同按察部內有犯同監司諸提舉官點檢職務公事杖
已下罪就司理斷事合推寃者送所司徒已下依編敕
監司點檢法諸路茶法職務措置詞訟刑名錢穀等公
事除州縣施行外合申明者申取提舉司指揮施行他
司不得干與雖於法合取索文字並關牒提舉司施行
不得專輒行下諸處亦不得供報如已經處置尚有抑
屈者許以次經轉運提刑司申理諸幹當公事官川路

二年陝西二年半為一任選人願三考者聽從便供給

依廨宇所在州簽判例州無簽判依職官例京官以上

及大小使臣各隨本資添支本資無添支者依監一萬

貫場務例給諸幹當公事官闕無所承許不拘常制選

差轄下官權充其餘應合差官幹事並依編敕差官依

條行諸紙筆朱墨油燭皮角以係省錢收買在京申省

支給諸文字往還並入急腳遞從之全文見茶門十

月八日戶部狀提舉成都府利州陝西等路茶場司奏

檢準元豐五年二月十八日朝旨郭茂恂奏博馬茶量

減錢一貫已來竊詳元無指定減過錢數合令是司

分管認明文今來未審令買馬司據減過茶價錢數檢

還本司或只亦依今降朝旨指揮於本司課息錢內豁除本部今勘當欲將元豐五年二月十八日後來至今年二月終已前減過茶價錢並依今年六月七日朝旨更不令提舉買馬司撥還許理為茶場司課息從之十一月八日詔都大提舉成都府等路茶場朝廷特以增廣權賣路分所以改置司名其將事之人責任雖淺不可不隨宜假借事權宜令與轉運使叙官後詔都大提舉視轉運使同主管視轉運判官經制熙河蘭會路邊防財用司準此九日都大提舉永興運等路權茶公事陸師閔奏請事件于後一本司舊於成都府秦州兩處置司各有解字人吏等今並乞依舊仍於兩處各

置管幹文字官一員許不依常制奏差承務郎以上或
選人充仍並依幹當公事官條一幹當公事官見管七
員內二員係奏差五員係吏檢差今乞許本司不依常
制奏差所有吏部已差下未到任交割者亦乞別指名
奏差替換其接送當直兵級及不許赴妓樂筵會等事
並乞依轉運司管幹文字官條一每年奏舉選人改官
舊條通計合舉九人欲乞特添三人外有縣令小使臣
陞陟員數只依舊條併舉一本司舊支頭子錢七百貫
充公使今乞特添三百貫每年共支一千貫文一公使
合用酒欲乞隨所至州縣那兌支用以米麴工價算還
通計不得過合造酒數一本司今來赴闕依例添差等

分三人各使遞馬及擔擎文字兵士五人遞鋪七人乞
今後遇赴闕及出巡並依此施行一本司舊條提舉官
與提點刑獄序官同提舉官與轉運判官惟都大提舉
官元係陝西路轉運使兼領未有明文詔特令與轉運
使序官餘並從之 十二月十二日守監察御史張汝
賢奏定奪郭茂恂蒲宗閔互論公事因兩司執議橋
茶價之法至今未定遂相度立為酌中之法以息紛紜
今準朝旨送陸師閔相度聞奏臣勘會師閔今年中嘗
具劄子上殿奏乞馬司用茶依舊條以錢帛對數交令
與蒲宗閔同其利害聞奏亦用前說同狀奏聞此二人
之議固已符合臣詳究兩司利害博馬之利實仰於茶

而茶司運致茶貨自秦隴以西惟以顧貨脚乘為患不
以出賣不行為患借令馬司不為支用蕃部亦必以他
物博易實無損於歲課此茶司之利所以無仰於馬司
然欲其法度相濟可以經久實在朝廷參酌而行之今
止令師閔相度誠恐尚執前議祇求自便不顧馬司之
害則行之將來未免牽制臣契勘近年買馬冬季常多
夏季常少春季多少不常蓋馬性宜寒而畏熱其來多
寡不常待用之茶宜亦有別臣愚見竊謂可令逐季首
樁定名山茶駝春秋各三千各加一千夏減一千餘茶
量數樁留若買到馬多更要支用仍委茶司畫時應副
所支茶價並限次季還足庶為酌中之法兩得順便中

書省劾會蒲宗閔據張汝賢定奪到與郭茂恂互奏公
事多有不當以茶法推行之初宗閔能協力主辦職事
不為異論所搖特免劾除都官郎中今年十一月二十
五日得旨郭茂恂依赦放其張汝賢相度到椿定博馬
茶數等事令陸師閔相度聞奏詔張汝賢前奏先次施
行其今年十一月二十五日令陸師閔相度聞奏指揮
更不施行 七年五月十七日戶部言都大提舉成都
府永興軍等路權茶司奏利州路買馬事件內一項有
今來添額買馬合用茶貨乞指揮茶場司於洋州興元
府應副本司劾會若洋州興元府額外應副買馬司茶
般赴文州支用則是通商低價茶侵入禁地有害茶法

今相度乞許令本司就近於文州茶場見賣茶內支撥
應副買馬除轉運司舊額茶只用洋州興元府元價並
雇腳錢數計算歸還本司外有添額買馬合用茶并舊
額茶內虧少錢并乞依例計算理為本場課額本部看
詳欲乞依本司所奏從之 十一月二十二日都大提
舉成都府永興軍等路權茶公事陸師閔劄子諸巡轄
般茶鋪使臣請受當直兵士並依巡轄馬遞鋪例出巡
給遞馬一匹每歲比較如無住滯工限及逃死兵士不
及五釐任滿與減一年磨勘先次指射家便差遣從之
十二月十一日兵部奏陝西買馬司自熙寧十年差
官買馬歲以一萬五千匹為額至元豐三年每歲常買

及數其時馬價聽用茶并雜物從蕃部所便相兼折還
唯茶依市價外其雜物各有量增息錢歲收六七萬貫
至元豐四年郭茂恂乞蕃部中馬專以茶充其餘數仍
許見錢物帛內物帛止依市賣實價紐折並不收息遂
增立年額為二萬匹至五年八月滿一年止買及一萬
四千七百餘匹又至六年八月并閏月計一年有餘又
止買及一萬六千一百餘匹至今年八月又滿一年合
行比較約僅買到一萬二千匹比之前二年其數愈少
各不增及新額本司累奏稱收市不行乞差官詢採參
酌裁定并乞前來奏稟蒙朝旨令具到利害大抵皆以
茶價高及別司買馬價高為說本部看詳自元豐四年

後雜物既用實估及折馬茶比見賣市價每駝又減錢
三貫已是暗增馬直然其所買馬不惟不及新額亦不
能過舊額所買之數乃是每歲陡失利入不少又買馬
額數漸虧望賜詳酌指揮參考新舊應干買馬事件利
害措置施行詔陝西買馬撥隸經制熙河蘭會路邊防
財用司仰本司先具合行事件畫一聞奏候至來年下
半年交割管幹 八年二月二日戶部狀都大提舉成
都府永興軍等路權茶公事陸師閔奏近準朝旨許令
本司於文州茶場見賣茶內支撥應副買馬竊緣本司
應副買馬茶既已理為課額即轉運司所還舊額茶價
及顧腳錢並在定本之外難以逐時增添收係乞據逐

年還到錢數依川路食茶錢條限分數於陝西路封樁
委是允當本部欲下權茶司同所屬轉運司相度聞奏
奉詔依今送下權茶司奏具其錢僚屬本司所管即與
利州路轉運司別無干預難以同共相度本部乞依本
司元奏事理施行從之 十一日戶部狀都大提舉成
都府永興軍等路權茶司奏準敕陝西買馬監牧司相
度到文州買馬利害一乞將買馬紬絹綾茶之類令買
馬官專管本司看詳欲乞令買馬官親管折博支給外
依舊令職官兼管幹折博場文厯倉庫支收出入等事
於本司茶法別無妨礙一乞今後茶場司合應副本路
博馬茶數並令文州茶場以洋州等處茶應副如買馬

數多額外更合銷物色並乞許令本司預行計度下應
副官司依數即時應副看詳買馬司所乞文州茶場應
副茶事已準朝廷令本司就近於文州茶場見賣茶內
支撥應副買馬除轉運司舊額茶只用洋州興元府元
價并雇脚錢數計算還本司外有添額買馬合用茶并
舊額茶內虧少錢數並依例計算理為本場課額本部
欲依相度到事理施行從之 七月十日兵部狀成都
府利州路經制買馬司奏今相度黎雅嘉州買馬博馬
合用茶數除舊額買馬茶令於雅州官場收買外有新
額買馬合用茶數欲乞依利州路已得朝旨體例令權
茶司於就近場務支撥應副仍理為權茶司課額尋下

權茶司相度如朝廷許令本司應副並須於春初指定的實合用斤數關本司支撥如支用不盡即不許減退本部欲依所乞施行從之 九月十八日詔陝西提舉買馬監牧司及成都府利州路買馬司並令提舉成都府永興軍等路權茶公事陸師閔兼提舉仍舊用茶貨隨宜增減價直相度穩便置場去處計置博馬候及一年具買到實數並應有合措置事件令詳具畫一聞奏所有先降陝西監牧公事撥令陝西路轉運司管轄指揮及陝西買馬撥隸經制熙河蘭會路邊防財用司并成都府利州路買馬指揮並更不施行 哲宗元祐元年六月九日相度措置熙河蘭會路經制財用司事

所奏提舉權茶司於本路買馬歲額萬數不少其買馬
場并綱馬上京所歷州塞支過經制司支計案草料並
係輟郡邊計應副緣本路與內地州軍不同經費既多
蕩粟倍貴豈任他司侵用緣權茶司以茶博馬每茶一
駝收頭子錢三百文係專庫均分竊詳買馬場所用博
馬茶場專庫於此無功輒享其利實出僥倖乞應副買
馬場并綱馬上京支過本路糧草等歲終計數令權茶
買馬司以上項頭子錢撥還如不足更以茶頭子錢貼
支從之 十月十七日都大提舉成都府等路權茶兼
陝西等路買馬黃廉言按元豐六年閏六月十三日并
八年十二月七日朝旨應緣茶事於他司非相干者不

得關與設使緣茶事有侵損違法或措置未當即未有
許令他司受理關送明文深恐民間屈抑無由申訴乞
止依海行元豐令監司巡歷所至明見違法及有詞訟
事在本司者聽關送應緣馬事亦乞依此從之 四年
二月四日吏部狀都大提舉成都府利州陝西等路茶
事司狀通年於雅州名山縣買茶數目浩瀚應副沿邊
博賣其知縣并昭化依政德陽巴西雄縣各係裝卸雇
脚去處若省部依名次差人前來萬一不至得力無由
改易乞許本司奏舉名山依政利照化等緊切處知縣
三員外有巴西德陽雄縣職事差少只乞許本司舉官
一次詔雅州名山邛州依政利州昭化知縣許奏舉外

餘從吏部差注 紹聖元年閏四月九日樞密院言買馬歲額錢約五十餘萬貫自開拓熙河運川茶易戰馬其後官司務在收息趣賞不以國馬為急至高增茶價盡折馬司錢鈔尺帛以充本司之息緣運茶市馬共是一司均為朝廷之物請自今一切官為收市上駟不過用茶三兩駝而聽民以錢請買於官則實息自倍旬外無賣盡令計綱上京以供良馬之用詔大僕寺相度六月十日都大管幹陝西等路茶事師閔奏伏見買馬用茶博易每以茶價增長侵費買錢物為害竊緣茶事司歲課浩大其費茶之數多而博馬之用少不可以博馬之數減損賣茶價直捐棄厚利乞應用茶博馬並依

見今所行條法外每歲將未增茶價以前一年內買馬
逐等實價立為定額會計支破買馬司錢物外有增起
茶價並令茶事司於所收稅息錢內支破從之 二年
四月二十二日都大提舉成都府利州陝西等路茶事
兼提舉陝西等路買馬公事陸師閔奏陝西賣茶買馬
比較賞罰素有成法今來券馬初行已見得沿邊州軍
買賣各與前日事體不同蓋販馬客人多是就便入錢
買茶結券如前日沿邊人納見錢十餘萬貫並於秦州
茶場筭請又如熙岷通遠馬場歲額不少今來客人多
就秦州結券則諸場必虧舊額凡此之類並因改法使
然即不係於官吏能否竊慮歲終比較賞罰有所不均

乞應今年茶場馬場比較課額並委都大提舉茶事司
及提舉買馬司詳具逐處增虧因依奏裁仍候法行就
緒別立條貫聞奏從之續通鑑長編宋哲宗紹聖二年
八月辛卯朔散郎直秘閣都大提舉成都府利州陝西
等路茶馬陸師閔權陝西路轉運使仍兼領茶馬事

三年八月八日樞密院言太僕寺考會紹聖元年二月
綱券馬死損分數綱馬死者不止十倍今復行券馬係
陸師閔建議其効已見陸師閔特賜銀捐各一百匹兩
仍令學士院降敕書元符元年九月二十八日都大
提舉成都府利州陝西等茶事司申準批下利州路轉
運司申檢準元豐元年二月十二日敕文州年額買馬

五百一十一疋又準元豐八年十二月十五日敕成都府利州路買馬錢並依未置司以前舊額匹數合用錢物令逐路轉運司應副外有不足並於權茶司稅息錢內支破後準元祐七年八月二日敕管幹茶事閻令奏準敕買馬錢本舊額令轉運司應副外有不足並於茶事司息錢支破今來川路已罷權除收致錢外更無諸般課息恐應副買馬闕悞以前額外買馬支過錢數今茶司更不撥還今後逐年買馬錢仰成都府利州路轉運司均敷又準紹聖元年八月二十七日敕文州添額買馬合用茶令轉運司算運元買茶價并雇腳錢近準紹聖四年二月二十五日敕提舉茶事陸師閔奏復行

權買川茶依元豐法不許通商本司勘會文州舊額買馬逐年額外合用錢數目並係茶事司於稅息錢內應副後來關合奏請為罷權川茶後來關少課息所以令轉運司均認本司自承準上件指揮後來至紹聖三年終買過額外馬支過馬價並生料等見取會元價撥還本路財稅歲入有限應副不足自均認後來拖欠萬數不少尚未有錢撥還今來已準敕依舊禁權川茶其茶司歲入課息等錢自可敷足舊額應副買馬之費所有元祐七年八月二日并紹聖元年八月二十七日指揮理合更不施行自紹聖四年二月二十五日指揮後來合依舊令茶司管認外有未降復權川茶日前均認過

數目乞漸次撥還送都大提舉茶馬司相度申樞密院
勘會昨準朝旨永興廊延環慶三路復為禁茶地分後
來出賣川茶倍多並於興元洋州收市應副即目大段
闕少錢本支使本司令相度欲將未準紹聖四年二月
二十五日復禁川茶日前合還本司茶錢乞嚴責日限
撥還應副茶本急闕支用所有自復行禁權川茶日以
後利州路買馬錢本並從逐司依元豐年條法應副申
聞事小貼子稱所有成都府路黎州買馬錢本亦乞依
此施行從之其去年二月二十五日以前轉運司錢限
一年撥還 三年九月二十七日 徽宗即位未改元都
大提舉成都府利州陝西等路茶事兼提舉陝西等路

買馬公事程之邵申自來蕃商唯是將馬入塞博易茶
貨今訪聞得近因熙州邊事後來並不將馬入漢只用
水銀麝香毛改之類博易茶貨是致馬額虧少今相度
今後許蕃商將馬并物貨各中半赴官折請名山一色
茶貨仍令支茶場分明於茶駝上印號出給公據付蕃
部收執前去及委經過近邊城寨關堡子細點檢若有
公據印號茶駝方得放行其公據拘收毀抹繳赴元給
茶場照會如無公據印號茶貨即不得放入蕃界仍乞
差本司勾當公事及準備差使官員更互前去邊塞點
檢無令透漏茶貨入蕃所貴招誘蕃馬入漢中賣從之
十二月十七日提舉陝西等路買馬監牧司奏檢準

詔今後許蕃商將馬并物貨各中半赴官折請名山茶
貨今有合申請事件一今來未有明文指定告賞刑名
欲乞應將不係博馬茶無公據夾帶透漏入蕃並許人
告依匿稅條格施行一蕃部博馬給公據入蕃茶經過
城塞堡鎮有合收稅去處雖即目不多緣公人上下因
此邀阻乞權免收稅所有免過稅錢歲終計筭於茶事
司年額稅息錢內除豁其稅務監官許將免過稅錢通
入課額比較候將來買馬通快依舊例施行並從之
二十七日詔訪聞涉冬已來熙河蘭會路漸有蕃商赴
近邊博易令都大提舉成都府利州陝西等路茶事司
應茶貨除胡宗回合要打誓支用量行應副本色外其

餘入蕃茶惟博易馬方許交易即不得將茶折博蕃中
雜貨務要茶馬懋遷漸通仍每月終會聚月內博馬到
匹數具狀聞奏 徽宗建中靖國元年四月三日戶部
狀茶事司奏蕃戎性嗜名山茶日不可闕累年以來買
馬大段稀少蓋因官司及客旅收買名山茶與蕃商以
雜貨貿易規取厚利其茶入蕃既已充足緣此遂不將
馬入漢中賣有言馬政今乞將名山茶立為永法專用
博馬如諸官司客旅等輒取支賣與興販其買賣之人
官吏等並乞以不應為從重科罪如有計屬情弊自依
本法本部看詳所乞專用博易馬已有今年十二月二
十七日朝旨外有官司客旅興販並依本司奏乞事理

施行從之 五月三日吏部狀都大提舉成都府利州
陝西等路茶事司乞將準備差使臣二員許舉小使臣
差使借差殿侍軍大將充都官闕契勘所乞左軍大將
充委是闕人應副難議施行殿前司申若依條奏舉殿
侍如朝廷許差別無諸般違礙本部今勘當欲依本司
所乞及逐處申到事理施行從之 九月十七日茶事
司狀今相度綿州羅江巴西縣界八茶鋪令巡轄綿利
州界茶鋪使臣移赴綿州置解宇巡轄邛雅州成都府
路茶鋪使臣兼催撥黎州博馬茶綱所有逐官稱呼窠
闕一員以巡轄綿州羅江至利州昭化縣界茶鋪呼於
綿州置解宇一員以巡轄漢州成都府至邛雅州界茶

鋪兼催發黎州博馬茶綱稱呼依舊只於成都府置辦
字委是地里職事均當從之 十二月十一日戶部狀
準茶司奏黎州合用博馬茶自來隔年拋數行下雅州
在城并名山百丈廬山縣茶場收買應副雖嚴加督責
收市常是不足伏緣逐場買茶出賣收息比額增剩及
買秦熙等路綱茶及八分各有賞典管勾官減監官之
半唯收市黎州博馬茶別無賞罰逐年常是收買不敷
元拋數目因而黎州支遣不接適有積欠蕃人馬價於
邊防不便今相度雅州在城名山百丈廬山縣茶場收
買黎州博馬茶比元拋不及八分及雇發積滯即監專
公人并管勾官買賣食茶收息雖比額增剩并收買起

綱茶雖及八分不在推賞之限及名山茶場買秦熙等
路綱茶今年分拋買一百二十綱茶近又秦州更添買
二十一綱本司已一面行下本場且依元拋數收買一
百二十綱仍收買秦州博馬茶候足數接續收買本部
欲依本司所乞事理施行從之 崇寧元年五月二月
都大提舉茶馬事程之邵申茶事并買馬監牧司雖在
川秦兩處置司緣所領職事並係通管自來為相去遙
速行移申請文字往往不相照應今乞應緣川秦兩司
茶馬職事凡有獨銜申請及雖係同狀不曾同簽並須
互下兩司勘當如所見不同亦令各具利害開陳免致
利害不得詳盡詔令茶馬司提舉官今後除常程文字

依條外應合更改措置事件並須連書申奏如有所見
異同仰各具利害開陳 二年三月二十四日都大提
舉程之邵狀自元符三年九月二十七日申請專用名
山茶博馬并貼賣與中馬人逐年買馬七州軍茶場賣
過茶收穫稅息錢數比連年收穫稅息錢外建中靖國
元年二月內增剝收到稅息錢二百五十三萬二千九
百九十七貫一百三文省內建中靖國元年收到增剝
稅息錢已赴闕奏計日已將錢六十六萬八百四十三
貫八百六十七文省中納朝廷封樁外餘并崇寧元年
收到增剝稅息錢共一百八十七萬二千一百五十三
貫一百三十六文省係專用名山茶博馬并貼賣比連

年分外收斂稅息錢數目詔據上件增剝息錢並令提
刑司封樁聽候朝廷支用仍依條具帳供申都省 七
月二十二日尚書省劄子勅會收復湟州徐已降指揮
用茶博馬并移出措置糴便司買馬司往湟州置司及
支勘本錢交子等外程之節稱所管茶數共約四萬餘
駝數內名山茶約一半以上依條專用博馬不許出賣
若盡數取撥往湟州委是闕悞今來馬額令程之邵今
年馬額權住博買其茶依已降指揮盡數支撥前去若
是久來蕃戶將馬中官已計置到馬恐有悞蕃客自來
入中之人兼慮諸邊萬一闕戰馬既相度移都大買馬
司往湟州令就近於湟州量數支撥三五千駝博馬以

備急用今來支降去茶鈔銀絹準元博買糧草并馬為
軍須支用外不得別將支使仍置簿拘管逐一抄上所
糴買到及支用過數每季申尚書省檢點勾考如違並
徒三年吏人決配千里從之 八月九日樞密院劄子
為程之邵令巡歷熙河竊見收復湟州故地部族甚衆
商賈通行竊謂非茶馬無以招集漢蕃人族蓋蕃部特
茶馬為命本州又當青唐一帶蕃馬來路乞朝廷指揮
就本州添置茶馬場實為要便如蒙俞允乞依條令本
司選舉大小使臣二員充茶馬場監官內馬場監官內
馬場監官依例兼本州兵馬都監候舉到官令逐官各
計會本處當職官同共修蓋場庫驛舍般運茶貨計備

芻秣等丁日開場博羅所有茶馬場合行事件並依逐
司見行條貫施行候及一年見得茶馬課息從本司申
請立額貼黃稱勘會茶馬場監官依條係本司奏舉內
買馬都監近準朝旨罷舉今來事初欲乞令買馬監牧
司舉官一次右檢會已降朝旨今相度都大茶馬司移
往湟州置司其本州茶馬場自合添置詔依其茶馬場
監官今後並特令奏舉 九月十六日以朝請大夫直
龍圖閣提舉成都府利州陝西等路茶事兼陝西買馬
監牧程之邵為集賢殿修撰熙河路都轉運使兼川陝
茶馬 十月二十三日同管幹成都府等路茶事孫軫
奏今年輪當臣赴闕奏計方欲起發間承朝旨比年例

增兩倍茶應副新邊支用續又令臣量添價錢速行收買川馬赴關奏計不免往迴數月顯妨收市茶馬乞特免今年奏計一次從之三年二月二十九日戶部狀提舉陝西等路買馬監牧司申黎州所買馬類多不堪披帶自來止為竊慮遠人又慮買數過多有損無益遂立條從八月一日開務至三月一日住買後來官司有失體究本意不限月分收買却於成都府馬務經夏養餵比之起綱時月積留死損極多枉費官錢留粟不少馬務監官每歲例該責罰遂累次檢會舊條乞本州每年自八月一日開務買馬至三月一日閉務住買蒙朝廷施行自後免得積留在成都府馬務養餵病生死

物命今會纂黎州見買四歲至十三歲四赤四寸大馬
每匹用名山茶三百五十斤每斤折價錢三十文銀六
兩每兩止折一貫二百五十文絹六匹每匹止折一貫
二百文絮六張每張止折五十文青布一匹止折五百
文約本處價例僅是半價支折與賣馬蕃部自黎州至
鳳翔府沂陽監四十八程沿路倒死數目不少其馬多
充雜支今會計秦州買四歲至十歲四赤四寸大馬一
匹用名山茶一百一十二斤每斤折價錢七百六十九
文比黎州減得茶二百三十八斤又減省銀絹等不少
家比馬價錢止四分之一黎州歲買馬二千匹元符二
年買五千二百八十餘匹元符三年買四千一百餘匹

費用茶萬數浩瀚雅州至黎州道路盡是山嶮人夫負擔委是不易近準建中靖國元年十二月十一日敕茶事司奏乞雅州在城名山百丈廬山縣茶場收買黎州博馬茶不及八分及雇發積滯即收買起綱茶雖及八分不在推賞之限契勘收買陝西名山茶一百二十綱買及九十六綱已及八分該賞其黎州收買博馬茶自來不限定分數今若候黎州收買足茶數及雇發無積滯方賞其陝西綱茶必是減少留滯有妨博馬戰騎魚於陝西貴價出賣茶處虧損課額欲乞黎州買馬且依元條收買三千匹其博馬茶比舊減半支折所有一半茶却依價折與銀絹等合用錢物除轉運司年例撥到

外有餘少錢物並依舊茶事司應副即蕃部尚為優幸
不失撫納遠人之意所有雅州名山買陝西綱茶并黎
州博馬茶且依舊條收買送戶部符茶事司連舊書申
奏今據提舉官孫鼐牒狀黎州南蠻及吐蕃部落惟仰
賣馬為生久來不以配軍為限盡行收市招懷遠人今
若止以三千匹為額更除豁不理賞之數必致減損買
馬官賞格無以激勸又恐因此阻節遠人於蕃情未順
兼茶事司額外買馬銀帛自來轉運司計置支運茶事
止是應副茶貨年終計算撥還成都府轉運司見中乞
令茶事司撥還用過銀絹虧損價例若減半支茶却以
銀帛支折轉運司豈肯更行應副若依舊不限數買馬

又緣欠蕃部茶八十餘擔亦非經久之法所有買發黎
州年額并額外馬通數歲買不得過四千匹賞罰并收
市合用茶及支折茶絲且依見行條法施行其四赤以
下馬更不收買本部看詳若止三千匹為額不惟減損
買馬官賞格無恐阻節遠人若不限定分數及比舊減
半支折茶收買緣今來應副湟州博羅萬數浩大比賞
年加兩倍買茶亦恐闕悞除賞罰并收市合用茶依見
行條法施行欲將黎州年額并額外馬通歲額不得過
四千匹其博馬茶比舊減半支折所有一半茶却依價
折與銀絹等所是合用買馬錢物除轉運司年例撥到
外有餘少錢物並依舊茶事司應副其四赤已下馬更

不收買兵部看詳除所乞將年額并額外馬數通不得
過四千匹合係年額馬三千匹依舊一千匹額外收買
外即無未盡未便事從之 四月十一日殿前司申承
樞密院批下都大提舉成都府利州陝西等路茶事司
狀殿侍本司指使王鑑狀竊見馬司指使殿侍程侑先
有狀乞立磨勘年限尋申明已奉聖旨與理八年磨勘
改轉三班差使外有茶事司指使殿侍未有立定磨勘
年限乞施行勘會本司指使殿侍與馬司指揮殿侍案
關資任並同及差赴川陝往來取送官物應到茶本并
諸般差使幹當委是事務一般本司契勘欲乞將都大
提舉成都府利州陝西等路茶事司指使殿侍比附依

提舉陝西等路監牧司指使理八年磨勘改轉三班差
使從之 五月二十日都大提舉茶事司狀本司係移
運錢物買賣收趣課利司分即與諸司錢物事法不同
兼每年買茶收獲課息除年例支使外將所餘年分外
增羨息錢已逐旋具數申納朝廷以助支用近年以來
多為諸司及臣僚申請承受朝廷指揮許於諸司錢物
內取撥支用遂將本司茶錢一例作諸司錢取撥今來
若令他司並作諸司錢物一槩取撥支用便見本錢妨
闕寔壞事法欲乞今後他司及臣僚申請乞支用諸司
錢除茶馬司錢物不許作諸司錢一例支使如朝廷非
泛支用乞下本司契勘有寬剩錢剗刷應副從之 十

二月二十五日提舉陝西路買馬監牧司狀黎州年額并額外馬通歲額不得過四千匹其傳馬茶比舊減半支折所有一半茶却依價折與銀絹自八月一日開場至九月終共買到三百五十匹比通年一般月分大段虧少契勘賣馬蕃蠻以茶為本即目正當買馬之際若比舊減半支茶不唯買馬稀少兼恐候事欲申候朝旨深慮有妨起辦歲額已逐急下黎州將四赤二寸以上馬每匹合得茶依已降朝旨比舊減半支折外各與量添茶一擔招誘收市所來年已後合用傳馬茶欲乞依舊收買應副其減半支折指揮乞更施行從之 四年六月三日都大提舉茶事司買馬監牧司奏茶馬司幹

文字幹當公事第一等將仕郎張察文林郎楊達將仕郎張庭玉黃瑜第二等登仕郎高成章將仕郎王易朝奉郎孫俞朝請郎路康國及逐司點檢文字等自承朝旨後來首尾管幹催促撥發茶貨有勞詔第一等張察時改宣德郎楊達張庭玉黃瑜各循兩資第二等王易孫俞路康國各減三年磨勘高成章循資占射差遣一次內選人如無資可循或已官即比類推恩人吏第一等各轉一資如無資可循及有違礙或不願轉資即支賜絹二十匹第二等各支賜一十五匹第三等各賜一十匹七月二日熙河蘭湟秦鳳路經略安撫制置使司奏奉詔處分相度措置馬政事尋先次指揮岷州計

置收買馬一萬匹作制置司支用候足日奏取處分已
令知岷州馮瓘措置今據馮瓘申已牒提舉買馬司逐
急借撥名山茶貼作三萬駝支與岷州候見得的確數
日申朝廷却行撥還及已牒茶事司依馮瓘所申并下
秦鞏熙河岷州依所乞應副去訖一於買馬場勘會到
良綱馬並係支一色名山茶下項良馬三等並四寸已
寸已上上等見支茶二駝一頭中等見支茶二駝二十
斤一十五兩半下等見支茶二駝二十斤七兩半綱馬
四赤七寸見支茶一駝一頭二十六斤半四赤四寸見
支茶一駝一頭一十九斤一十二兩四赤五寸見支茶
一駝一頭壹十四斤一兩半四赤四寸見支茶一駝一

頭四斤一十一兩四赤三寸見文茶一馳四十九斤二兩四赤二寸見文茶一馳三十二斤一十二兩一勛會日近蕃客稀少即今買馬場全然收買不得若不添展茶數竊恐卒難收買乞候蕃客牽馬到場相驗好弱臨時添搭良馬權添茶三十斤綱馬權添茶二十斤相度欲依馮瓘所乞權添上件茶數博馬只作添搭支馬牙人即不得礙買馬司博馬體例候今來數足依舊一契勛若只買良馬一萬匹約用名山茶三萬馳今來本州見管有三千餘馳止買得一千餘匹一欲將秦州蘭州鋪分學合應副秦鞏熙河州名山茶以川分中且截撥二分赴岷州準備支用一今來茶數既多即公路不免

擁併欲乞將秦鞏熙河大路權茶鋪權行差那於本州
沿路地分貼鋪及下經由縣鎮堡寨和雇人夫併工推
般庶得辦集從之十月十二日樞密院奏熙河蘭湟
路經略司申熙河蘭岷鞏州舊管蕃兵近年出入頻數
死過戰馬不少雖督蕃官首領緊行收買添填其蕃兵
例各闕乏兼無貨博買今相度乞將熙河蘭岷鞏州闕
馬蕃兵於逐州茶場各量借茶添助收買五千匹每匹
借茶一駝共借茶五千駝仍許蕃兵將斛斛折納元價
其斛斛可充茶事司應副支給逐處茶場監官巡鋪使
臣權茶鋪兵請受如有剩數無支遣處許令別司播錢
兌糴從之十二月三日中書省尚書省檢會元豐六

年閏六月十三日條諸出賣官茶提舉司立定中價仍
隨市色增減應增者本場體訪詣實增訖申提舉司覆
按應減者申提舉司待報令立到熙河路博馬貼賣出
賣茶名色酌中價例下項博馬茶名山茶每駝七十八
貫五百三十三文瑞金茶每駝一百二十九貫四百一
十三文洋州茶每駝七十貫五百四十二文萬春茶每
駝八十七貫三十六文貼賣茶名山茶每駝八十一貫
六百五十一文瑞金茶每駝一百七十三貫三百四十
八文萬春茶每駝一百七十三貫三百四十八文洋州
茶每駝一百七十三貫三百四十八文出賣食茶油麻
填茶每駝九十三貫九百九十八文洋州茶每駝八十

六貫二百三十文崇寧茶每駝八十一貫八百六十六
文楊村茶每駝一百一貫九百七十三文興元府茶每
駝一百二十二貫五百七十一文永康軍茶每駝九十
八貫七百二十四文味江茶每駝九十三貫四百一十
四文堀口茶每駝一百三十貫四百五十三文詔州茶
專充博馬更不出賣舊出賣數令洪中孚相度博糴斛
斛 十一日中書省尚書檢會熙寧元豐川茶惟以博
馬不將他用蓋欲因羌人必用之物使之中實不至艱
阻國馬不乏騎兵之用竊慮淺見官司趨一時之急陳
乞別將支費有害熙豐馬政失今日繼述之意修立下
條諸川茶價博馬輒陳請乞他用者以違制論從之以

上國朝會要

徽宗崇寧五年二月六日戶部狀同提
舉成都府等路茶事孫鼇牒奏準尚書省劄子洪中孚
奏乞會茶司見在之數如未用折博蕃馬即盡將博糴
斛斛所有茶價增減臨時視斛斛多寡計定詔令鼇牒
同共措置即不得有妨博馬支用契勘茶司計名山等
綱茶有條專用博馬不計出賣其逐色茶價係茶司依
條以川路產茶場元買茶本廉費等錢立定逐州價例
比其餘雜茶例各低賤所以優潤蕃商鈎致國馬今來
若依洪中孚陳請必恐將漕司減損茶價虧失歲課欲
乞除斛斛價許臨時隨市勢增損外其茶依本司已定
價例折博不許減損又稱乞用提刑司封播加買到兩

倍茶交撥與洪中孚同共措置博糴斛斛本部看詳欲
依所乞從之 十六日戶部奏熙河蘭岷路轉運使洪
中孚等狀乞令茶司與臣同共措置茶博糴奉詔依奏
令孫鼂扈同共措置契勘得所管茶貨除可以移那般
運應副博糴外令相度乞令西寧湟廓州各客人先將
斛斛赴本處入中其價錢出給合同會子給付客人令
自齎前來河州茶場出外變轉仍支與每駝腳錢西寧
廓州比河州至湟州腳錢量加饒潤如本場關錢即以
茶依價添搭紐折本部欲依崇寧四年十二月二十八
日朝旨於加置到兩倍茶內支還不得有妨博馬支用
從之 五月二十三日都大提舉成都府利州陝西等

路茶事司提舉陝西等路買馬監牧司奏本司轄下見有員闕去處不少雖依本司條權差罷任待闕官承攝為無法與理在任月日徃徃不願權攝差委不行乞應茶馬職事員闕去處見差權官權攝月日依陝西轉運提刑司法與理為考任從之 六月二十三日詔將加買兩倍茶並撥與茶馬司應副博馬支用更不博糴斛斛同日樞密院奏都大提舉成都府利州陝西等路茶事司申勘會川茶始自熙寧七年置司推行迄今三十餘年從來計置般赴秦鳳熙河等路應副博馬有餘出賣元豐中立法州名山茶專用博馬候年終馬數足方許雜賣自建中靖國元年後來為買馬數多名山茶

數少又以興元府萬春瑞金大竹洋州四色綱茶相兼
應副博馬僅能足辦緣孫鼇抃與洪中孚同共措置茶
博糴斛斛即不得有妨博馬支用尋契勘若更將茶博
糴委是有妨博馬望賜指揮除將已椿加買到兩倍四
色綱茶應副博糴斛斛外將名山茶依累降指揮專充
應副買馬支用餘依崇寧四年十二月十一日指揮

十一月十日提舉陝西等路買馬監牧司奏陝西路轉
運司幹當公事官近依朝旨許存留員其合差官幹當
尋於轄下選差其間拘礙不許差出者不少雖有職官
及司戶可差却兼充買馬等同管幹本司全然差那不
行欲乞將逐司管幹官并就委本州依條不許差出官

不妨本職差委幹當奉詔每州委見任官一員管幹除州界時暫差使外不許差出又買馬司敕諸買馬及有牧地處委茶事司所差管幹應報本司文字不許他司差出州界契勘本司差定逐州運管幹官茶馬司自來依條選擇通判或職官幹當今若止於不得差出官內就妄竊慮合差官有限艱得可以倚辦之人兼錄事司理司法體輕緩急難以集事今來陝西牧馬地撥隸馬司所總錢斛不少全藉管幹官往來點檢兼茶司地方濶遠職司不一今欲乞將逐州軍茶馬司管幹官許令本司依舊選差從之 十二月六月詔神考修立馬政於川陝市茶博馬及以茶息應副邊計行之甚久已見

成效其屬官等全藉能吏幹集故舊制盡從逐司奏舉
近緣臣僚陳請復行差注除馬司屬官并買馬官已復
奏舉外其茶司元豐年應奏舉并同轉運司選差員闕
並依元豐舊法施行 大觀元年正月十九日尚書省
言熙河蘭湟路都轉運使洪中孚奏蕃地許官以茶綵
博買募人種佃以諸司并折博務見在綵兩路通融應
副外不足許本司約數奏聞從朝廷給降其茶並令茶
事司應副取足奉詔依奏其茶於兩倍茶內支撥應副
仍具合用數奏聞契勘今來若許令熙河蘭湟轉運司
取撥茶貨博買蕃地不唯違戾已降指揮兼壞敗本司
成法蕃部以馬易茶元非本意必恐因此隳壞馬政伏

望遵依已得指揮應係茶專充博馬不得他用從之
二月三日同管幹成都府利州陝西等路茶事兼提舉
陝西等路買馬監牧公事龐寅孫奏昨准朝旨提舉陝
西成都府等路茶馬司屬官六員參分中減罷一分止
支與合入資序請給等已依朝旨裁減外檢會茶司令
諸提舉官所請係省請給歲給以息錢計還轉運司令
節文幹當公事官指使添給並以本司雜收錢給如不
足即以茶司頭子錢充勘會茶馬兩司屬官並係熙寧
元豐年差置即非後來緣事初添兼逐員添給並於本
司雜收茶息錢等內支給即無侵耗轉運司歲計財用
除裁減外見存員數輪定兩川及沿邊以來分頭催促

應副秦鳳河等路博馬綱茶及買戰騎委是緊切事務
乞將茶馬兩司減定屬官許依本司元豐舊法支破請
給內馬司屬官並依茶司屬官條法本司管認撥還詔
依三月二十四日龐寅孫又奏伏見元豐立法川茶博
馬有剩並許出賣除名山茶外有萬春瑞金大竹洋州
茶自來措置招誘買馬許中馬蕃部依合得馬價對買
外更許貼買四色綱茶一馳近承朝旨川茶專用博馬
即未有許對賣貼賣明文欲望除名山茶外將萬春等
四色綱茶並依舊例從本司約度蕃馬中賣并貼賣對
賣與中馬蕃商餘依元豐舊法施行從之 九月十三
日戶部狀都大提舉成都府等路權茶司狀檢準敕諸

都大管幹成都府等路茶事兼買馬公事支賜添支依
諸路提點刑獄官則例支破本部看詳本司大觀令內
已有立定提舉官請給都大提舉依轉運副使添支依
陝西例同提舉依提點刑獄同管幹依轉運判官例今
勘當添支自合依本司令文施行其支賜都大提舉欲
依支賜令內陝西轉運副使例同提舉依諸路提刑例
同管幹依諸路轉運判官例支賜從之 十一月二十
六日提舉陝西等路買馬監牧公事孫鼐牒奏契勘自
崇寧四年六月後來承熙河蘭湟路制置司牒準御前
處分收買良馬所買數並足係本司官吏協力措置應
副茶帛催督收市今來除臣不敢僥求息賞外本司官

吏乙依崇寧五年十二月九日例推恩詔孫鼇牒特與
轉行一官餘依奏 二年三月二十七日都大提舉權
茶司狀名山茶準條專用博馬近年額外汎拋馬數浩
瀚本司逐擘畫將自來出賣萬春等四色綱茶相兼支
折方能充足緣博馬茶依條不理年額不住據諸場申
陳稱自將博馬後來賣茶年額例各虧失本司今相度
除名山茶準條專充博馬不理年額外欲將萬春等四
色綱茶與理為茶場歲額不預推賞之數仍自大觀元
年為始從之 十月七日詔川茶有數品惟雅州名山
茶為羌人貴重可令熙河蘭湟路以名山茶易馬怡遵
神考之訓不得他用餘茶博糴量度茶數勿使過多可

委陳敦禮措置聞奏 二十三日熙河蘭湟秦鳳路宣撫使童貫奏奉詔國馬所賴非輕比聞馬數出少川茶價低其弊安在可體訪目今因依講究悠久利害可以救正之方臣講究得川茶如初權買般赴秦鳳熙河等路應副博馬係以元買本錢添搭腳稅隨市增減價例不定其熙豐間馬賤茶價亦賤即今馬貴茶價隨市亦貴近年以來諸場買馬比熙豐間雖逐等量有增添茶數緣元降指揮每歲買馬以一萬五千足為額今來係以二萬足為額除添五千匹外逐時又有泛拋足數甚多若不量行添搭深慮無以招誘蕃客收買伏望且依目今收買又稱元豐四年郭茂恂奏請以茶充折外其

餘數又見錢物帛增立年額為二萬疋比舊額常買不足詔且依見今斤獻收買三年八月二十五日詔茶馬司餘剩錢物支撥與陳敦復充熙河路羅買糧草四年五月七日詔熙河秦鳳等路茶馬事應今日以前泛拋買馬添茶給引博馬等指揮並罷一切遵依元豐法仍令提舉茶事司措置施行十一月二十五日詔秦州場見封樁結罷宣撫司布二萬匹可盡數撥赴提舉川陝茶馬司支用疾速行下政和元年二月十一日戶部狀提舉陝西等路買馬監牧司狀今來若今買馬司依舊博買蕃蠻物貨移用相兼買馬委是元豐舊法尋閣駕部劾當欲依元豐年朝旨施行看詳提舉茶

雅州博易司稱黎雅州

熙寧年即不曾置博易始自

崇寧元年置場博易至五年正月二十八日朝旨住罷
本部令勘當欲依所已住罷崇寧年所置黎雅州博易
場並依買馬司檢具元豐舊法施行從之 七月九日
樞密院奏尚書兵部申準政和元年正月二十四日聖
旨川陝茶馬司自昨降處分罷添給引博馬及住泛拋
買馬悉依元豐法後來自八月至年終計買馬八十餘
足赴關仍用茶數少減省錢絹八十餘萬所有兩司官
吏奉法勤恪協濟事功可取索當職人姓名分定等第
取旨推恩本部勘會兩司當職官吏職位姓名今據買
馬司申勘會到今年正月至二月十日終又買過馬二

千五百八十二足上京減省茶計銅錢二十六萬九千
餘貫已施行提舉官張翬李稷特各與轉一官管幹文
字第一等陳損王易特與減三年磨勘內王易特與循
一資仍占射差遣一次第二等魏允中高世祚彭議許
無特各與減二年磨勘第三等魏超王運特各與減一
年磨勘吏人第一等特各支賜絹一十五匹第二等特
各支賜絹十匹第三等特各支賜絹五匹詔依逐項指
揮內使臣減年磨勘仍依四年法比折 十月二日戶
部言提舉陝西等路買馬監牧公事李稷奏勘會陝西
買馬以茶斤重立定價例舊法上等良馬最貴不過一
獸一頭比因泛拋數多增添茶數及倍昨蒙依元豐舊

法其馬價比泛拋頗減茶數蕃商故生邀勒尚未肯多
將馬出漢竊緣戎人不可闕茶欲乞將熙河秦鳳路諸
場四色綱茶權住出賣每蕃部中馬一疋除依條支還
馬價外如願買茶者仍許依見賣價收買四色綱茶一
馱引領門戶買一頭俟三二年間馬來往通快即依舊
例施行從之 二年六月二十五日權發遣提舉成都
府利州陝西等路茶事兼提舉陝西等路買馬監牧公
事張鞏劄子契勘洋州茶場歲買茶貨浩瀚其品搭催
督般發茶貨盡繫西鄉知縣欲乞依名山知縣例許本
司舉辟比監官減半酬獎從之 三年七月二十七日
都大提舉成都府熙河蘭湟秦鳳等路權茶司幹當公

事何漸奏契勘雅州名山綱茶專用博馬山南四色綱
茶通賣漢蕃自大觀四年後來依元豐法減茶買馬歲
常有償剩之數又為減茶之初蕃商中馬未致通快本
司措置權住買四色綱茶立賣與中馬蕃商其名山茶
除博馬外不許他用是致川陝諸場庫各有償積下茶
萬數不少且以興州長舉縣等兩庫見管名山茶已及
五萬餘駄竊慮所買既多所用有限不免陳積今相度
欲乞將名山茶依條專用博如有剩數許中馬人依見
買四色茶體例用市價支賣却將四色茶依舊出賣收
息勘會除償剩名山茶色降指揮添博收馬外契勘四
色綱茶貼賣與中馬蕃部等昨指揮俟三二年買馬通

快依舊今來將及二年詔每年將四色綱茶並專充博
糴漢蕃斛斛封樁不得別將支用仍逐旋具糴到斛斛
數目中尚書省 八月十三日朝請郎直龍圖閣權發

遣都大提舉成都府利州陝西等路買馬監牧公事張
等路買馬監牧公事張翬劄子準御前劄子臣僚上言
同何漸劄子今相度措置可否利害保明聞奏今檢具
前後手詔敕令及依應相度措置到下項一準元豐四
年七月十八日中書劄子奉詔雅州名山茶專用博馬
候年額馬數足方許雜賣一準馬司格應熙秦岷階州
通遠軍各依逐等所定獻數以新茶支折 請如有見
在元祐三年四月新茶即支四年分茶之數 如蕃部願

要銀紬絹洋州茶大竹茶之類並許各依見賣實直價
例算請更不限定分數一準崇寧四年十二月十二日
奉聖旨諸川茶非博馬輒陳請乞他用者以違制論一
準崇寧五年六月二十四日聖旨應係茶並專充博馬
支用餘依崇寧四年十二月十一日朝旨施行一準大
觀元年三月二十五日敕中書省尚書省送到龐寅孫
劉子奉聖旨依所申他司不得使用一準大觀四年正
月七日樞密院劉子三省樞密院同奉聖旨熙河秦鳳
等路茶馬事應今日以前泛拋買馬添茶給引博馬等
指揮並罷一切遵依元豐舊法仍令茶舉茶事司措置
施行一準大觀權茶司令節文諸名山茶依舊樞密院

馬外如買馬司關博馬數多關支用妄提舉司即時應
副有剩從本司相度貼賣與中馬人又準敕諸名山茶
博馬外剩數非中馬人輒支賣者杖一百一準政和元
年十月二日敕中書省尚書省送到戶部狀準都省劄
子奉聖旨提舉陝西等路買馬監牧公事李稷奏奉聖
旨依一臣契勘名山茶自熙寧權茶之初本以博馬至
元豐四年計其馬足積羨聽以出賣實為通法繼復有
并用大竹洋州茶博馬之議建中靖國年始有許將名
山茶餘數止對賣與蕃商之論大觀中又有權住賣四
色網茶令對賣門戶蕃商之請然臣攷利害之實元豐
之制最為要準而後人之請或趨一時之利不可為典

要或川秦首尾相戾不達利害之實姑以職事陳請而
已蓋除馬司博馬外茶司自有歲額必待售茶而辦其
四色綱茶實為茶額根本秦熙兩路漢民所售食茶不
多而淺蕃熟戶並煎四色綱茶遠蕃多嗜石山茶間有
姦商詭用綱茶麤硬食茶罔之者亦能區別若將名山
四色綱茶一切禁之不賣必致茶額不敷出茶無藝顯
難屬饜而害馬政惟斟酌非實馬足茶羨則貨之者是
通法也其對賣尤非利害徒並門戶蕃人乃熟戶蕃族
之為駟僧者與官場吏卒乘便為匿藏取官息其利不
及生蕃於馬未始加益若將名山茶四色綱茶依元豐
舊制從本司叅量合用博馬茶外剩數轉易回本入川

惟不得害馬政妨茶額元豐時雖曰兩司而提舉官一
以任責苟其才下亦能約量不致牟戾自取譴責今相
度欲乞應名山茶四色綱茶專用博馬餘數聽本司量
度轉易回本入川不許輒將他用臣契勘昭化順政長
舉庫積茶以今年五月中旬狀攷之僅有五萬九千四
百馱蓋昨緣大觀四年前利州路凶歉至今居民事力
未能如舊故其昔日甲頭脚戶流莩之餘存者道負夥
甚產召不行臣比欲草具建明乞將興元府至永興軍
一帶減下舊額茶鋪兵士七百餘人並聽本司於洋州
至興元府添立鋪其餘添隸長舉至秦州諸鋪運茶則
永遠不致積壓其原給自係本司錢內支給一切不預

別司調度又應川界轉般茶諸邑今辟舉有經三年礙吏部格雖辟書數上終無一人得注授者攝承之吏玩習歲月寢以隳弛又臣嘗建議乞應本司辟官乞破格差注一次已蒙朝廷聽行而吏部終以合注承務郎以上者不許降用選人今五年竟未有差注臣又嘗建議乞將發茶場庫監官縣令如成都府排岸司興州長舉縣裝卸庫興元府西縣轉般庫監官綿州巴西利州昭化三泉興州順政長舉興元府南鄭西縣知縣計十處每撥發茶及四萬駄無闕失與減二年磨勘以其諸縣如長舉昭化之類多是僻小去處既難得人肯就及專任茶司事務而有責無賞誠非勸沮之道至今未奉指

揮積是三年茶或滯留滯而通之可久無弊臣今相度
欲乞應興元府至永興軍一帶減下舊額茶鋪兵士七
百人並令權茶司措置於洋州至興元府西縣添置茶
鋪各請兵級人數外將其餘數分添入長舉縣乾渠鋪
至秦州赤谷鋪並依茶司自來例施行應熙秦州路權
司所辟官承務郎以上選人大小使臣並許互換通
舉謂如承務郎以上知縣處亦許奏舉選人知縣處亦
許奏舉承務郎以上不以有無拘礙並行注差應撥川
茶路地分成都府排岸司興州長舉縣裝卸庫興元府
西縣轉般庫監官綿州巴西縣利州昭化三泉興川順
政長舉興元府南鄭西縣知令每撥茶及四萬馱無違

闕與減二年磨勘貼黃稱契勘臣僚上言僨積茶五萬
餘駄約計每駄二百七十三貫文省係鐵錢舊價緣自
今年奉行夾錫錢寶後來每駄一百貫文省以見茶數
約計錢五百九十餘貫文又稱契勘吏部及八路差官
法無本等人亦聽破格差注檢會下項一政和三年七
月三日敕權茶司狀朝旨令買馬司每年添買二萬匹
合用茶令計置茶本從朝廷應副取到狀自減茶博馬
後每年約僨剩茶一萬四千餘駄內利州昭化庫見在
在名山茶四萬二千一百六十五駄興州長舉庫見在
名山茶八千六百一駄其餘場庫未在其數奉聖旨據
今來合添買收馬二萬匹所用茶於僨剩名山茶內支

撥應副博馬仍令權茶司今後每年寬剩計置茶一萬
駄盡數充添買牧馬之用其合用茶價仰具數申尚書
省所有歲額博馬茶如有剩數亦仰衆同應副添買牧
馬之用一政和三年七月二十八日敕何漸劄子乙將
名山茶依條專用博馬如有剩數許中馬人依見買四
色茶體例用市價支賣却將四色茶依舊出賣收息契
勘四色綱茶貼賣與中馬蕃部等昨降指揮俟三二年
買馬通快依舊今來將及二年奉聖旨每年將四色綱
茶並專充博糴漢蕃斛封橋不得別將支用仍逐旋
具糴到斛斛數目申尚書省一政和三年六月七日敕
戶部狀權茶司申乙立定成都府排岸司興州長舉縣

裝卸庫鳳州轉般庫綿州巴西縣利州昭化三泉興州
順政長舉縣興元府南鄭西縣任滿收發過茶無失陷
欺弊提舉司保明每四萬駄與減磨勘二年如不獲抄
附失陷一萬駄展磨勘二年其承直郎已下賞罰並各
比類施行二分以上依差替人例本部看詳本司申乞
即係累賞竊恐太重今勘當欲依巡轄般茶鋪使臣任
滿去減磨勘一年先次指射家便差遣餘並依本司所
申事理施行詔除名山茶博馬四色綱茶博糴并撥發
官等賞罰並依近降指揮外其措置鋪兵依奏餘不行
五年五月七日詔茶事司循法舊制特許辟官訪問
比來不顧公議多引四川土人今後辟官不許奏辟土

人已辟官並罷仍着為令違者奏舉官并被舉人並降
名六年二月十九日樞密院言同管勾成都陝西等
路茶馬監牧公事程唐奏勘會本司遵奉聖旨依元豐
舊法減茶買馬臣到任措置陝西買獲馬四萬五千二
十一匹收稅息錢四百八十三萬五千餘貫契勘陝西
自承朝旨復行錫錢物價已平是致鬻茶通快今且以
熙秦路共收到稅息四百七十萬三千四百餘貫比類
增羨委是本司官吏協力粗有成效乞等第推恩詔程
唐除直秘閣外餘分優等及第一第二第三等優等轉
一官選人循兩資第一等減三年磨勘選人循一資占
射差遣第二等減二年磨勘疑有闕文今檢未獲人吏

支賜絹優等二十匹第一等十五匹第二等一十匹第三等五匹 七年三月十五日詔管勾川陝茶事程應副陝西運司年額有勞可特除右文殿修撰其合用收買四色綱茶本仰尚書省每歲給降度牒三百道付程唐自政和六年下半年為始 四月二十五日提舉成都府等路茶事郭恩奏政和五年分川陝收到茶息錢三百七十一萬一千一百七十二貫其支用外見在一十一萬一千九十八貫七百五十文省取到諸州牧附年帳申尚書省外別有三十五貫糴到斛斗為秦州本司取會未足附次年帳供申詔郭恩賜紫章服 宣和三年四月二十四日朝奉大夫何漸奏臣竊惟川陝權

茶之法本以市駿實邊使茶無滯貨則馬來數多邊備
充足臣頃承之使事措置雇發沿路積滯茶馱悉至邊
場頗見其利比宣和元年茶司奏計在臣替罷數年之
後提舉官程唐具奏尚稱用臣計置茶貨博馬減省錢
緡此有以見雇發之利其博如此今任適當川陝茶馬
之衝伏見利州昭化興州順政長舉三縣雇發最為衝
要累年縣令悉係權攝深恐檢察不專復有積壓之患
臣愚欲望慈特加訓敕應雇發地分關官令茶司連依
元豐成憲以時選舉庶幾得人任職利源增廣吏部供
到川陝榷茶雇發地分知縣見今依元豐法榷茶司與
本路轉運司同共選差永康軍青城知縣蜀州永康知

縣雅州名山知縣漢州德陽知縣利州昭化知縣見闕
漢州雒縣知縣邛州依政知縣利字綿谷縣令興州順
政縣令見闕興州長舉縣令詔依元豐法 八月十二
日何漸又奏竊惟神宗皇帝肇建茶馬兩司吏員多寡
稱事繁簡後來因事增員不無冗濫乞應添置員闕悉
遵熙豐成憲從之 十一月十二日吏部奏檢會提舉
成都府等路茶馬兼買馬監牧公事宇文常狀準敕陞
充提舉即不帶都大及同字所有序官限指揮勘會字
文常係同管勾茶事準敕陞作提舉其權茶司令文內
即無立定提舉茶事序位之文本部今勘會欲將宇文
常序位在陝西熙河蘭廓路轉運副使諸路轉運使之

下諸路轉運副使提刑之上今年四月四日詔依吏部
申勘會張有極元受敕內亦不帶都大及同字與提舉
宇文常事牒一般所有序官未審合與不合依宇文常
已得指揮詔依宇文常所得指揮施行今後準此 十
二月十八日詔川陝買馬萬匹提舉茶馬司郭思張有
極及官屬等陞職進官有差 四年四月十一日樞密
院奏勘會提舉陝西等路買馬監牧司茶承聖訓遵依
元豐成法減茶買馬宣和二年八月至三年十月買獲
馬二萬二千八百三十四匹計減省錢二百八十五萬
六千五百餘貫有畸今具秦川兩司合推賞官吏職位
姓名下項提舉官郭思張翬宇文常何漸內張翬宇文

常各特與轉一官宇文常轉行郭思何漸所歷月日不多更不推恩屬官優等管幹文字及思忠幹當公事馬冲各減三年磨勘進義副尉張份減一年半磨勘第一等管幹文字李伸道幹當公事趙子游劉散韓洪各減一年半磨勘第二等管幹文字程敦臨幹當公事范洪張錢劉子明各減二年磨勘第三等幹當公事万俟詠李與同各減二年半磨勘本司人吏優等減二年磨勘候出職日收使第一等各支賜絹八匹第二等各支賜絹六匹第三等各支賜絹五匹詔特依逐項指揮內磨勘年限不同人依四年法比折選人依條施行 五年十二月十五日樞密院奏勘會提舉陝西等路買馬監

牧司恭依聖訓遵守元豐成法減茶買馬宣和四年九月至宣和五年九月買到二萬一千九百四十匹減省錢三百二萬六千五百六十貫文今具秦川兩司合推賞官吏職位姓名下項提舉官何漸韓昭各特與轉一官屬官優等管幹文字晁公邁幹當公事范洪各減三年磨勘第一等管幹文字劉黻侯寯幹當公事何掄各減二年半磨勘第二等管幹文字程敦臨幹當公事張錢各減二年磨勘第三等幹當公事王城減二年半磨勘人吏優等各支賜絹十疋第一等各支賜絹八匹第二等各支賜絹六匹第三等各支賜絹五匹詔特依逐項指揮內選人令吏部依條施行 六年八月十九日

都大管幹成都府等路茶事王蕃狀伏見前提舉官何漸昨具奏為闕官逐急擇人權攝欲乞將本司熙豐以來不拘常制許辟員闕依元豐舊法不得並差川人及依近降指揮不得奏差知州外餘並許臣踏逐選擇公廉練達之人不拘常制指名奏差奉御筆依所奉許辟一次後來何漸除奏外見餘未曾奏辟去處欲乞依已降御筆指揮許蕃依何漸申請不拘常制指名奏辟一次從之 七年五月二日詔茶馬司辟官並依元豐法十月三日吏部奏權提舉成都府等路茶馬公事韓昭奏契勘本司案闕遵奉元豐成法合從本司不依常制奏差今踏逐到宣教郎王滋乞差通判興元府承事

郎安邵乞差充都大提舉權茶司勾當公事忠翊郎王
義夫乞差充階州買馬監押勘會王滋前任清州司戶
曹事三考得替磨勘改官合入初任知縣資序其與元
府通判依熙寧格係注通判人即不係應入窠闕兼有
礙元豐令雖不拘常制不得奏差茶馬司勾當公事雖
許本司奏差緣提舉茶馬係二員依政和令連書或一
就奏舉今來韓昭獨御奏差礙前條法階州兵馬監押
係提舉陝西等路買馬監牧司關今來本官稱本司窠
闕合從本司不依常制奏辟緣即無許舉買馬監押之
文兼王義夫不應材武見係監當資序依條不許舉辟
詔令吏部行下 欽宗靖康元年五月十五日詔川陝

所起歲額綱馬全藉茶貨博買訪聞自近年以來買馬
司不切用心預行措置搭備及將茶貨等輒以他用是
致收買馬不能敷額緣此積年闕馬數多雖已降處分
不得以茶及本息錢博買珠玉等并收羨餘尚慮不為
遵奉巧倖侵欺轉易他用可令本司今後將合博易茶
貨等預行搭備不得轉易他用專充買馬仍令買馬路
分走馬承受每年取索所得茶貨等子細驅磨支使有
無侵欺轉易他用若有違戾其買馬司應干當職官吏
並以違制論

以上續會要

高宗紹興四年七月二十九日熙河蘭廓路經畧統制
熙秦兩路軍馬闕師古言本軍所管戰馬不多乞支撥

川茶於洮岷州界博換應副使用詔令宣撫司支茶博
馬亦令本司別作相度多方應副五年十月四日樞
密院言已降指揮於永康軍威茂州置場以茶博馬并
文州等處買馬其當職官如博買到馬數多乞與推賞
詔每歲各博買到四尺三寸以上堪披帶馬每一千匹
與轉一官如買到出格堪好馬更優異推恩仍令宣撫
副使邵溥同提舉買馬官趙開措置疾速廣行博買及
於宣撫司選差諳曉馬事屬官一員專一在諸州軍催
促博買候見就緒亦當推恩七年閏十月二十七日宰
臣趙鼎言得旨復置茶馬官舊有主管茶馬同提舉茶
馬都大提舉茶馬凡三等上曰此猶轉運使副判官之

比也若擇得人當考其資歷命之茶本以博馬而近來
猶聞博珠玉及紅髮之類珠玉今日固無用紅髮特為
馬之飾而已亦何所用須一切禁止 十三年八月三
日詔叙州通判依崇寧三年指揮許行辟差才幹官管
當買馬職事從都大提舉茶馬所請也 十月三日都
大主管成都府利州熙河蘭鞏秦鳳等路茶事兼提舉
陝西等路買馬監牧公事賈思誠言茶馬司措置般運
茶貨博買西馬所有茶事通判縣令合同場監官及買
馬都監全藉有材幹官究心職事更能辦集自軍興後
其轉運司多不照應條法却將本司合專辟并同共奏
差窳闕更不選擇人材止以名次高下一例出闕注擬

多致非材曠廢職事乞下逐路轉運司遵依敕條施行
吏部勘當欲將洋州西鄉知縣興州通判長舉順政知
縣階州都監興元府監稅兼合同場官並令本司依敕
條辟差施行從之 十四年二月十一日都大提舉茶
馬司言諸買馬司幹辦公事官任滿催督諸場買馬歲
額數辦提舉司保明與減二年磨勘不及八分展二年
磨勘契勘川路歲額黎州三千匹文州一千匹叙州八
百五十匹長寧軍三百九十五匹內叙州長寧軍並係
羈縻遠人除叙州及額外其長寧軍累年不敷歲額所
屬官合得酬賞保明未得欲乞許令本路將諸處通計
若敷及歲額即依條保明推賞詔許權將黎文叙州三

處溢額馬數通計推恩仍戒約長寧軍不得因而廢弛
十六年四月二十七日御史中丞何若言四川茶馬
司逐年起發馬數差人管押赴行在交納緣所差牽押
兵士別無交替道路遙遠經步月日人力既自疲乏加
之在路草料間有不時其馬多至死損甚者十之四五
牽押兵士恐坐罪責往往遁逃况馬綱所至州縣懼怕
羸馬在界倒死却乃支折價錢遣促起離人雖受錢馬
不得食適以為害欲乞將四川茶馬司綱馬走行在交
納者並依廣西路已得指揮自起發州軍差使臣將校
等外其牽押兵士逐州軍交替遇有起發綱馬預行關
牒前路州縣仍乞申敕提舉綱馬及檢官司嚴行督察

所屬州縣遇綱馬到驛即時支給本色草料並不得折
支價錢其合差承替牽押兵士去處前期差定如敢違
戾重作施行如此則人不致於涉遠逃亡馬不至於闕
食倒斃詔令四川茶馬司參照已降指揮措置申樞密
院 十八年七月一日詔南平軍買馬每歲權以三百
匹為額候及三年取酌中之數立定歲額令茶馬司比
類諸場條格賞罰施行從兵部所請也 八月十六日
都大主管成都府利州等路茶事兼提舉四川等路買
馬監牧公事韓球言川路諸場買馬內南平軍所買到
並係出格良馬堪充披帶昨點檢得本軍遞年買馬比
元初措置年分並各虧少緣本軍僻在一隅難以檢察

照得叙州年額買馬專委知通主管內通判從本司依
文州條例奏舉其本州所買馬十無一二堪充起綱今
相度欲將叙州通判員闕充易南平軍通判從本司依
條奏舉其叙州通判員闕依舊歸還轉運司使闕從之
十一月二十四日韓球又言買馬州軍官員諸色人
違法與蕃蠻衷私博馬本司已立賞出榜禁止訪聞尚
有窮乏之人不顧條法却販茶綿等前去買馬附近沿
邊州軍誘引蕃蠻將馬前來中賣如威茂州後蕃係接
連熙河亦嘗有蕃蠻將馬前來與諸色人博易不唯寢
久有壞馬政兼恐引惹踏開生路於邊防不便欲望將
本司見管巡捉私茶使臣并買馬州軍管下巡尉許令

巡提諸色人私與蕃蠻博馬內有透漏去處以匹數比附透漏私茶條法斷罪施行從之 二十年十一月一日詔都大提舉四川茶馬司幹辦公事官一員依舊於遂寧府置司從本路諸司請也二十二年二十一日詔四川都大提舉茶馬司起發綱馬所差管押使臣往往不識馬性飲餽失時致損斃數多虛費財計可令吳璘楊政每綱選差慣熟有心力諳曉養馬使臣二人將校一名醫獸一名兵士二人添破本等驛券錢米專充管押其牽馬人兵令茶馬司依例差撥賞罰見行條例二十三年五月一日樞密院言茶馬司差使臣等押到馬綱內有瘡疥瘦瘠馬數依近降指揮更不推恩若本

綱馬內有瘡疥瘦瘠依寄留倒斃馬數除豁及依得見
行條法不礙推賞詔依舊格推賞施行 二十五年三
月十四日詔西和州宕昌買馬自來用茶博買緣客人
艱於般運却將茶於松下博絹前去可令茶馬司措置
自後兼用茶絹聽客人從便博買 二十六年六月三
日利州西路安撫使御前諸軍都統制吳璘言宕昌馬
場年額買到馬十分為率內撥二分應副支使其茶馬
司自紹興二十一年至二十五年分應副二分馬共三
千六百餘匹未曾支撥緣璘見管入隊馬七千餘匹皆
齒歲過大若三五年之間盡不堪乘騎不惟虧損馬額
亦恐緩急有妨使喚乞下茶馬司將紹興二十六年合

撥二分馬依元降指揮早賜支撥所有拖欠以前年分未撥馬數恐難一併支撥欲乞作五年帶發支赴本司所貴緩急不致闕事詔令茶馬司將二十六年已後合撥二分馬依已降指揮應副不得拖欠其積下馬逐旋收買補發 十二月十二日樞密院言黎文叙州長寧軍南平軍等處互市買馬以銀絹錦綵折博近年茶馬官韓球等或拘收正色銀絹輒將他用却以積欠物數兌博馬致欠少客人馬價或大估銀絹價充數或先給關子銀絹後時方到及諸州知通買馬官不法又借那支用或巧作從物等或賤買所博馬銀絹關子以致蕃客不肯將馬出賣詔令茶馬司將博馬銀絹等並預期

排辦即不得依前大估價錢及擅將他用留滯客人如
諸州有違戾去處按劾聞奏仍令四川制置司常切覺
察同日樞密院言茶馬司所差廂禁軍牽馬近年分差
不公如潼川府夔州路轄下州軍廂兵不足科儉人錢
引却於附近州軍越數料差前期追集雜役馬務官吏
雪令於秋冬間打生草餵馬却收所破草料入己人疲
馬瘠以故起綱多有倒損之數詔令茶馬司今後遇起
馬日依數差撥即不得前期料差雜役其偷盜草料官
吏令本司常切覺察如有違戾按劾聞奏 二十七年
二月十一日樞密院言茶馬司歲額收買西馬西和州
三千六百餘匹除二分七百二十匹應副四川制置司

外餘數并階州五百匹循環撥付殿前馬步軍司詔令
茶馬司於西和州階州歲額外更措置增添博買先具
每歲添買數目申樞密院 三十二年五月四日總領
四川財賦軍馬錢糧專一報發御前軍馬文字並權提
舉秦司買馬監牧公事王之望言承成都府都大提舉
茶馬司牒分撥利州以東至陝西州軍并興元府洋興
州等處權茶買馬職事照得被受前項指揮止是並權
提舉秦司買馬監牧公事所有茶事未曾承準指揮未
審今來如何繫階詔依見今川司提舉王鼎繫階帶茶
馬職事以上中興會要 孝宗隆興元年四月七日四
川安撫制置都大提舉茶馬成都府路提舉轉運司舉

黎州歲額買馬三千匹全藉知通同共措置通判闕元
係茶馬司奏辟昨緣一時申請併歸銓選憑不得人難
以責辦乞從茶馬司依舊法選官奏辟吏部勘當欲依
逐司所乞從之乾道元年二月十四日四川茶馬陳玘
作奏臣契勘本司舊管幹辦公事三員準備差使二員
緣近降指揮止存幹辦公事二員竊恐本司管四路事
繁地遠全藉屬官分責與他司事跡不同欲乞復置幹
辦公事一員仍乞許臣選才辟差免致闕悞從之同
日又奏馬政為今日要務比年官屬曠職寢成廢壞欲
乞將茶馬司元辟差闕依祖宗舊法內除守臣係朝年
選授如有貪懦不職按劾以聞其餘許從本司辟置或

已在任待闕人亦計臣銓量庶幾人知勸沮悉皆激厲
詔買馬州軍通判今茶馬司依舊法奏辟 七月八日
四川宣撫使吳璘奏準樞密院乾道二年四月五日劄
子提舉四川茶馬陳彌作奏本司買馬係川秦兩司文
黎玘叙南平長寧軍六州軍年額川馬五千六百九十
六匹係應副江上諸軍階之峯貼峽西和之宕昌兩處
年額共買馬四千一百五十匹係輪年應副三衙緣奏
司去本司二千餘里專委本司屬官前去措置收買自
八月開場以來只買過馬二十八綱近據屬官趙永申
自十月十五日以後將及一月無匹馬到場續得宕昌
買馬官王德俊中准宣撫司分委屯駐將官收買進馬

不限數目竊見宕昌峯貼峽雖係兩處置場地里相距
不遠只洮疊州一路落客前來入中自至市以來止有
此數若是本司與宣撫司爭買不惟落客觀望重有所
激又兩司各不相照致有私販實為未便欲乞將秦司
馬併於宣司買發本司依年例應副茶帛庶幾事權歸
一其濟國事照依臣今契勘宣撫司自隆興元年被旨
收買進馬節次發過馬四千匹並係續獻任內兩司各
無相妨自陳彌作到任本司又得旨買發進五百匹每
匹價錢止是二百餘貫茶馬司價錢比本司非不高大
止緣茶馬司拖欠落客價錢致馬來少今却稱臣高價
攬買緣臣所買進馬並係續獻任內自有年月可考即

與陳彌作到任後買馬並無相干兼照祖宗成法專置茶馬司措置買馬他司不得干預况宣撫司事務繁冗難以更與茶馬司在買馬之責乞下茶馬司遵守成法從之 九月一日吏部狀準都省批下四川茶馬司奏檢察買馬非祖宗舊制緣本司一時添置初無毫髮之補月費俸給三百餘千占役吏卒四十餘人無以支給不免侵移博馬錢帛致欠蕃蠻馬價為害非輕欲乞依法省罷所有買馬職事乞依舊法令知通監押協力任責從之 十月三十日戶部准都省批下四川茶馬契勘階州知通係堂除非本部關准乾道元年指揮買馬州軍通判許令茶馬司依舊法奏辟從之 十四日四

川宣撫使司奏據茶馬司申川秦二司元管屬官八員
因併秦司歸川司裁減三員後來又減罷川司兩員見
存三員各分一員專一主管成都興元遂寧府簽廳今
於鳳州河池縣置司所有簿書倉庫儲積之類必藉屬
官管幹欲乞於減罷秦司屬官三員內再行辟置秦司
幹辦公事兩員一管幹宕昌買馬事務一管幹河池縣
秦司簽廳令本司於京官內踏逐諳曉馬事之人奏辟
乞賜敕奏契勘未軍興以前陝西岷階州并川路歲額
買馬共八千七百四十六匹今每年買馬一萬九百六
十六匹比之元立歲額委是歲多闕官分幹欲乞許令
辟幹辦公事準備差遣各一員詔時許添置準備差遣

一員令本司辟差 五年二月二日四川茶馬司奏准
隆興元年續贛申獲降指揮將諸處捉到私茶依龍安
縣體例如園戶犯私茶及十斤以上其戶下茶園估價
召人承買五分沒官五分還犯人田價竊詳申請本意
止謂禁絕園戶不得私賣與販人虧損官課今來園戶
或有批歷違限或有歷不隨茶或有借歷批賣或有茶
數與歷內不同之類甚多州縣一例拘沒茶園致窮民
破家失業欲望特降指揮若不係正犯私茶只乞照應
見行條法斷罪理賞免行拘沒茶園得旨今後茶園戶
私販茶並依舊法其續贛申請指揮更不施行 四月
十四日兵部申茶馬司差使臣自成都府及興元府押

馬至漢陽軍馬監全綱至倒斃不及二分減半年磨勘
倒斃至留及二分至不及三分展二年磨勘倒斃寄留
及三分降一官資每增及一分更展一年磨勘餘分數
率此通展若綱內看驗得瘡疥瘦瘠合依寄留倒斃馬
數除豁今來茶馬司所發綱馬到監寄留倒斃數多取
旨詔今後茶馬司所發綱馬到監將寄留倒斃及四分
已上押馬使臣并所押綱馬令趙樽差人管押赴樞密
院聽候指揮 七年五月十二日四川茶馬司奏照對
本司黎文叙州南平軍等處互市綱馬專用錦絲折支
本司自置錦院一所盡拘織機戶就院居止專一織造
不許在外私織昨奉朝廷下成都路轉運司織禮物錦

一千匹緣提舉官在秦司其轉運司徑行勾差本司錦
院機戶就近織造致機戶夾帶私織販賣竊慮事妨馬
政今後如要織禮物錦欲乞行下諸司將合用官錢付
本司就錦場織就撥赴諸司起發庶可革私販免害馬
政從之 二十七日四川茶馬司奏宕昌隸西和州通判
係本司辟官專一措置買馬緣知西和州係武臣通判
職事非一不容專往宕昌今欲添差通判一員不敢創
置止於本司屬官內差京朝官幹辦公事兼知主管宕
昌簽廳職事請給人從依舊非唯職任專一司中園戶
收販茶子入蕃界已有申獲罪賞指揮近有將茶苗公
然入蕃博賣深屬不便欲望行下並依茶子罪賞施行

事送部檢照紹興十二年指揮園戶輒將茶子轉賣入
蕃及買之者並流三千里不以赦降原免告提賞錢五
百貫園戶籍沒入官州縣失覺察并透漏當職官並徒
二年科罪照得茶苗栽種不過二年便可採摘此茶子
為害尤重今欲下刑寺審覆行下本司遵守施行從之
三年二月六日執政進呈陳彌作言乞免四川茶馬
司積欠綱馬却從日下年分催促上曰可依所陳行下
自此立罪賞苟或違戾必重作行遣詳見此門茶馬
四年三月十七日四川宣撫使虞允文奏照得祖宗朝
都大提舉買馬官於秦州成都各置司居治各半年排
撥月分居秦司訖事即歸川司措置發茶并買馬監申

之類令欲依倣舊制於鳳州河池縣置秦司既近宕昌
買馬之弊可以稽察又措置收養最為便利從之 同
日四川宣撫使虞允文言都大茶馬司應副三衙歲額
馬共三千五百五十五疋累年常是拖欠一千匹上下
自張松到任於去年八月開場至今年正月終買發數
足望於松職名上特加陞進以為方來之勸詔特與轉
一官 五月十五日四川茶馬司奏檢准令節文文州
買馬通判秦舉知縣以上資序人又準隆興元年本司
奏乞將文州通判從本司奏辟吏部行下令同本路提
刑轉運司審度連書保奏今逐司奏文州買馬係興化
外蕃交易全藉通判措置招誘舊係茶馬司奏差後緣

一時申請今本路運司銓注竊慮不得其人難以責辦
職事若從茶馬司依舊選官奏差委是經久利便吏部
再勘當依逐司審度到事理施行從之 七月十二日茶
馬司奏川秦馬司互市之地惟西和階州並是西馬比
諸州為最上歲管四千二百七十疋應副三衙并四川
宣撫使司本司津致茶帛應副博買歲費壹百餘萬全
藉所屬州郡禁戢私販招誘蕃商協力起辦今文黎等
六州軍知通並帶主管買馬事西河階州舊法止是提
舉買馬並不帶主管買馬事兼兩州通判未係本司奏
辟馬之增損既無賞罰全不介意照得宕昌等處即非
無馬止緣知通不識縱容盜販減尅茶帛若不控告朝

廷無緣革弊欲乞將西和階州通判依乾道元年指揮
從本司奏辟仍一依文黎等州知通專一主管買馬事
賞典亦比類文黎州見行條法如買馬不及九分已上
展磨勘三年知通並令赴本司批書候馬額足日放行
庶幾州郡有所懲勸不致有悞馬政批送兵吏部勘會
申奏兵部契勘岷州買馬自來係專委都監其知通止
是提舉今令知通專一主管買馬不須更差都監庶事
權歸一吏部兼通判可以督責本州界內蕃兵防護馬
客及措置應辦草判禁止私販委為利便乞從本司選
辟諳曉馬政之人若買馬充額除依關外四州合得邊
賞外仍依已得指揮將通判買馬酬賞推給又有西和

州茶場監官一員緣極邊無賞文臣不願就本司止差
小使臣權攝多不辦事契勘本處收支買馬錢銀茶絹
動計數百萬全藉廉勤諳曉錢穀官管幹欲乞從本司
於文武四選通辟許依關外四州合得邊賞外如仕滿
錢物無欺弊乞減二年磨勘選人循一資庶幾有以激
勸率皆效職從之 六月五日宰執進呈殿前司使臣
李師勣押馬倒斃之數虞允文奏曰自蜀至漢陽止寄
留二足自漢陽至此皆平路却死損幾半見存者皆瘦
瘠不堪乞重作行遣上曰宜從重典仍先令殿前司取
問因依梁克家因奏李舜舉昨有劄子云取馬軍兵多
東南新募之人不諳馬性今後取馬乞於效用內選差

臣未以為然。蓋取馬類有賞，舜舉所云殆為效用轉資之地。上曰：然。允文奏曰：臣昨與舜舉言，今後取馬不如差闕馬官兵自往馬既着脚，自然護惜不致損斃。舜舉亦以為然。上曰：極是。前未有講論及此者。部押使臣亦須差訓練官以上庶幾軍校有所畏憚，則公路不敢怠於芻秣矣。允文奏曰：俟招三衙與之議定，別議指揮進呈。上曰：甚喜。九年二月二十一日，樞密院奏勛會四川茶馬司起發到三衙綱馬赴行在，並經由承旨司審驗所有江上諸軍理宜措置，詔令總領所遇綱馬到並須審驗格尺齒歲，具有無齒老病患，依小數目申奏。二十三日，樞密院奏所置漢陽軍收發馬監遇茶馬司。

發到綱馬並許歇泊一月將肥壯無病者排發其病患
瘦瘠者責令看養醫治令到監日久病患瘦瘠者甚多
未堪發却有續到者各有臆分亦無病患顯是本監提
轄有失督責已降指揮委鄂州都統漢陽知軍同行提
點竊恐都統制軍務繁重漢陽知軍權頗輕難以責辦
理宜措置詔更令湖北漕臣每旬輪次到監提督依立
定格式每旬與見今提領提點提轄官連銜具申樞密
院仍關牒茶馬司照會施行 三月四日樞密院奏
勘會四川茶馬司近來排發綱馬到監比之每歲其數
數多竊所差使臣不行精選理宜措置詔令三衙并江
上諸軍取馬使臣並差七人衙官軍兵十將以上人充

令茶馬司先次排定綱分預行關報諸軍指期差人取押無致擁併積壓留滯各具知稟聞奏十七日四川宣撫使虞允文奏據都大茶馬司申自減罷提點綱馬驛程官後所發馬綱在路弊端百出委於馬政有害不敢盡復內乞差二員一員自成都府至興元府一員自興元府至漢陽軍令提點驛程仍乞許從本司踏逐申宣撫司差辟欲望降旨施行從之十一月十九日詔恭奉太上皇帝聖旨每年進奉天申節馬除四川宣撫司茶馬司文州許進外其餘殿前馬步司并諸路都統制並可自乾道十年為始免進提點綱馬驛程孝宗乾道二年四月十二日臣僚言四川茶馬司提點綱馬

驛程官每至州縣以點檢為名百端搔擾虛費生事有損無益已得旨將見任并差下人并罷專委逐州通判無通判委以次官御內帶人提轄綱馬驛程六字欲為望特降睿旨將廣南西路自靜江府至行在二員亦依今來指揮施行從之 七年正月十三日詔復置廣西路提點綱馬驛程二員一員於靜江府一員於撫州置廨宇從權發遣靜江府兼提舉買馬李浩請也 九年三月十四日四川宣撫使虞允文言勘會四川茶馬司至行在提點綱馬驛程三員已降指揮復置成都府至興元府興元至漢陽軍二員令茶馬司辟差所有漢陽軍至行在一員亦合差置詔復置漢陽軍至行在提點

馬驛程官一員令樞密院選差大使臣以上諳曉馬政
人充以上軌道會要

全唐文

宋會要

舊坑冶鑄錢事隸轉運司元豐初間以他官兼領至元祐元年以坑^冶鑄錢通為一司後時或以別司兼管云神宗元豐三年二月二十九日經制熙河路邊防財用司言秦鳳路坑冶^司不許本司經制乞令轉運使撥還已興置本錢如許經制乞發遣陳逌坑冶選人楊徽赴本司其坑冶如係本司初置並乞隸屬本司從之七月七日三省言江澗等路提點坑冶鑄錢司舊管五錢監近年江沱饒州增歲鑄額及興國軍睦衡舒邪惠州創置六監提點官一員通領九路水陸巡按不周欲增置

官一員分路提點詔以太常少卿錢昌武領淮南兩浙
福建江東東路李燾領荆湖廣南西路十月十八日詔
自今秦鳳路告發坑冶轉運司一季不興置即令經制
熙河路則用司管轄 哲宗元祐元年二月二日新淮
南等路提點坑冶鑄錢事李深言坑冶鑄錢舊隸一司
至元豐二年以荆廣淮澗分為兩路韶州岑水等場自
去年以來坑冶不發欵乞兩路提點鑄錢通為一司從
之仍每路特借錢一十五萬貫 紹聖二年八月十五
詔江淮荆浙福建廣南路坑冶場監官遇闕並令就近中
提點鑄錢司本路轉運司選差權官其課利及五萬貫
以上處令轉運提點鑄錢司互舉從福建轉運司請也

十一月六日詔諸路提點刑獄兼提舉坑冶事從江西
轉運副使馬城請也 三年二月二十二日詔諸路應
坑冶興發處並令提州司差官檢踏如可採水閤轉運
司施行 元符元年三月九日權戶尚書吳居厚言乞
今後令提點坑冶鑄錢司提江池饒建州合用銅每年
應副不及合從本路委不干礙官司劾治欠數限次年
春季補足從之十二月二十六日專切措置錢冶鑄錢
監事呂潛言應緣錢冶事乞並行倉法從之 徽宗崇
寧二年三月二十六日江淮荆浙福建廣南路提點坑
冶鑄錢司奏與廣南東路轉運司相度到乞韶州路木
場鹽官今後許通舉常調職官令錄并承務郎以上或

判司簿尉各年末五十曾經任人並與理本資序如一
任內收買銅貨通補及得逐年祖額承務郎以來轉一
官選人與改合入官如任內收銅不及祖額通比只虧
及五厘已下亦與降等酬獎內選人與改次等合入官
或與減京官舉主二員若額外增及一倍承務郎已上
更與轉一官增三百萬斤與減三年磨勘五百萬斤減
三年磨勘選人並比類逐等酬獎仍與占射差遣一次
及乞過提點司巡歷有監官或權官於本場作過虧失
課利不能幹辦亦許本司一面選官對替從之八月二
十九日詔除坑冶專置司自合依舊外逐路坑冶事並
令本路提舉司同共管勾 三年四月五日戶部狀據

荆湖南路提舉常平司申近承符勘會坑冶事撥隸提
舉常平司管勾外其轉運司并提點坑冶更有是何願
職本司契勘除舊管坑冶錢條轉運司應副過錢本去
處合隸轉運司提點坑冶鑄錢管勾外所鑄到錢入常
平庫送納於近降朝旨即無明文許與提點坑冶鑄錢
司通管詔自降指揮日舊來坑冶自合屬提點鑄錢轉
運司自後新置合隸提點司管餘路準此十二月五日
措置措置江淮等路銅事所狀契勘興置膽銅烹煎膽
土及踏發坑冶興修廢坑並係創發事務散在轄下州
縣多無正官不惟省部出閔無人指射兼本州所差權
官止是時暫苟祿不肯用心管勾職事兼契勘台州亦

嚴場亦係銀銅坑冶合差監官乞依今年六月十九日
兩浙路提舉司奏舉銀場監官指揮體例將本所不拘
文武官踏逐奉舉一次已後却令吏部依名次差注從
之 五年二月十五日詔內外冗官頗多不能振舉事
徒費祿廩提舉措置河東坑冶鑄錢司提舉陝西路坑
冶鑄錢司措置河北路鐵冶鑄錢司措置廣東路坑冶
鑄錢司專切管勾韶州岑水場買銅事措置磁邢相懷
州鐵冶公事河北鐵冶鑄錢司準備差使管勾踏逐窟
眼官淮南西路提舉常平司檢踏坑冶使臣以上可併
入逐路轉運使官兼管勾其官吏並罷 大觀三年二
月十二日提舉江淮荆浙福建廣東路銅事司言檢踏

坑冶官合置三員於使臣內抽差帶行舊請日支食錢
三百文省至今全闕人勾當緣出產寶貨多在深山窮
谷人跡不到之處須籍檢踏官分頭勾當緣是出入辛
苦所得微薄是致久無人願就今相度欲乞將見闕檢
踏官三員不問文武許從本司於見任或待闕得替官
選舉充仍乞依條給驛券一道從之九月十七日朝請
大夫新差江淮荆浙福建路提點坑冶鑄錢景山劄
子據本司進奏官申點南廣南路併歸本司緣景山未
曾承准得上件朝旨未敢於衙內添入點廣路欲乞明
降指揮詔衙內添入點廣二字十月十五日工部狀江
淮荆浙福建廣南路提點坑冶鑄錢漳州置司并新差

江淮荆浙福建路提點坑冶鑄錢司事狀乞歲舉官并
添置管勾文字一員及勾當公事官乞於京朝官選人
內於見任得替闕待次人內指名奏乞特差支與見
任或前任新任請給驛券一道隨合入資序理任其赴
任得替并在任遇差出並破遞馬遞鋪遇差出轄下勾
當其應干禁約並依監司屬官法及乞添公使錢虞部
今取會到逐路鑄錢司每歲舉官員數不等今勘當欲
乞令虞漳兩司各歲舉承務郎已上大小使臣陟通
逐路共不得過八員承直郎已下改官不得過四員所
有乞差管勾文字官自合遵依大觀元年二月十三日
并今年五月十五日朝旨并批狀指揮施行尚書左選

勘當所舉承務郎已上充陞陟任使欲依條比侍郎左
選已勘當歲舉改官員數減半奏舉二員尚書右選勘
會欲乞許令逐司歲舉陞陟大使臣三員詔逐司每歲
各支破公使錢三百貫內虔州提點司許添差勾當公
事官一員餘依逐部勘當施行其勾當公事官奏舉請
給等依所乞 四年四月二日臣僚上言伏覩大觀二
年三月八日敕諸有治虔並縣令兼與正官一等賞罰
九月十四日敕諸路銀銅坑冶並令兼管其賞罰各減
正監官一等三年正月十九日敕應有治虔知縣每月
一次到治監點檢催督如違杖一百臣竊謂縣令之職
當先責以治民要在宣導朝廷德澤使流通而征賦獄

訟各得其平不專為課利設也百里之內事隨日生雖
敏健者為之猶恐有不暇給今諸有坑冶者皆崎嶇山
谷中往往去縣不下五十里亦有多至五七處者又皆
散在四境之內必責令魚管又每月遍行則縣事必有
廢弛積滯力所不逮且既有正監官專任其事於法所
應當辦者今豈得違不必使之兼管均受賞罰也此皆
是一時為提舉官者不完事理徒欲乘聲勢增重其權
妄有陳請伏望聖慈詳酌罷去兼管及每月一到之法
庶為令者得以專意治民不廢縣事非小補也詔大觀
三年正月十九日應有治處知縣每月一次到治點檢
指揮更不施行九月二十四日戶部奏提淮南西路提

舉常平司申光州固始縣申契勘本縣見管錢坑冶戶
一十四戶元係自備財力請射烹煉其所產課利舊係
爐戶認納每日鐵課稅錢入官元屬提舉常平司附歷
收管係買納入官應副鼓鑄夾錫鐵錢使用其坑冶鑄
錢司管幹近準朝旨應東南州軍鼓鑄夾錫鐵錢並罷
即未審所管坑戶合與不合依舊隸提舉常平司收納
課利依場務法召人買撲本部契勘坑冶先係屬提舉
常平司管勾昨為鼓鑄夾錫鐵錢司鼓鑄錢司今來既承朝旨罷
鑄夾錫鐵錢其上件坑冶自合依舊歸常平司今欲乞
申明行下東南路施行從之 政和元年二月二十七
日戶部工部狀準都省批送下江淮等路提點坑冶鑄

錢潭州置司狀乞將江池饒州三錢監年額所鑄上件
新錢向去一例依劍州已得指揮遞展兩月比較賞罰
等事狀後批勘會江淮等路提舉坑冶鑄錢司元申請
稱江池饒州錢監物料去處盡在深山高原去處其般
運緣故與建州錢監事體一般今來逐部勘當未至詳
盡兼敕鑄不敷與起發條限刑名重輕不倫重別勘當
金部契勘年額上供錢江饒州等申明依元符釐折條
限敕鑄發並承朝旨依所申等今來本司稱江池饒
州般運物料去處盡在深山高原與建州錢監事體一
般乞上件四監年額新錢向去一例依大觀四年四月
三十五日已得朝旨遞展兩月今勘當欲依本司所乞

外所是刑名輕重合取自朝廷指揮工部今勘當欲依
本司所乞事理施行所是鼓鑄不敷除合依崇寧法斷
外有起發條限刑名係屬戶部更乞朝廷詳酌中間事
尚書省勘會除刑名不銷更改外詔依戶工部所申三
月十二日詔陝西河東興復鼓鑄夾錫錢寶雖令逐路
轉運司管勾緣漕司職事繁冗方鼓鑄之初頗有措置
恐難以兼領別致稽緩其陝西河東路可各差文臣一
員充專切提舉鑄錢中大夫提舉亳州明道宮許天啟
專切提舉河東路鑄錢朝散大夫胡簡修專切提舉陝
府西路鑄錢所貴事法寺一早見就緒二十四日工部
奏新提舉河東路鑄錢事許天啟劄之所有序官資任

人從請給之類乞指揮吏部準大觀元年四月八日敕
專一措置提舉河東路坑冶鐵鑄錢王栢序官請給人
役等依提舉常平官許天啟與提舉曾任陝西路轉運
副使詔許天啟與提刑序官 二年四月二十六日河
東路轉運提舉常平司奏相度到應金銀坑冶之利並
依元豐條法施行右曹契勘昨準朝旨山澤市場皆常
平職事悉以利民所用錢物令支常平息錢又續朝旨
自降十一件指揮日舊米坑冶屬提點鑄錢司轉運司
自後新置隸提舉司內提舉司所管坑冶收到課利物
色又准朝旨起赴大觀庫樁管應副朝廷移用及收買
到銅鉛錫鐵之類若他司要用又有法許樁錢充買魚

逐司所管坑冶事務各不相干課利設有虧耗自合措
置施行今來若將新舊坑冶並撥入轉運司有礙朝旨
本部今勘當欲下逐路提舉等司遵依見行條勅施行
從之八月八日江淮等路提點坑冶鑄錢廣東路提舉
常平司奏契勘廣東路鐵坑久來並隸轉運司續準朝
旨應干新發鐵坑除舊屬轉運司外盡歸措置銅事司
昨因鼓鑄鐵錢遂準朝旨撥隸提點司後來罷鑄夾錫
鐵錢又準朝旨令提點司推買收息出賣復準朝旨令
提點提舉常平司管勾逐司令契勘廣東路出產鐵貨
不多自來不曾推買收息出賣經久難以施行今相度
欲將廣東一路鐵坑舊屬轉運司提舉常平司者即合

歸逐司管勾並依前後條法施行堪置場官監依治法
拘收到利若苗脉微細不堪置場官監即所隸監司立
定年額課利錢數召人買撲所有韶州岑水場要用錫
鐵浸造膽銅即令鑄錢司支撥銅本錢就便收買使用
詔依逐司所申十二月七日江淮荆浙福建廣南路提
點坑冶鑄錢司奏欲乞於諸路州縣場監應有本司錢
物去處並許本司每年於別路或鄰州選差清疆官一
員前去點檢根磨其所差官不許辭免除請給外別添
日給驛券一道仍破遞馬一疋出過百日即乞理為考
任差破人吏二名除依條合得差出日給食錢外更日
添一百文省各與差破遞馬所屬官司承受取會文字

並限二日報如點檢得諸處官司弛慢不職欺隱失陷
本司錢物諸般違慢作弊內官員具職位姓名申本司
從本司取勘施行違慢人吏合所委官一面勘決若被
差官承受本司公文輒敢非理推故不即前去亦乞本
司勘劾依條施從從之十六日尚書省言勘會東南坑
冶雖專置提點坑冶鑄錢兩司分領管勾比歲以來課
利大段虧少致起辦鑄錢年額常是不敷有悞歲計具
逐司提照官坐視闕乏全不用心措置兼坑冶苗脉興
發採礦烹煉盛衰不常近據虔州具到所管坑冶五十
餘處其潭州狀稱所管坑冶共止九處內五場久無課
利只有四銅場並皆坑窑取礬深遠下手興工採打不

行若不令兩司通共那融應副歲終案同比較嚴立殿
最之法則事難辦集無以勸沮今欲擬修下條提點坑
冶鑄錢官以兩司應管錢監每歲總計合鑄錢數比較
增一分以上減二年磨勘三分以上減三年磨勘五分
以上轉一官虧一分以上展二年磨勘三分以上展三
年磨勘五分以上降一官右入江淮荆浙福建廣東路
提點坑冶鑄錢司格諸提點鑄錢輪委提點刑獄司非謂
所在路分者索取兩司應管錢監總計合鑄錢年額
歲終案同比較具增虧實數擬定合該賞罰保明聞奏
右入江淮荆浙福建廣南路提點坑冶鑄錢司并提點
刑獄司令諸提點刑獄司歲終比較保明到東兩提點

坑冶鑄錢官應副鑄錢增虧五分以上者依格賞罰外
取旨陞降差遣右入三省通用令一時指揮一勘會東
南坑冶歲收課錢監鼓鑄年額近歲增虧多寡不同今
來提點官既立歲比數最賞罰其年額理宜重別參酌
立定欲令所屬將應管坑冶及錢監內從來無額或連
年增虧去歲各取政和元年以前五年實增實虧數目
逐一參照酌中立定新額具委無輕重不均限一月保
明申尚書省其提點官員賞罰候立定新額比較施行
一勘會東南坑冶鑄錢近歲收越多不敷額連年虧欠
今來專立提點坑冶鑄錢官殿最賞罰全籍所委官盡
心比較務要賞罰公當仍先自虔潭州比近江南東路

提點刑獄司為頭取索比較以後逐年輪轉交割與以次相比路分管勾比較施行一今來新立提點坑冶鑄錢官殿最法如舊法別有專立賞罰者自合依舊各行引用若內有相妨者即從重施行兼提點提轄官既厥立殿最之法及約束措置賞罰并檢點官亦已增賞及弛慢許奏劾銜罷外其諸路坑冶鑄錢監官亦合別增賞罰緣舊法輕重不一欲令提點提轄坑冶鑄錢官將應干監官賞罰參酌重加增立務要督責辦集仍限十日擬立尚書省檢點約束勘會諸路坑冶及鑄錢其所屬監司州縣從末避免應副多不興舉故朝廷專委官前去提轄措置自當檢察州縣督責應辦訪聞所委提

點提轄措置官屬惟務收受餽送不敢盡公措畫致奉
行減裂課入虧額鼓鑄不敷兼東南提點坑冶鑄錢官
既已立定歲比殿之法及諸路所差提轄官亦已約束
措置賞罰外若不遵司差官分頭檢踏及支借錢本雇
工採打并增立賞典優加俸給禁止收受供饋則事難
辦集今措置到下項一河東陝西河北京西京東路所
委提轄措置坑冶鑄錢官下各已降朝旨許差檢踏官
二員外欲江淮荆浙等路提點坑冶鑄錢處準兩司各
差置檢踏官三員一諸路坑冶檢踏官並許於承務郎
以上或選人大小使臣內踏逐諳曉坑冶有心力人充
仍具名奏差應採訪興發或有苗脉處並躬詣檢踏得

實其地不以官私皆許支破錢本差人採取烹煉或人
兵不足及無會解之人即許雇募人工採打或召人戶
開採應一行用度以至燈油之類並許召保借支官錢
應副候烹採到寶貨先行還官外餘充課利若開採不
成及無苗脉或雖有而微細其所借官錢並與除破即
不得過三次若據開採到數能補還所借官錢者雖過
數仍許豁除別行支借以上並委當職官子細勘驗支
借不管透誤大支如敢冒借或大支罪輕者並徒三年
許人告賞錢一百貫仍並同本縣官採取其本縣官不
肯用心許申提舉提轄司改差他官如委有苗脉者前
官重行黜責若能檢踏興發立成課額者其檢踏并被

差官並依檢點官增賞一倍一檢點官以三年為一任
隨所理資序給本身及見任或前任請給仍支驛券遇
出入檢點別支券馬一應提點提轄措置坑冶鑄錢官
屬並不得受例外供饋內檢點官不以有無創冊並不
許收受諸般饋送以上如違其收受并與之者各以自
盜論一勘會坑冶興發全籍檢點官協力盡心公共相
視檢點除已增立賞典優給請俸外如有不切用心相
視檢點弛慢不職之人仰所屬提點提轄措置官奏劾
先次衝罷當議重行黜責從之三年正月二十二日
尚書省勘會昨會西路提轄坑冶鑄錢官係提舉京西
陝西州路銀銅坑冶鑄錢事務今來除陝西京西路已

各差官專一提轄措置外其川路即未曾專行差官緣
川路甚有金銀等坑冶興發竊慮無專差官提轄措置
因循隨廢走失山澤利源深為可惜詔令陝西路提轄
措置坑冶官兼提轄措置川陝坑冶應有合行事件並
依大觀三年四月三十日及今年陝西已得指揮施行
二月十二日提轄措置京東路坑冶司狀今條畫下項
乞將勾當公事官一員改作檢點官一員將來差到正
官如能用心究尋或招誘使人施功因而自探得見苗
脉能興山澤厚利許本司臨時參詳其功力課利保明
申奏乞朝廷量事推賞一路新坑有人陳告便令措置
下手開發其所用錢本等深恐所屬不應副乞所屬以

轉運司係省錢物權行應副候將來收到課利中取朝
廷指揮依數充還等畫一候指揮檢會政和二年九月
二十四日敕河北路坑冶改勾當官一員充檢點官政
和二年十月十一日敕京東路坑冶辟置官屬依河東
路措置坑冶司所得指揮勘會除第一項已降指揮外
詔應緣坑冶本司錢遇闕許於常平司封樁書戶長錢
內支借餘路依此並免執奏餘依奏九月二十四日權
發遣提轄措置河北坑冶鑄錢季著奏檢承崇寧四年
十一月二十一日朝旨節文本路錢監州通判並依河
東已得指揮勘會磁州見置錢監及鑄錢院
公籍通判管勾今本州通判劉洙準河東路提轄措置

坑冶錢監司奏舉充隆德府通判今來若從河東坑冶
錢監司所辟顯於本路錢監州却有妨闕伏望許存留
劉洙依舊仕任候今任滿日再任一次詔鑄錢司舉通
判指揮更不施行 四年五月十五日江淮等路提點
坑冶鑄錢司奏承勅潭州提點鑄錢司復移於饒州置
司續奉聖旨鑄錢司更不復移本司契勘若移司饒州
便於奉行職事止在潭州必見闕事伏望更賜詳酌詔
只就饒州置司五年二月十八日河東路提轄檢點措
置坑冶錢監司奏承朝旨節文鑄到錢每季令提刑提
舉司分詣再行看揀別無麓惡不堪方行行用契勘本
路諸監院每季鑄到錢直至次季看揀了當方許支估

其被差官有事故或先承他司差委者有經半年未曾
看揀委是有妨應時據撥支遣今乞將諸監院每月鑄
到錢於次月內令提刑提舉司再行看揀如逐司官巡
歷未到不能親詣即乞令逐司於上旬內就錢監院隣
近州縣差官看揀如被差官先承他司差務除軍期急
遽外並乞限三日先次起發於當月內看揀了當方許
承當別司所委事又提轄措置河北路坑冶鑄錢司奏
乞應提舉提刑司所差看揀錢官並依貢舉差試官法
限三日起發如敢託故推避或本州別作名目占留不
為依限起發並乞朝廷立法加以刑名約束看詳今除
三路係應副軍期不可緩慢以每月餘路每季差官看

據外今擬修下條諸提舉常平提點刑獄司河北河東
陝西路每月分詣錢監院看揀已鑄到夾錫錢如親詣
不及計程前期差官須管於本李本月終到監院
錢春季終正月錢正月即被差官他司不得差委若承
終所差官到監院之期即被差官他司不得差委若承
他司差者俟看揀畢聽赴
諸被差看揀夾錫錢官不赴期到監院若妄託事故避
免或官司別作名目占留或輒差委者各杖一百即差
委後時致所委官赴期到監院不及者止坐所差監司
監司應親詣而右入政和錢法救從之四月十六日江
淮荆浙福建廣南路提點坑冶鑄錢度州司奏昨饒州
奉水場措置版興煎銅之法本場收到煎淋銅二十七

萬一十斤舊米每年亡收膽銅三十餘萬因本司措置
煎添煎淋渣銅等遂收及六十餘萬斤其煎淋銅功利
不小永遠歲歲得銅鑄錢補助上供詔提點官并措置
官各與轉一官同日詔近差倉部員外郎徐裡措置東
南銅令徐裡將東南路舊坑所出寶貨一就措置七月
十一日尚書省倉部員外郎措置東南西路坑冶寶貨
徐裡奏坑冶興發莫盛於今日然而有司憚於應副州
縣以為生事或隱而不告或檢點不以實或興置年深
未曾立額或有額而無收或有收而無額或有祖額而
課利虧欠或因人戶自陳便行停閉由是官更得以肆
姦豪強得以擅利積弊若此稽考何從逐路如檢點得

有司州縣依前苟簡措置失當欺隱妄謬當職官吏乞
許臣按劾取旨黜責從之十二日措置東南坑冶實貨
司奏本司元降朝旨屬官當直人依奉使條格今未蒙
本司差委逐路深入遠惡山險去處所有人從親隨擔
擎人并吏人所乘逆馬乞依轉運司管勾文字官差出
法從之八月二十八日江淮荆浙福建廣南路提點坑
冶鑄錢饒州置司奏承尚書省措置東南坑冶事件內
虔潭兩司各差置檢點官三員並許於承務郎以上或
選人大小使臣內踏逐諳曉坑冶有心力人充仍具奏
差二年一替契勘本司所管路分廣濶若候奏辟官到
司差發前去檢踏竊慮後時今欲從本司一面於見任

或得皆待闕京朝官大小使臣及選人內踏逐推行依
額選差分頭前去其所差權官合破請給人從券馬等
並乞依政和二年十二月十七日朝旨施行候奏辟到
正官日住罷詔依權官令本司具名申尚書省差九月
七日江淮荆浙福建廣南路提照坑冶鑄錢虔州司奏
檢會元豐二年中書省劄子江浙等路提照坑冶鑄錢
司提照官一員通轄九路水陸廣潤巡厯難為周遍欲
添置官一員與見任官分領提照一員於饒州置司提
點淮南兩浙福建江東路坑冶鑄錢一員於虔州置司
提點荆湖廣南江西路坑冶鑄錢奉聖旨依續承明旨
通為一司通管九路就洪州置司又承敕鑄錢司分為

兩司提點荆湖南北淮南江東路坑冶鑄錢事虔州置
司提點江西兩浙福建廣東西路坑冶鑄錢事近承朝
旨將潭州司復移饒州依元豐年所分路分契勘本司
所管坑冶場昨因發運司申請欲將提點鑄錢官一員
於虔州置廨宇一員於潭州置廨宇詔依兩司各認見
今所管路分已是勞逸得均方成倫序偶於去年潭州
提點官丘括具陳乞移潭州司於饒州置司竊緣當時
分兩司各自任責管勾職事今來饒州司不顧利害申
乞令虔州司更兼管湖南湖北兩路坑冶鑄錢職事緣
元降朝旨為地理遙遠難以周適及永興岑水兩處坑
場出產銅鉛物料最為浩瀚所以分令虔潭州各就近

出產處措置等今承饒州司申請意欲併令虔州一司
管勾應辦銅料不惟虔州司獨自花認自未分定兩司
年額責罰兼虔州司去湖南湖北路地理遙遠其饒州
司若不管勾湖南湖北路坑場錢監職事即更無任責
顯見別無職事欲望且令虔州提點一司依舊管勾見
今所領路分尚書省勘會除依已降指揮饒州置司外
詔所管職事路分並依潭州置司日所得指揮施行十
月二十四日提轄措置陝西川路坑冶催促鑄錢將奏
契勘本路坑冶久失措置亦有元未曾立額去處其
間縱有舊額增虧不如同州韓城縣兩場祖額各六
百萬斤陝西鄉縣金冶歲額八百兩比年以來全然虧

少今來若便以五年之數立為額不免減落課利兼恐
場治因此不肯用心又如號州朱場縣金場及陝府湖
城縣金場等處見今措置興發既許用常平錢穀即坑
冶本錢不闕欲乞一面且行措置催赴寶貨候至今年
終各見所入多寡自來年正月立為新額詔依所乞立
為永額仍令戶工部注籍拘收湏管赴辦收及新額候
至來歲終即具一全年逐州軍實收到新額物數別無
虧損係明申尚書省參酌多寡取指揮推賞如諸路更
有似此增立新額課利去處並依此仍具合增立額物
數申尚書省 六年三月十三日江淮等路提點坑冶
鑄錢度州司奏承救本司奏韶州岑水場措置煎淋膽

銅就緒詔提點官並措置官各與轉一官四月二十六日詔推行夾錫錢本以惠四方行之累年制作不精加雜錯易壞公私病之遂使惡錢流布錢輕物重不勝其弊已降指揮永不行用其提舉官等並罷五月十四日尚書省言諸路措置坑冶及鼓鑄銅錢未有令是何人管勾詔除鑄夾錫錢監院依已降指揮廢外其諸路提轄措置坑冶官吏並依舊存留六月十三日以尚書省言諸路坑冶除五路已有專提轄措置官并淮南荆湖北廣南東西亦已有監司兼管措置外其江南東西福建兩浙慮亦合差監司兼領詔江南東西路差轉運副使林虎江南西路差轉運判官張孝純福建路差轉運

副使翁彥國兩浙路差轉運判官王汝明十月十四日
陝西河東路宣撫使童貫奏契勘陝西路提轄鑄錢官
近已有指揮未得鼓鑄惟所領坑冶事猶依舊管勾竊
緣坑冶之利所出不見浩瀚虛設提轄官吏等委是冗
員欲望特降御筆將陝西河東路提轄鑄錢坑冶官並
罷所有見領職事並歸提舉常平司詔令常平司兼領
七年正月十八日尚書省言新授提舉東南九路坑
冶徐禮狀契勘坑冶置坊官監今來事初全藉廉勤之
吏協力勾當欲乞應坑冶監官從本司量見任可存留
廢罷并闕官處並踏逐六十歲已下有心力無過犯文
武官中朝廷乞下吏部差注與理本等資任不以有無

運礮權許辟差一次兼契勘坑冶置坊係是路僻去處
醫藥飲食皆非所便而又請給微薄不足養廉欲乞於
權買價錢內每貫剋留一十大充監官茶湯錢每月給
不得過一十貫文從之六月二十五日詔訪聞虔州饒
州提點鑄錢兩司官邇來不務通融銅寶致工匠有端
開之處仰兩司官輪年於虔饒州守任交互巡歷檢察
管下坑冶應干收支見任銅料各具聞報通融應副依
格敲鑄庶各供備無有不足之患七月二十三日奉議
郎借置荆西坑冶時君陳奏詢究得坑冶利原招置密
戶請射檢察兵匠開採已置成官冶催督收赴條到金
七百兩銀五千兩差勾當官劉克管勾赴都省呈納詔

時君陳轉一官九月十四日中書省言勘會近到朝旨
為諸路坑冶事務稍已就緒并催促上供柴炭不須專
置官司逐降朝旨京東京西河北路坑冶鑄錢司提舉
東南九路坑冶司專切根刷催促上供柴炭所並罷令
逐路提舉司箠運司兼領今未上為諸路所置專司官
屬稍多慮州縣艱於應辦又緣條令各已完備事法皆
已成緒即比事初不同理合裁損竊慮外路官司並不
體認朝廷意旨妄意觀望便將逐司已成法令公然廢
弛不為奉行則使山澤地利不歸公家在有蠹散又况
諸司前後所得朝旨等自合一一遵奉施行詔令逐路
提舉等司仰將逐件事務一一遵依前後所降朝旨施

行不得妄意亂有懸墜如少有不前官員並當停廢吏
人支配千里仍各具已知委狀聞奏 八年十一月十
四日江淮等路提點坑冶鑄錢饒州置司奏契勘江池
饒州錢監鼓鑄錢額上供全仰韶州岑水潭州永興信
州鉛山三大場并新發坑場收趁銅料應副全藉兩提
點官不住往來巡察等照會逐場相去遠近動涉三四
十程每遇出巡其不通陸路處自合乘船外有通陸路
去處又却道程迂遠理欲徑便乘船前去緣有礙大觀
四年三月二十五日指揮不免陸行却成迂滯恐為未
便今相度兩提點官如遇出巡管下坑場錢監點檢驅
催物料應副錢監鼓鑄上供額錢經由去處不以水陸

路並從徑便從之 重和元年十一月二十日江西路
轉運判官兼措置本路坑冶劉蒙奏興國軍大冶縣金
鷄山等處銅礦興發臣等欲望數奏申教諸路則已墜
之法庶幾復舉詔諸路元罷提舉坑冶官並復置仍丹
員數取旨其江南路令劉蒙同措置又詔除陝西京東
河北河東坑冶官不置外餘並依舊內東南九路坑冶
司減勾當公事二員京西路寶冶指揮候新官到日措
置消與不消招置具狀聞奏 宣和元年正月二十六
日都省言檢會金部貢外郎朱尹奏承尚書省劄子奉
御筆饒虔鑄錢司失陷本錢不少積年不曾勾考差臣
前去勾考仍委措置以鐵鑄銅事臣今叅酌范之才昨

提舉荆湖茶事出使條例盡到合行事件下項一檢會
昨范之才提舉南北兩路茶事差屬官四員今來措置
勾考東南諸路事務不敢故有陳乞欲只依上件體例
共差四員內一員充管勾文字官仍乞於見任或得替
待闕不以官朝官或選人內踏逐具名奏差所有資任
請給遞馬驛券當直人從并差破手分等並依范之才
已得指揮奉御筆屬官可止差三人其該載未盡依范
之才已降指揮仰別具申請餘依奏二月十五日新差
提舉東南九路檢踏坑冶鄧紹宓奏前官徐禔被差之
初有申請到畫一朝旨已經勘當今來復置合行照用
欲乞先次並依徐禔已得指揮施行詔序位請給支賜

人吏人從舟船遞馬驛券薦舉按察公使錢等並依江
淮等路提點坑冶鑄錢司條例施行 六年五月九日
新差權提舉京西南路常平等事雷勉狀奏窺利之輩
所夫苗脉不實唯在借請官錢遂成失陷欲望下諸路
委漕臣與提點官公共講究革弊之術如有告發坑冶
委提點坑冶官選委能吏同州縣當職官躬親詣地頭
監轄取打礦石烹試如委實有實即計其所出有補於
官許依條借請官錢仍令作料次隨其所出之實量多
寡借請及乞令召第三等以上稅戶保借無容似前泛
濫借請枉致失陷仍乞提點坑冶司聞報漕臣公共點
檢覺察詔令諸路提點坑冶官并兼領官條畫措置中

尚書省 七年正月二十四日詔陝西坑冶見差提舉
官一員巡按不能周遍可分京西別駕一路二月二日
詔諸坑冶興復之初全藉官屬專一提振諸路各置提
舉坑冶官一員仍並理提刑資序所用錢物並仰運司
應副如州縣官不切遵奉公然弛慢者按劾以聞內有
稽違觀望不職甚者並許先次放罷其實聞奏同日詔
已差官分路興復坑冶鼓鑄仰尚書省悉力舉行又詔
熙豐諸路鑄錢監十九處歲鑄新錢僅六百萬富國裕
民具載典彝即令東南惟存其跡如上供監分尚以他
錢代起廢法弛令莫甚於此利源所失動數百萬致公
私匱乏飲取百姓應廢罷熙豐以來舊鑄銅錢監分並

行興復仍委本路提舉及與監司郡守同共措置增敷
舊額鼓鑄不得鹵莽減裂應合行事件條具以聞三月
三日詔江淮等路提點坑冶鑄錢司官屬依照豐自數
餘路坑冶官屬並罷內舊坑冶隸轉運司者依照豐紹
聖法崇寧以後新坑冶隸常平司者依崇寧法提點官
令中書省選差十二日中書省尚書省言勘會已降指
揮諸路興復坑冶專差官提舉措置合行事件下項一
以提舉某路坑冶司為名一合用印記令工部行下所
屬限十日撓先鑄造以提舉某路坑冶司印為文并複
稱印匣等全一合用公廨並以舊提舉坑冶司廨舍充
如已被他司拘占或舊無處或全未提舉路分興舊不

同合於別州置司者即從便踏逐申尚書省未踏逐到
間許權於寺院治事一逐司各置管勾文字官一員勾
當公事官兩員檢踏官十員內管勾文字勾當公事官
差文臣檢踏官通差文武臣許提舉官於見任得替待
闕待次官內踏逐通曉坑冶次第人具姓名申尚書省
下吏部差一提舉官序位理任借服色舉官員數請受
供給公使錢當直并接送人兵迎鋪水路破船並依本
路提刑官本司管勾文字勾當公事官依轉運司屬官
檢踏官依提刑司檢法官見行條例施行其舉官員數
如提舉兩路已上者從一多舉一水路合破人船許於
本路州軍見管無違礙船內踏逐限一日應副一合置

人吏并書表客司通引人數并請給等並依本路提刑
司差破許於無違礙官司指名抽差限一日發遣不得
占劉如無或不足聽召募一應用紙扎朱紅發逆角皮
筒油單之類聽於隨處州縣取索應副合用價錢於係
省錢內支破一應取會事承受官司限一日回報其中
奏行移文字許入急遞仍令提刑司進奏官並行承發
一興復坑冶之初全藉州縣官協力措置如勸誘開採
寶貨浩瀚許提舉官保明聞奏當議優與推恩弛慢廢
職亦仰舉劾依降御筆坐違御筆之罪從之二十四日
詔陝西河東京西坑冶見三路共差一員官提舉路遠
山僻巡按不能周遍令伊陽銀坑興發可分兩路京西

差陳修免謝辭令疾速前去五月七日都省言檢準四月二十一日省同奉聖旨諸路坑冶令中書省檢會熙豐以來條制將上取旨吏戶工部供到熙豐舊置提點坑冶鑄錢官下項江淮荆浙福建廣南路提點坑冶鑄錢虔州置司提點官一員勾當公事官一員檢點官四員政和二年十二月置一員政和六年三月添置江浙荆湖福建廣南路提點坑冶鑄錢饒州置司提點官一員充京西路檢點京西路坑冶鑄錢及差置勾當公事官一員檢點官三員政和七年八月指揮罷重和元年十一月復置見條提點檢點措置京西路坑冶鑄錢司陝西路政和二年七月差官一員充陝西提舉措置興

復坑冶及差勾當公事官一員檢踏一員重和元年十一月指揮罷宣和元年十二月指揮復置宣和二年十一月奉御筆陝西坑冶司罷河北路大觀二年五月差官一員充提舉措置河北路坑冶鑄錢差檢踏官二員政和七年八月指揮罷河東路政和二年八月差官一員充檢踏措置坑冶及差勾當公事官一員檢踏官一員重和元年十一月指揮罷宣和元年十二月御筆復置宣和三年十月指揮罷京東路政和二年九月差官一員充提轄檢踏坑冶及差檢踏官二員政和七年八月指揮罷宣和七年二月一日都省劄子奉御筆諸路各置提舉坑冶官一員宣和七年三月十五日敕諸路

復坑冶專差官提舉措置逐司各置管勾文字官一員
勾當公事官兩員檢點官十員宣和七年三月二十四
日奉御筆陝西河東京西坑冶見三路共差官提舉路
遠山僻巡按不能周遍可分為兩路今具諸路見差置
官屬下項提舉荆湖南北路坑冶司提舉官一員管勾
文字一員勾當公事二員檢點官一十員提舉京西路
坑冶司提舉官一員勾文字一員勾當公事二員檢
點官一十員提舉陝西河東路坑冶司提舉官一員管
勾文字一員勾當公事一員檢點官一十員提舉廣南
東西路坑冶司提舉官一員管勾文字一員勾當公事
二員檢點官一十員提舉江南東路坑冶司提舉官一

員管勾文字一員勾當公事二員檢點官一十員提舉
京東淮南路坑冶司提舉官一員管勾文字一員勾當
公事二員檢點官一十員提舉兩浙福建路坑冶司提
舉官一員管勾文字一員勾當公事二員檢點官一十
員銅本錢舊坑冶隸轉運司熙寧已前係轉運司置場
權買其本錢係轉運司應副紹聖四年後來治戶無力
興工聽就錢監借措留錢大觀二年後來舊坑冶轉運
司闕本錢許借常平司錢收買新坑冶係崇寧二年三
月以後興發者隸提舉常平司置場官監處治戶無力
興工許借常平司錢俟中賣於全價內剋留二分填納
不堪置場召人承買處中賣入官價錢以常平司錢限

當日支還契勘諸路坑冶除江淮等路係提點司專領外其餘逐路坑冶職事未置逐司已前舊坑冶係屬轉運司崇寧以後新發坑冶係屬常平司詔提點坑冶鑄錢司官屬依照豐員數餘路坑冶官屬並罷舊坑冶隸轉運司者依照豐紹聖法崇寧已後新坑冶隸常平司者依崇寧法提點官令中書省選差高宗建炎四年三月十七日江淮荆浙福建廣南路提點坑冶鑄錢孫莊言本司歲用銅鉛錫鐵唯藉荆廣路坑場出產其合要本錢金卣二廣五分鹽息錢應副以地遠煙瘴前後提點官罕曾親到致官吏弛慢積弊百端今太后六官及從衛百司官兵已到虔州所有本司欲望許令於荆

廣路貽遂衝要軍州權置廨宇候太后六宮從衛百官
還闕日仍舊歸司徒之 紹聖元年二月一日都省言
訪聞江淮等路提點坑冶鑄錢司近來多是妄以坑冶
興發為名擅差見任城寄居待闕官充檢點官之類騷
擾州縣冗費請給令所在嚴行禁止如有違犯本司官
並被差官各以違制論請過俸給並計贓如實有坑冶
興發合差官檢點去處止許時暫遣見任官 二年五
月十一日詔鑄錢司鼓鑄錢寶歲有定數昨緣有司失
職鼓鑄多不敷額宣和二年五月二十六日指揮許取
撥二廣五分鹽息錢助買銅本近公然違戾將鹽息錢
更不買銅就便充作所鑄上供錢起發因此唯務拘刷

鹽息更不修舉鑄錢職事今後專責兩提點收買銅貨
應副鼓鑄仍每月開具收二廣五分鹽息錢數收買到
銅貨若干般發往是何錢監鼓鑄若干候歲終依法比
較賞罰如敢留襲久獎充鹽息錢直作所鑄上供起發
者並依擅行截使移易上供錢物法以提舉廣南路茶
鹽李永邁言韶州永通監自國朝以來年額鑄錢四十
五萬貫於本場買銅六分起付江池等州錢監外四
分仍舊鑄錢四十萬貫循環充本宣和二年始撥本司
鹽息錢五分充買銅本而錢額益虧乞還本司椿管每
歲可得錢三十萬貫以助經費故有是詔七月二十日
提點江淮荆浙福建廣南路坑冶鑄錢王暎言本司關

之本錢收有銅鉛物料以致課額虧損乞將本司年額上供錢內權借留一十五萬措置回易將所獲息錢充循環錢本其所留錢限次年內先次起發仍乞置虔州提點司准備差使五員主管幹運許本司踏逐校尉以上有物力諳練錢穀土人充選所有理任請給乞並依諸司押綱使臣條例仍別量支食錢庶幾有以激勸從之二十二日鑄錢司言本司昨被旨許置幹辦公事一員檢踏官五員催綱官二員後來與諸司屬官一例減罷緣所隸九路不可闕官詔復置幹辦公事一員檢踏官三員催綱官一員八月七日尚書省言訪聞提點坑冶鑄錢虔饒州司舊管小料七綱共計船二百八十隻

般運嶺南銅鉛物料依紹聖四年二月十一日敕旨應
經過州縣不得截留附搭亦不許借數別裝官物累年
以來多是過軍虜奪前去今止有剛船一十七隻致網
運有關詔虔饒州提點鑄錢司應官客船過往有軍馬
及他司州縣輒敢拘占截撥者依紹興二年三月二十
二日指揮科罪仍許梢工越訴先是臣僚言乞禁止官
司拘占民間舟船有旨應官吏軍下使臣等輒于州縣
亂作名色指占舟舡及州縣因作非泛使命經過差人
捉舡並徒一年許船戶越訴九月三日戶部尚書黃叔
教言東南州軍舊用常平司錢買鐵在法他司要用聽
依元價量搭息搭錢兌買欲乞專委提刑司刻刷所在

常平司買下鐵貨若干斤重計定元價及今搭息錢數
目申尚書省將通水路去處盡數撥與鑄錢司浸銅鼓
鑄却於鑄到錢內依數撥還從之 三年四月二十三
日詔提點鑄錢司廨宇安頓錢物及一司公案今後不
許諸官司指占安泊及駐屯兵馬如違杖一百科罪從
提點坑冶鑄錢向宗恕所請也九月十六日詔今後度
餉兩提點官遍詣坑場銅鉛錫所產處措置應副監院
鼓鑄立限起發歲額仍委逐路提刑司覺察稽違 四
年六月十六日工部言崇寧二年五月十一日敕修立
到條江池饒建州每年鼓鑄上供新錢銅料闕乏致虧
者責鑄錢司鑄錢司不先次應副物料與級杖八十官

負委發運司具職位姓名聞奏取旨近降指揮發運司
官屬權罷職事並令逐路漕司分認管辦竊慮事有相
干欲乞令江東西路提刑司遵依前項條常切覺察施
行從之 五年六月五日三省言提點江淮荆浙福建
廣南路坑冶鑄錢司近歲所發額錢比舊十虧八九蓋
以兩司並建坑冶鑄錢責任既不專一職事多致弛廢
詔將饒州司官吏除留屬官一員外其餘官屬人吏並
行減罷應干見行事務等權併歸虔州司管雖有上項
指揮後來多在饒州置司贛州只係起歷七月二十一
日提點坑冶鑄錢趙伯瑜言竊見茶監司文移准敕州
縣並限一日回報如違以違制科罪欲望應本司文移

應報稽違及輒不應報去處亦乞詳酌立法詔鑄錢司
文移州縣並限二日回報如應干稽違及輒不應報者
各杖一百 六年四月十八日提點坑冶鑄錢趙伯瑜
奏被旨興復坑冶令先詣鉅山場措置詢訪得管下青
碌坑場見今封閉竊青碌係銅之母發為精英其名有
浮淘青頭青二青大碌之類皆是價高值錢之物靖康
初任罷採打今來雖別無所用而民間裝飾服用亦有
合用青碌去處往往被人戶私採盜賣暗失錢本誠為
可惜今相度乞將管下坑冶出產青碌去處從來本司
措置召入興採委自坑冶場拘收立價抽買入官量行
格息變賣資助銅本如朝廷許依所請即乞早賜指揮

施行詔令鑄錢司依已降指揮召人興採抽買即不得抑勒騷擾七月十二日尚書省言勘會坑冶鑄錢昨緣積弊之久所入不償所費已降指揮省減官屬及委官講究弊病訪聞近來尚以催綱檢踏檢視為名差官幹辦人數至多批請驛券州縣供億頻仍甚失朝廷省減官屬興復利源之意理宜約束詔令趙伯瑜將上件所差官一竊寢罷今後如坑冶發泄興盛官移物料遲延委實合行差官內量事選委支破合得請給毋致泛濫仍不得巧作事因一槩差委虛破驛券支請失錢稍有違戾重寘典憲八月三日戶部侍郎王俟言民間銅器盡以錢為之所在烹冶公然貿易一錢之毀驚利十倍

則其為害不可勝計臣愚欲望聖斷明詔有司講究利害凡諸路有錢監去處止據所有銅料盡行鼓鑄令漕司董之提點司與舊額權行罷免申嚴銅禁悉遵舊法上下維持期於必行所冀國家至寶不致耗竭詔令工部勘當申尚書省 七年七月二十日中書門下有言紹興七年三月二十一日勅節文監司知州見帶職并曾任監察御史以上及館職更不銓量外監司大藩節鎮知州差初任通判資序以上人軍事州軍監第二任知縣資序以上人檢准紹興勅諸稱監司者謂轉運提點刑獄其提點坑冶鑄錢茶鹽市舶未有該載詔提點坑冶鑄錢依監司茶鹽市舶依軍州事已降指揮施行

十一年三月四日江淮荆浙福建廣南路都大提點坑冶鑄錢韓球言本司係管東南九路州縣場監路分職事最多緣每歲止得薦舉改官四員今來本司正當措置興復坑冶利源之際須藉所轄州縣官協心應辦又以薦舉數少無以激勸緣提點官序位資任並與提點刑獄官一同今欲乞本司薦舉除文臣與武臣陞陟依舊外所有薦舉改官及職令員數乞並依江南東路提點刑獄官條格施行庶幾薦貢稍寬可以激勸從之十月韓球言本司見置檢踏官六員前此多是在司端閑時有差出往往止緣私計不曾實辦職事球欲乞以本司所管路分州軍內有緊要錢監坑冶場職事去處將

檢踏官各認分定專管職事內一員在饒州本司一員
在信州一員在建州一員在韶州一員在漳州從本司
差委前去逐處分頭檢踏逐處坑冶催趨課利物料所
有逐官請給人從並各隨所分定逐州支給差破應酬
如逐處或有互差幹當事務即乞從本司臨時差委從
之 十二年八月十九日韓球言坑場監官弛慢不職
已有專法對移取勘所有坑場縣分令丞不可倚仗之
人近中畫指揮並具事因申取朝廷指揮對贓施行緣
韶州興江漳州瀏陽信州鉛山饒州德興四縣所管坑
冶累年積弊不可槩舉欲將前項四縣令丞點檢得弛
慢不職課利虧欠並許本司先次對移取勘申奏朝廷

乞賜施行所有浸銅兵匠及見差那擺鋪兵級在場浸
銅之人如有違慢作過虧欠課額亦乞從本司將情重
之人改刺重役場監從之十月十日韓球言本司獲奉
今年八月十九日勅節文將韶州曲江漳州瀏陽信州
鉛山饒州德興四縣令丞今後如點檢弛慢不職課利
虧欠並許本司一面先次對移取勘申奏朝廷乞賜施
行欲望詳酌將其餘諸州管下應有坑冶縣分令丞如
本司點檢得有弛慢不職課利虧欠之人並乞依上件
四縣令丞已得指揮許本司一面先次對移取勘申奏
朝廷乞賜施行所貴可以責辦興復坑冶早見就緒從
之十一日韓球奏應曲江保昌始興三縣知縣自紹興

二年遭賊火殘破之後至今已經一十年內曲江縣紹興六年一次差到正官外自餘年分前後差官權攝久不交替場冶利害未嘗究心以致保昌始興兩縣亦然。是致課利虧欠無緣興復欲乞詳酌下吏部差注韶州曲江南雄州保昌始興三縣知縣正官前來填闕詔令鑄錢司奏辟一次二十四日韓球言坑冶鑄錢祖宗以來係發運司兼提點至景祐元年專置都大提點坑冶鑄錢官一員準嘉祐勅與提點刑獄序官依條提點刑獄在發運判官之上竊緣發運使係管六路歲舉改官三十員縣令十員如係發運判官三分減一即今提點官雖歲得舉改官七員縣令六員緣提點司所管九路

坑場五百一十三處球近已措置過數內以採興坑冶計一百七十九處合赴金銀銅鉛錫鐵課利及鑄錢監院六處見鑄新錢其間州縣及場監官內實有材幹之人須藉薦舉激勸使之辦事本司所得薦舉改官負數委是數少伏乞比附發運判官合得負數施行詔許通舉改官十員餘依已降指揮 二十六年十二月十七日尚書省言坑冶鑄錢司近年以來所鑄歲額全虧而一司官吏所費不貲理宜借置照都大提點坑冶鑄錢司官吏檢踏官管並罷令逐路轉運司交割措置條具聞奏 二十七年八月二十六日知樞密院事湯鵬舉言兩日見三省議鑄錢事未定臣職事非所干預然有

管見不敢不奏聞前日罷坑冶鑄錢司歸諸路轉運司
甚善但戶部近日欲撥本錢兼別差官臣聞逐監本錢
見在不曾起發戶部措置有未盡善所以臺章論列兼
恐坑冶司省罷官在此唱為異議願陛下以鑄錢專委
漕臣必能就緒自不須別差官上曰此一事朕詢之十
大夫亦無他說獨王珪再有章疏朕謂凡有建立人各
以所見更相可否歸之至當然後已若一人唱之百人
和之事未必當朕何所取朕觀近日議論皆有未盡且
鑄錢先理會銅苗若銅坑不發何以鼓鑄多是百姓苦
官中科擾雖有銅坑發處亦不告官須是明立賞罰多
方勸誘使不為百姓之害可矣兼今日工役比之昔時

十不得一如鍊銅造模磨擦般擔之類如何得人使須
是先計置銅匠與雜役人等第給食錢人力既至銅料
又備錢豈難鑄至於薪炭之屬官中宜梁下見錢燒炭
人戶爭求求售何至科擾卿等可同共商量俟有定議
來奏鵬舉曰謹領聖旨二十七日三省樞密院言昨緣
都大鑄錢司歲額全虧一司官吏所費不貲遂行省罷
今諸路運司分認措置議者或謂諸路銅料有無不等
運司不相統轄無以通融鼓鑄雖已委官看詳未有定
議按唐制戶部尚書侍郎官領鑄錢使國朝三司亦分
筦鹽鐵今欲參酌舊制置提領諸路鑄錢官於行在朝
廷通行選差侍從或卿監一員不妨本職兼領仍許置

屬官二員踏逐舊司通曉人吏使喚其合係諸路運司
知通拘催應副職事並令依舊通管應干合行事件令
提領官照鑄錢司舊制審度因革條具措置申尚書省
取旨其戶部申請指揮更不施行從之九月十四日戶
部侍郎兼提領諸路鑄錢司榮巖言准勅差兼提領諸
路鑄錢乞以提領諸路鑄錢所為名合用印記欲權就
用戶部右曹印記使用仍乞下禮部以提領諸路鑄錢
所印八字為文所屬鑄造已降指揮許置屬官二員外
欲乞並作幹辦公事其序位請給人從依發運司屬官
仍乞從本所踏逐奏辟從之二十八年九月四日提
領諸路鑄錢所言諸路錢監見行興鑄除本司屬官二

貢外欲時暫更選官二貢分委前去逐監專一措置詔
朱商卿呂靖差提領鑄錢所措置官候措置畢日罷

二十九年閏六月十九日左司諫何溥言鄱陽之坑冶
永平永豐兩監當諸路鼓鑄之半鉛錫銅錢四面竊湊
祖宗以來置司其地宜矣當其盛時歲鑄緡錢不下數
十萬比年有司措置無法弊事毛起計其所得不償所
費遂請廢罷朝廷因用其言初欲分隸漕司而諸路隔
越不相統轄其勢無以通融遂議總制於版曹創置屬
官其捧檄一出疾驅而歸第不過條具數端藉手以復
命而已其利害經久之策何從考究而得其實况提領
端坐省部屬官間走道途而可以責辦數千里之遠者

乎望特詔大臣令有司從長措置依舊置司饒州詔令
給舍議七月十八日中書舍人洪遵等上鑄錢司議曰
泉貨之行於世如穀帛水火之適於用自古所不可闕
故必張官置吏以董之在周之九府漢之鍾官令丞唐
之鑄錢使也國朝或以漕臣兼領或分道置使或釐
為二司自中興以來置都大提點事權太重官屬太多
動為州縣之害但當隨時之宜為救弊之計間者亟行
廢罷事出倉卒初未嘗下有司討論既罷之後又無一
定之論初委轉運使又委提點刑獄又委郡守貳號令
紛紛不一鼓鑄益少乃命版曹提領雖以侍從臨之然
官守不專勢難適度而屬官有幹辦公事又有措置官

間一差出州縣承迎甚於使命則使權視前日又重矣
罷提點一人官屬十餘人而總以侍從置在京官屬四
貲下至胥吏之類額雖減而月給數倍則官屬視前日
又不少矣異時提點坑冶以一職名官猶懼不濟而况
版曹錢穀之司遠在數千里外符檄往來安能辦治屬
官之出不過毛舉細事以塞責耳今何溥請乞復鑄錢
司遵等切以為復置便今叅照祖宗舊制釐今日利害
畫一下項一景祐元年置江淮荆浙福建廣南等路都
大提點銀銅鉛錫坑冶鑄錢公事一貲元豐二年分置
兩司在饒州曰提點淮南福建江南東路坑冶鑄錢事
在虔州曰提點荆湖廣南西路坑冶鑄錢事政和七年

提點鑄錢官兩員輪年於饒虔州守任紹興六年趙伯
瑜乞依嘉祐著令銜內添都大二字與提刑序官事權
太重令欲參酌祖宗舊制以江淮荆浙福建廣南路提
點坑冶鑄錢公事繫銜與轉運判官序官依舊於饒贛
二州置司輪年守任專以措置坑冶督責鼓鑄為職如
州縣於坑冶弛慢不職許從本司按劾其逐歲薦舉所
部官並依未罷司以前員數施行一主管文字幹辦公
事舊各一員檢踏官九員秤銅官催剛官各二員官屬
既多徃徃非理干擾州縣今欲於饒州置管大字一員
贛州置幹辦公事官一員請給人從序位並依轉運使
主管文事幹辦公事例韶州建州各置檢踏官一員並

依準備庄遺例別置秤銅官催綱官各一員專差武臣
如係暫闕不許輒差文臣權攝屬官請給於逐州支破
兵給不得過數逐州知通縣令佐依舊以提點主管入
衙屬官只許於本司本路差出及赴本司稟議不得輒
往別路一提點司手分貼司軍典舊額二十二名今欲
以手分十名貼司二名軍典一名為額屬官下手分軍
司舊係十六名今欲逐官下各破手分一名請受依舊
鑄錢司則例一提點司淺剛船專一裝載銅鐵鉛錫本
司多是差借外人纔至裝綱却於州縣差船實為騷擾
今後淺綱船不得差借如有違戾今監司覺察按劾一
諸監兵匠並依見在人數不得抑勒州郡虛擡闕額錢

糧及科取率分工錢一監兵間有技藝工匠常是占留私役或借事官員仰指揮到日委自提點司量行揀選如係諸色工匠不許存留別行招刺今後輒差監兵借事並以違制論一錢監官有兩貲去處如一貲缺不許差見任及寄居官權如並闕許差本司屬官或見任官一人時暫兼權一昨拘收到鑄錢司什物見椿管激賞庫詔依給舍議罷提領官其檢踏官於饒州添置一員鑄錢所見在吏人十四名發赴本司今提點官條具本司及屬官下合差置吏人申尚書省仍令江東轉運司撥饒州錢一千貫付新差提點官公用見拘收什物令具狀赴激賞庫請領至是議上從之 三十年五月十

三日江淮等路提點坑冶鑄錢公事李植言乞下江西
提刑司撥還舊來解字工部看詳提點坑冶鑄錢官多
在饒州其贛州止係巡歷欲令本州係官屋宇標撥充
鑄錢司解字一元計置上管文字一員幹辦公事一員
檢踏官三員料銅官催綱官各一員準備差使二員內
檢踏料銅催綱官乞更不設置幹辦公事一員乞改作
主管文字係饒贛兩司各一員更乞添置準備差使三
員本司并主管文字下乞通置手分十人貼司代軍典
各五人共二十人為額依舊司則例支給請受吏戶部
看詳內乞踏逐添差大小使臣三員充準備差使欲共
置三員其餘欲盡依本司所乞從之

三十二年

已卯

位未十一月二十七日江淮荆浙福建廣南路提點坑
冶鑄錢公事魏安行奏本司舊置屬官一十三員見今
止有五員緣本司所管路分闊遠闕官廢事欲於舊檢
踏官內復置兩員從之 孝宗隆興元年十月十六日
戶工部狀准批下提點坑冶鑄錢司申從來般擔銅鐵
等係是和雇人夫紹興二十八年承南安軍差到鋪兵
六十人前來岑水場銅鐵軍般運多不遵依程限搬搬
鄉村今相度欲依舊和雇人夫般運官司計量鐵數多
少支給錢米委是省費經久利便逐部勘當欲依所乞
事理施行詔依十一月五日提點坑冶鑄錢公事黃仁
榮奏本司未廢司以前置檢點官九員近獲旨復置兩

貪委是闕官幹當乞將準備差使三貪數內改一貪充
檢踏使臣詔依 乾道元年正月一日大禮赦文勘會
鑄錢監所用木炭自有合支破案名本錢收買應別慮
州縣巧作名色科擾仰今後收買木炭須管專一置場
即當官支運價錢不得科擾減剋作弊仰監司提點鑄
錢官常切覺察如有違戾按劾以聞 二年四月十二
日提點坑冶鑄錢司狀契勘紹興五年十一月指揮坑
爐戶依保甲法與免身丁今據興國軍坑戶劉介狀稱
被本縣不時差科坑丁作匠應奉官司坊廢採坑本司
已行約束外乞降旨應坑丁作匠並令本縣注籍與免
本身諸般非泛差使所貴專一用心興採坑冶詔依六

月三日尚書工部侍郎薛良朋奏奏旨諸坑冶出銅去處令臣措置要見所收數目今條畫下項一契勘鑄錢司祖額一百六十一萬七千九百三十五貫八百文內除六十七萬七千五百五十五貫三百九十九文充銅本錢實合發錢九十四萬三百八十貫四百一文後來鼓鑄不數承降旨權以五十萬貫為額每年盡行分撥起赴內左藏庫臣拖照舊案并關會戶部見得紹興十一年提點鑄錢官韓球曾陳乞支降茶引一十五萬貫作銅本錢又紹興十六年支降江西茶引三萬貫又紹興二十七年支降八萬貫係於近便州軍經總制錢通融取撥委是支降本錢分明欲從朝廷支降八萬貫仍

以江西江東茶引并一升見錢於近便州軍上供錢內撥下鑄錢司以銅額多寡均撥諸州將茶引轉變同見錢逐時責付諸州給還坑戶銅本庶可督責銅額一契勘州縣拘納坑戶銅寶就使依官估支給價錢尚自不酬實直今既不支錢又令將所採銅寶盡行送納官司其坑戶一無所得參之人情實不可行臣今措置且以坑戶採銅十斤為率內只許本縣收買七分所有三分許令坑戶經本縣出給文引備坐斤數從便賣與他處官司即不得私下交易如數外擅賣許人陳告依本司約束賞罰施行一契勘坑冶興發人戶欲行告發多畏立額恐將來取採年深礦苗細微官司不為減額不敢

告發令相度應人戶告發銅鉛錫鐵坑冶更不立額但
據採煉到數赴官中賣即時支還價錢度使坑戶放心
告發一諸路坑場現今所產銅鉛錫鐵係鑄錢司二分
抽收八分權買今來措置興復坑冶場務要課利增重
理宜優恤令相度應見催赴并人戶踏發新舊坑冶所
赴銅免抽收支還十分價錢優潤坑戶一參照昨指揮
坑爐戶每一名一年內中賣到銅五千斤免差役一次
一萬五千斤免差役兩次賣及三萬斤以上免差役三
次度使加意赴辦一勘會已降紹興二十七年正月二
十一日指揮坑戶自備錢本採煉實貨賣納入官從紹
興格特與減一半數目依全格推賞補官契勘折減一

半數目推賞尚慮太多難得預賞之人今相度欲於所減一半數目上以三分為率再減一分依全格推賞補官庶使人戶用心赴辦課利從之 三年正月十二日司農寺丞兼權提點坑冶鑄錢公事晁公愚奏諸路出差坑冶去處五金雜出銅坑有鉛鉛坑有銀銀坑有鐵所廣礦脉厚薄不等自來銅鉛錫鐵隸提點司金銀坑隸轉運司事不歸一職難兩盡且如銀坑有銅轉運司但收銀寶其所有銅置而不問鉛坑有銀即提點司但認鉛數其所有銀亦恐漕司爭占不敢防閑遂致百姓黃緣為姦如銅銀雖出於漕司則稱係是銅礦當於泉司告發於泉司則言係是銀礦當於漕司告發彼此不

照私自行採實為利害今乞專委提點司拘轄却轉運
司歲收過金銀數目責令提點司抱認庶幾五金之利
全歸公上詔依十三日詔劉莊士奏對坑冶利害可採
與轉一官提點坑冶鑄錢司幹辦公事一員持差劉莊
士填闕二十八日詔江淮荆浙福建廣南路提點鑄錢
陳高所乞自辟官屬指揮更不施行從臣僚論列也臣
僚上言伏觀吏部牒報新除提舉坑冶鑄錢陳高劄子
以衆同事重乞自辟差官屬視其勤惰而為黜陟已得
旨已奏竊詳諸路分置監司各有官屬皆是朝廷差置
若曰衆同事重可以自辟如總領轉運提點刑獄事顧
不重乎使皆援此例以進則將何辭以拒之而況使者

易置雖多屬官未嘗改易今有以到任未及終更者將何罪而罷之乎又有已授而未及赴上者將無事而抑之乎審爾則堂除之目移於泉司使者之權偏於銓部矣局但當躬率吏屬幹辦職事如有不職自當奏劾可也欲望特寢前命從之四月一日詔陳高所乞復置檢點一員指揮更不施行從臣僚論列也中書舍人梁克家言竊見坑冶一司未罷之前官屬頗多自紹興二十九年復置止留主管文字以下七員後來節次增添遂至十一員隆興二年方減其四今已有主管文字二員幹辦公事三員并劉莊士係權行添置共四員檢點官一員準備差遣一員遇有坑冶興發又許差所部州縣

官前去檢點今更添置徒有增官之費而無舉職之實
若局以身率先賢責見今屬官使之曉夕究心講求利
病無職案不辦之理所有錄黃臣未敢書讀故有是命
五月三日詔右承奉郎監饒州永平監兼物料庫嚴瑄
特降兩官放罷為在任減剋物料私鑄銅器從知饒州
俞玘之奏也 五年二月十一日戶部尚書曾懷言契
勘諸路金銀坑冶傷隸轉運司昨緣晁公愚陳請盡委
提點司拘催本部竊詳提點司係十一路坑冶闊遠何
以機察今欲依舊撥隸逐路轉運司免致失走課入詔
依 六年四月一日詔鑄錢司減罷併歸發運司存留
幹辦公事二員二員歸發運司其減罷屬官並依省罷

法二十四日尚書省勘會司農寺丞許子中專一措置
鼓鑄鐵錢其鑄錢司已降指揮併入發運司詔許子中
應鑄錢職事並隸發運司措置閏五月二十九日江荆
湖淮廣福建等路都大發運使史正志言信州鉛山場
額赴黑鉛二十萬斤依指揮令丞監官知通如措置及
額減一年磨勘更於額外五分以上減一年半磨勘增
一倍以上者各減二年磨勘若虧欠亦各展一年磨勘
比額虧五分以上即合對展後緣當職官專務赴鉛得
賞不赴銅課續降指揮如赴鉛外須赴銅及新額一十
三萬斤即與放行鉛賞照得近年以來赴銅既不及額
其赴鉛即不該賞是致當職官不切用心銅鉛數少有

坊鼓鑄今相度欲將所赴額賞罰依紹興三十一年三月已降指揮其收赴銅如及新額一十三萬斤亦乞減一年磨勘虧欠五分即展一年磨勘兩項賞罰各不相効庶可責其用心越辦從之七月十六日工吏部狀準都省批下許子中申勘會舒州同安監鼓鑄鐵錢所用鐵炭浩瀚乞置官片兩員專一往來尋踏苗脉興發及檢檢起置事件令勘當欲依所乞差置一員從本所踏逐文武官員內辟差從之八月七日詔利州路紹興監監官一員金牛檢踏官一員紹興監監門官一員金牛鐵務官一員窠闕並令轉運司每季使闕集注差官從利州路轉運判官提舉鑄錢趙公說之請也十月十八

日發運使史正志言本司已興置江州等處錢監尚關
工匠照得諸州鐵作院兵匠諸會工作易為指教即目
多是空閑欲許從本司逐急刷差添貼鼓鑄一年一替
詔諸州見打鐵甲於廂軍內刷差前去十一月二十八
日中書門下省言勘會近降指揮鼓鑄鐵錢歲額五十
萬貫續據發運司申乞將興國軍富民監鑄錢六萬貫
理從措置淮西鼓鑄許子中所鑄之數詔今後鼓鑄錢
發運司及許子中每歲各認三十萬貫立為定額其興
國軍富民監六萬貫充發運司三十萬貫之數餘前後
已得指揮十二月十三日史正志言契勘諸處鼓鑄銅
錢惟饒州永平監數多近緣許子中盡數取撥兵匠共

三百一十四人前去舒州同安監指教今永平監關人
鼓鑄詔令許子中先發一百人回令發運司於諸路廩
軍內剋例一百人往同安監習學十六日史正志言契
勘坑冶寶貨所在有之惟籍逐縣令丞公共收赴緣未
立定賞格今相度欲下所屬今從新發或停閉坑冶若
令丞措置招坑戶一年內赴發過銅一萬斤鉛三萬斤
錫五萬斤鐵十萬斤各減一年磨勘更增及五分減一
年半磨勘增及一倍以上減二年磨勘詔依十九日史
部狀準批下史正志劄子契勘吉州安福縣連嶺場信
州戈陽縣寶豐銀銅場各監官一員別無職事合行省
罷就令縣丞兼監緣本司已興置鐵錢場四處權差右

迪功郎許孝純監江州廣寧監右迪功郎徐椿興國軍
大冶縣富民監左迪功郎徐之茂監臨江軍新喻縣豐
餘監右迪功郎蔣莊監撫州裕國監欲望朝廷給降付
身所有省罷場監官請給人從許本司拘收今欲依本
官所乞仍於逐處縣丞衙內添入兼監逐處稱呼及正
差右迪功郎許孝純等充四處監官詔特依 七年二
月二十八日詔右朝請郎直秘閣江璆除提點坑冶鑄
錢填復置闕三月六日許子中奏先奉旨以司農寺丞
兼措置淮西鼓鑄鐵錢續改差權發遣舒州依舊兼措
置淮西鼓鑄鐵錢緣是郡守不敢擅出欲得躬親前去
斬黃等州相視置監去處措置鼓鑄所有郡事依條差

以次官權行管幹從之五月十五日新江淮荆浙福建
廣南路提舉坑冶鑄錢公事江瑋言如信州鉛山鄱州
冷水場皆有監官二員文武各一然銅鉛鐵料所出浩
瀚乞將西場監官文臣繫階作本司檢點官再一措置
本場所有韶信兩州幹辦公事即不時差出督責諸處
場監銅鉛鐵課及催起錢物從之十七日江瑋劄子契
勘江西路四監鐵錢已鑄到三萬餘貫畫旨每二萬貫
令淮東轉運司雇舡裝載下通泰州監場充亭戶本錢
却充換客人納到銅錢從淮東提鹽司計置起赴左藏
南庫提管後來發隸本司督責鼓鑄通前計鑄到錢錢
一十萬一千餘貫欲望朝廷劄下淮東轉運司速行計

置舟船前去逐監般取委自知通裝發往通州兌換
銅錢起赴左藏南庫交納詔依令提舉鹽事司兌換銅
錢發赴左藏南庫交納二十四日詔鑄錢司每歲認鑄
鐵錢三萬貫所有合用本錢令戶部科降度牒二百道
餘令鑄錢司於所餘銅錢本錢內取撥應副鼓鑄十月
九日江瑛奏檢準乾道七年五月六日指揮逐州通判
係專注管坑冶事務內有不可倚仗及弛慢之人令本
司劾奏差官對移本司契勘吉州通判趙堦自本司復
置之後牒令催起鐵課修葺綱船起發鐵料等事經及
累月並無一字報應積壓鐵料七十餘萬斤竊恐其他
州軍遞相倣倣難以責辦欲望睿旨將趙堦重賜黜責

以為慢吏之戒詔放罷十一月二十三日工吏部狀準
都省批下提點鑄錢司申契勘江西路興置江州廣寧
監撫州裕國監臨江軍新喻縣豐餘監興國軍大冶縣
縣富民監歲鑄錢三十萬貫緣本司所轄坑場錢監路
分稍遠全藉州縣當職官協濟應辦欲望朝廷創下錢
監州軍依已得指揮令守臣提領知縣兼監督趣鼓鑄
無致闕誤如歲終花欠即從本司具當職官申乞施行
本部勘會近據鑄錢司申乞下逐州軍知通據歲額應
辦鼓鑄每歲及額特與減年磨勘如或虧欠分數乞與
展年已降指揮候鑄及所定課額即無推賞今勘當欲
依所乞事理施行從之 八年三月二十二日詔知江

州李木通判蔣該知興國軍向謫通判王祀知大冶縣
鄭梓各特降一官以逐監鼓鑄錢虧額提點江珍按奏
故有是命五月七日新差知處州趙善仁言乞依舊令
通判令丞衙內帶行主管銅銀鉛坑冶職事如任端無
虧欠及巡尉任內無私採透漏即依條推賞施行詔依
其推賞一節令戶工部司勅令所叅酌立法申尚書省
其後戶工部同勅令所修立下條每歲立定所收銀銅
鉛數任端無虧欠各與減二年磨勘巡尉官如任內無
私採透漏候任滿令本州批書巡檢與減半年磨勘縣
尉升六箇月名次從之六月十六日江珍狀前來曾指
置韶州岑水場添槽作一百所取膽水膽土淋鐵成銅

下二廣州軍委守臣點檢雜犯配隸人年四十已下筋力強壯各二十人借支月糧限半月發赴本場役使且以五百人為額其中朝廷取旨依外照得韶州岑水縣係分兩場內黃銅場管鑿山取礪烹煉黃銅置武臣監官一員膽銅場管浸鐵洗礪烹煉膽銅置文武臣監官各一員內大臣監官改作檢路官迺平以來兩色銅課皆不敷額徃徃各分彼此互有侵占已將兩場併作一場責辦監官依舊收赴外緣岑水場承平人煙繁盛其黃銅場監官階衙帶兵馬都監主管煙火公事今來就併為一場及又刷差二廣配隸五百人在場淋銅皆是馬合雜犯之人欲望朝廷詳酌將岑水場兩監官並係

階作監韶州岑水黃膽銅場並烟火公事監轄淋銅及
檢踏措置官庶幾有以殫歷不致生事送吏部勘當欲
依本官所乞施行詔依九月二十提點坑冶鑄錢司申
據興國軍中富民監歲額鑄錢十萬貫及補填乾道七
年未鑄錢本監見管工匠二百餘人假令晝夜不歇未
能及額欲望裁減令有事力監分均認本司相度欲將
興國軍富民監江州廣寧監歲額量行裁減各一萬貫
却令臨江軍監豐餘監撫州裕國監管認並自乾道八
年為始詔依十七日詔右從事郎專一措置處州庫山
等處銀場管準特貸命追毀出身以來文字除名勒停
決脊杖二十剝面配連州牢城仍籍沒家財以準銷錢

為銅以應官課却將銀銅場合得銀更不抽收歸官入
已盜用大理寺丞吳淵前去取勘得實故有是命十一
月六日江東路提點刑獄公事梁俊產奏准付下戶部
尚書楊倓劄子得旨半年內鑄到新錢每次取一貫進
呈尋取到饒州九月新錢二萬餘貫內一分係黃銅錢
九分帶鉛錫錢取到二貫進呈得旨永平監監官令江
東提刑司取勘限十日聞奏本司今勘到鄭灼趙師回
職為監官各不合依鑄錢司公帖節次將夾雜銅依十
分好銅數目支出數鑄兼提點官江瑒到永平監見有
鑄到錢一萬四千五百貫文黑色却令本監分綱起發
自後鄭灼趙師回為好銅數少不合節次將夾雜鉛錫

錢袞同黃銅錢在庫運發至左藏西庫詔江瑯鄭炤趙
師回各特追三官勒停戶部長貳各降一官左藏西庫
監官各特降兩官工部長貳各展二年磨勘十二月二
十六日詔鑄錢司依舊置提點官二員於饒贛二州置
司左承議郎王楫除江淮荆浙福建廣南提點坑冶鑄
錢公事右宣教郎李大正除江淮荆浙福建廣南路提
點坑冶鑄錢公事並填見闕 九年正月六日江瑯言
乞支降乾道九年鼓鑄本錢等事送戶工部勘當契勘
乾道十年本錢科降度牒二百道餘令鑄錢司於所餘
銅錢本內取撥應副并乾道八年分本錢分在歲南下
庫支會子八萬貫却給降度牒二百道付本庫給賣價

錢撥還續據江瑛奏所用本錢已多方擘劃分俵四監所欠止三二萬貫候降到會子支揆充足格留會子五萬貫充來年分本錢冬又準批下江瑛劄子所陳乾道九年本錢欲乞朝廷指揮下南庫於支降去年未支會子共六萬貫并給降度牒一百道通換一十萬貫應副鼓鑄詔依九月新差提點坑冶鑄錢司王楫劄子照得今年雖是分置兩司緣諸路軍州錢糧物料交互多寡有無不等難以分擘欲乞權將乾道二年所收銅課約為則例分路赴辦所有錢額計銅所入同共鑄然後比較近年增虧詔銅課比乾道二年數增三分之一措置赴辦如州縣事干坑冶鼓鑄若有違戾許按劾聞奏

二十六日權發遣處州姚述堯奏被旨令臣措置本州銀銅坑事竊見本州雖有龍泉松陽兩縣石堰等銀坑一十一處庫山等銅坑九處其間地力所產高下不等行下本縣取問業主願與不願自備工費採打據權龍泉縣事張漢勘會到有石堰李湖銀坑兩處蔡松等五人地有庫山等銅坑數處係可久等二人地據逐人狀各甘自備工費採打依本州措置銀以分數支給銅以工價收買已各出交帖給佃令措置欲將銀銅分作兩處銀以十分為率六分給官四分給業主庫山等四處銅坑依王文等責到狀將淨銅就官賣約計工費乞納銅四斤請官銀一兩所有坑戶收到鈔貨以十分為率

內二分納官八分給坑匠即就勒赴官中賣量立價每
斤支錢二百文收買應割銅坑折合計料使用庶幾公
私兩濟其銀銅兩場除監官外尚慮工匠等別有侵欺
已別差指使八名兵給四十八名分頭監督每月所支
食錢并應干本柄係將收到銀內指數逐旋支撥詔並
依內銀赴行在左藏南庫銅赴軍器所送納閏正月五
日工部狀準批下王楫李大正狀其分認路分課額及
合行事件一欲將江南淮南兩浙潼川利路分隸饒州
司江西湖廣福建分隸贛州司錢糧物料並依所分路
分催赴一準省劉檢會乾道二年鑄錢司申江東路饒
州興利場膽銅二萬三千四百八十三斤信州鉛山場

膽銅九萬六千五百三十六斤弋陽縣寶豐場黃銅四千斤池州銅池縣膽銅四百八斤五兩四川路潼川府銅山縣黃銅六千斤利州青瑩黃銅七千斤興州青陽縣黃銅一千六百六十二斤分隸饒州司共計一十三萬五千一百二十九斤五兩福建路汀州長汀縣黃銅六十二斤南劔州尤溪縣黃銅三千六百五十四斤建寧府因將場黃銅八千三百一十七斤四兩邵武軍光澤縣黃銅三百二十五斤廣東路韶州岑水場黃銅二萬四千斤膽銅八萬八千九百四十八斤連州元魚場黃銅二千八百八十斤湖南路潭州永興場膽銅三千四百四十斤分隸贛州司共計一十二萬八千四斤四

兩兩項通計二十六萬三千一百六十九斤九兩合於
上件數內依今降指揮增三分之一起辦一契勘銅川
利州路緣為路稽察不前訪聞得逐處產銅浩瀚近年
收到餘剩銅轉運司貨賣價錢以為公庫使用今乞劄
下潼川利州路產銅州縣應有額外增羨數目與免立額
盡數起發一契勘坑冶場監官係吏部以格法差注初
非選材或有庸繆昏老不堪委任之人乞從本司中奏
與嶽廟差遣即從本司踏逐有材力人不以有無拘礙
辟差一契勘雖是分置兩司緣諸路州軍互有官物干
連難以逐一分撥今乞仍舊各以江淮荆浙湖廣福建
潼川利州路提點坑冶鑄錢公事繫銜應行移並連銜

通行按察判舉一契勘鑄錢司舊管判額孔目職級手
分貼司代軍典三十四人昨因廢罷後復置共三十人
今來分置二司人數不敷使用今乞量添十名通舊人
分兩司使喚工部勘會鑄錢司吏額依已降指揮係於
主管文字下通置手分貼司代軍典共二十名今勘當
欲下本司量行添破手分四名貼司二人計六名共二
十六名為額詔並依同日王楫等申契勘鑄錢已有主
管官二員分置在饒贛二州又有屬官三員盡在饒州
今欲擬一員過贛州今更乞辟置一員庶幾事體均平
工部契勘鑄錢司屬官已差置七員內主管文事二員
幹辦公事二員檢踏官一員各已分撥置局去處外準

備差使二員亦係本司辟差員數未曾分隸今勘當欲
下本司各分隸一員使喚一天中聖節并大禮年分進
奉銀欲乞依崇寧上供格法并照舊例於產銀州軍支
係省錢收買連街進奉戶部勘當欲下江東西湖南福
建廣東路轉運司依崇寧大觀格於出產州軍收買輪
流起發依逐官所乞事理施行一契勘合用印記二額
饒州已有見行使銅印外乞給贛州司印禮部契勘欲
下工部鑄造一顆付本司行使以江西湖廣福建路提
點坑冶鑄錢司印十五字為文詔並依八日工戶吏部
狀準批下權發遣處州姚述充狀坑場官吏多與坑戶
偷瞞官物及有鈺銷錢寶之弊關防未盡除已委巡尉

不妨巡捕往來巡察及委主簿機察坑場偷賭官物并
委知縣點檢旬具有無覺察保明事狀稽考外所委官
每月各添支食錢五貫文省欲乞於逐官考內稽考有
無透漏鈔銷錢寶等事件批書印紙廢幾官吏有所激
勵逐部勘會點檢機察巡捕官每月添支食錢欲依所
乞批書所委官印紙事內知縣主簿已有立定六項課
績批書指揮外縣尉乞依本官所乞從之十一日王揖
李大臣狀奏臣竊見紹興二十八年指揮拘收器具數
目浩瀚州縣憚水脚之費多不解發亦有與易妄用之
弊乞令臣等委官分路取索當時拘收干照根刷兼民
間私有銅鐸係違法禁欲乞檢舉條令一就拘收添助

鼓鑄詔依十二日王揖李大正言今來雖將見管坑場
分隸兩司所有舊坑多係江西贛州一司管內竊慮江
東饒州一司無所措置今欲於江西管內取撥江州吉
州撫州興國軍隆興府却隸饒州司從之三月十五日
戶工部狀檢準乾道八年五月七日知處州趙善仁奏
處州管下坑冶乞令處州通判令丞依舊例於銜內帶
行主管銅銀鉛坑冶職事候任滿日無銀欠并廵尉任
內無私採透漏即依條推賞施行除許帶坑冶職事外
其推賞一節看詳如通判令丞任滿無虧欠各與減二
年磨勘廵尉官任內無私採透漏候任滿令本州批書
廵檢與減半年磨勘縣尉陞六箇月名次擬送教令所

修立格法詔依五月十六日中書門下省勘會諸路各有金銀銅鐵鉛錫坑冶比元豐祖額今所收不及五十分之一設或發歇不時不應自元豐年後九十餘年更無一興發去處顯自州縣循習隱藏不申是致失陷財計詔令逐州知通候指揮到日限兩月講究失陷因依從實檢踏興廢去處供申其已前隱藏并與放罪仍責委無隱漏及講究不盡事件具結罪保明申尚書省八月七日中書門下省勘會處州坑冶因乾道七年以後差官措置一年收到銀二萬二千八百餘兩銅四萬五千餘斤諸路各有興發去處州縣循習隱藏不申是致歲久失陷財計已降指揮限月講究并令提點鑄錢官

據所分路分數實至今未及申到照得處州坑冶過額之數合開坐行下逐州知通并提點官照應指揮疾速供申如有違戾取旨行道詔依十月九日李大正狀奏契勘韶州岑水場趁辦沒銅淋銅課額全仰春水沒漬今年一春闕鐵使用臣至南雄州索到收支鐵歷點對去歲一年之間收鐵五十八萬餘斤其南雄州只支發過二十七萬餘斤照得般發銅鐵綱運係本司主管通判南雄州林次韓今已任滿去官見任通判曹緯自正月到任至目下已發過鐵五十八萬餘斤有此不同欲望特賜處分以為勸戒詔林次韓特降一官曹緯特轉一官二十三日尚書省勘會諸州軍申到金銅銅鐵鈔

錫數往往不及元額及有中稍無興發去處多是隱蔽
鹵莽詔令諸州運遵依已降指揮疾速委官子細詢究
盡寔結罪保明申提點司覈實申尚書省如將來朝廷
差官檢踏得稍涉欺隱當職官吏重作施行二十六日
權發遣蘄州提領鑄錢韓映言奉旨令分舒州同安監
嚴鑄鐵一十萬貫文申乞差知監官一員準指揮就差
蘄春知縣兼管喚契勘所置監係在蘄口鎮自州城往
來即須三日蘄春知縣難以兼監令來催督人匠工程
收支鐵炭萬計浩瀚豈可闕官伏望詳酌許令選差一
員奏辟監視庶幾專一從之 淳熙元年正月十一日
詔舒蘄州住罷鼓鑄鐵錢逐監已差監官並依省罷法

見役工匠盡數發赴饒州鑄錢司收管內招到百姓人
匠願從便者聽其鐵炭物料並起赴軍器所未盡事件
令饒州鑄錢司條具申尚書省先是詔令蘄州分舒州
同安監歲鑄鐵錢一十萬貫就差蘄春知縣兼管既而
以所置監在蘄口鎮去州城差遠蘄春知縣難以兼監
許令選差一員奏辟監視至是罷之十五日提點鑄錢
司言江撫州興國臨江軍鑄錢監如歲鑄及額知通監
官乞與一等各減半年磨勘虧及一分者展半年磨勘
若於額外增鑄及一萬貫即與比類通減一年磨勘下
工部勘常請依所乞外其逐監比歲額虧及一萬貫亦
比類通展磨勘一年仍令本司歲具逐監實鑄過錢及

官職姓名以聞從之既而江州廣寧監興國軍富民監
元以一十萬貫為額知道監官減磨勘一年虧及一分
展磨勘半年臨江軍豐餘監撫州裕國監元以五萬貫
為額比江州興國軍兩監減半賞罰其後廣寧富民監
各減作九萬貫豐餘裕國監各增作六萬貫本司以其
增減不同故有是命二月十三日中書門下省言提點
鑄錢王惲興復坑場鼓鑄精緻各行推賞詔王惲轉一
官更減二年磨勘監督官章洞監官周椿沈作賓各減
二年磨勘葉簣減二年磨勘李大正所鑄錢起^係到行在
量度推賞七月二日提點鑄錢李大正言被旨遍詣所
管坑冶州軍除已到贛表潭三州外所有襄房辰沅州

及二廣福建去處乞依潼川利州路分委各監司與逐
州守倅保明申省事下工部本部勘會惟京西襄陽府
房州欲依所乞從之 二年二月二十二日提點鑄錢
王楫言建寧府豐國監已行住罷今二年間並不興鑄
乞將監轄收支物料鼓鑄錢寶官一員減罷依省罷法
從之二十四日楫又言諸處場監官乞從提點官選擇
辟差一次如有敗事舉官同坐從之 三年五月十一
日戶工部言提點鑄錢王楫鼓鑄銅錢逐年虧減却以
打造麻札及雁翎刀為詞又乞以元降鑄本舊錢通計
新錢起發失數鑄本意詔楫降兩官仍自淳熙三年為
始須管每年鼓鑄數足不得拖欠 五年六月二十七

日詔江淮等路提點坑冶鑄錢公事可依景祐元年故事銜內帶都大二字與提刑序官 九年十一月二十三日詔左藏南庫借會子二萬貫文付坑冶司鼓鑄錢本却仰本司發回茶引二萬貫文赴行在都茶場送納仍將本引現在之數日下措置給賣及據撥足本錢嚴禁拘催湏管鼓鑄及額毋致拖欠以本司言坑戶闕錢採打銅鉛有妨鼓鑄乞將元給降茶引五萬貫文給換官會應副支遣故也 十年二月二十二日詔諸州所欠鑄錢司錢七年已前並與蠲放八年已後行下州縣盡數撥還 十二年三月二十二日省韶州永通監監官置潭州衡山縣泉井銅鉛場監官一員既而都大提

點坑冶鑄錢司言永通監監官全無職事徒費廩祿而衡山縣泉井銅鉛新發二年間赴銅一萬二千九百餘斤鉛七千五百餘斤而有是請十三年八月一日都大提點坑冶鑄錢公事趙師弄言信州鉛山縣坑冶場鋪兵屢因縣道不支衣糧畫降指揮專委任官別置倉庫支納竊詳鉛山令丞各係主管坑冶官知縣以兼兵馬都監繫銜赴辦銅鉛增虧均受賞罰其鉛山場赴銅兵級知縣自當管轄但未有明降指揮所以不曾干預今欲將鉛山場兵級令丞與監場檢踏官同共統轄彈壓措置坑冶事務其場兵衣糧縣丞專一拘催及時支散其餘有坑冶場兵屢亦乞準此從之紹熙元年十

二月三日提點坑冶鑄錢司言嚴州神泉監鼓鑄合用銅鉛係於信州鉛山場等處支撥緣般運費力多是空閑工役無去永平監差遠鑄料間有不相接濟今乞只就永平監一處鼓鑄人力不闕定為利便所是神泉監見任監官候鑄絕物料日并已差下替人並乞與對換一等差遣人吏專知發歸元來去處兵匠移填本州廂軍及處州石堰場銅鑛日來裒徵其監官二員亦乞省減一員見任人許令終滿已差下替人亦與對換一等差遣從之 二年二月五日四川總領李結言利州紹興監見管工匠一百八十七人除招剌到監兵子弟及舊收剌軍匠三十六人外其餘皆是諸處配到貸命之

人盡則重役夜則鑠鋌無有出期乞下鑄錢司日後遇有配到人兵將在監執役年遠者逐旋填替發還元本州軍內瘡老疾病與詳元放停若筋力尚壯情理兇惡者與在州羈管兼本監軍匠最係重役而衣糧未能裹足乞各除舊請外更與添支米二斗逐部指定紹興見管兵匠一百八十七人工匠敷足可以立為定額如日後諸處配到人溢額許將見在老弱之人揀放如元係軍人願歸本軍百姓願充廂軍者聽其元犯情重永不放還之人不許揀放所乞支米欲行下本路漕司於見管米內那融應副按月支給並從之七月二十八日提點江淮湖北鐵冶鑄錢劉煒言照應創置提點鐵冶

司事務最為繁冗今措置下項一照得淮南運司淮西
提刑提舉常平茶鹽四司止有屬官并檢法官共三員
內檢法官不許差出淮南運司舊有添差幹辦公事一
員見今闕人今乞省併却移充提點鐵冶司幹辦公事
窠闕就無為軍置司一乞置檢踏官二員內一員舒州
置司往來蕪管舒州光州錢監事一員蘄州置司往來
蕪管蘄州漢陽興國軍錢監事並許於曾經本路本軍
縣差遣任滿及見任官選人內選擇辟差一乞置監門
官一員蕪管受給專關防滲漏及人匠出入搜檢許本司
於文臣選人武臣小使臣內通行踏逐有材幹公廉經
任之人一照應見今舒州同安監蘄州蘄春監監官元

係本州辟差令乞止許本司差辟一照應捕捉私鑄金
籍巡尉乞將湖北路德安府復州漢陽軍鄂州江西路
隆興府興國軍江州江東路南康軍寧國府池州太平
州建康府及兩淮州軍都監巡尉衙內並帶巡捉私鑄
鐵錢任滿批上印紙悉從之十一月二十七日南郊赦
勘會諸路州縣坑冶興發在觀寺祠廟公宇居民墳地
及近墳園林地者在法不許人告亦不得受理訪聞官
司利於告發更不究實多致騷擾及有坑冶停閉苗脉
不發去處勒令坑戶虛認歲額可令提點鑄錢司委官
詢訪日下改正仍檢坐見行條法指揮約束常切遵守
如有違戾許人戶越訴 三年三月九日提點鑄錢司

言竊見建寧府大挺鉛場昨來係坑戶撲認淨利日來
興發浩瀚乞將豐國監監官兼監大挺鉛場往來管幹
兩處職事若將來大挺場採取盡絕即仰往無詔建寧
府大挺場初置監官一員依處州石堰庫山銀銅場例
作堂闕差人其豐國監今坑冶司相度合與不合省罷
既而坑冶司言照得舊係建寧府嚴州贛州三監與饒
州分鑄今併就永平一監稍覺難辦况豐國監有交受
南劍等州并大挺場坑冶銅鉛從本監轉發前來永平
監鼓鑄事體稍重若省罷豐國監官深慮福建一路坑
場轉發銅鉛遲滯欲乞仍舊存留免將來再有申乞復
置從之

慶元元年十二月三日右正言兼侍講劉德

秀言坑冶司凡所總管屬自主管文字而下至於監轄坑場幾三十員隨事之輕重職之崇卑莫不皆有責任唯建寧之豐國監贛之鑄錢院舊各置監官一員後緣銅料不繼罷去鼓鑄而監官至今猶存冶司舊有辟差窠闕凡六近以其一歸堂除而今所存者尚有五闕吉州置司檢踏官監潭之永興場監建寧之瑞應場與夫處之石堰庫山場監轄使臣是也乞廢罷前兩監官少寬州縣冗食之患舉後五闕皆歸吏銓以聽公選詔吉州檢踏官潭州永興場建寧府瑞應場三闕今後堂除餘并依其廢罷兩監官見任人許終滿差下人依省罷法三年八月十六日江淮等路都大提點坑冶黃唐

奏本司歲計支遣錢二十六萬緡內十九萬緡係省額錢均撥諸州供納外三萬緡有奇係本司收到坑場所產花利錢尚欠三萬緡係逐年拘催到諸州未解錢數補揆支遣欲乞令本司今後於次年春季之終取一郡欠數最多者申奏朝廷主管官量賜責罰庶幾主管官有以任其責戶部勘當欲下本司照合起條限催發如有違欠最多去處仰徑申朝廷取旨施行從之二十九日中書門下省言已降指揮諸路屬官今後並不許差注本貫及居住在本路者見任人今終滿已差下人聽兩易添差不釐務者非詔坑冶司屬官止避本貫及居住處四年二月五日中書門下有下嚴州神泉監復

置之初已解到當三新錢三千貫鼓鑄精緻見得究心
措辦理宜議賞詔監官如三年鑄及十萬貫減改官舉
主兩貢又能催趨工程即照應已降指揮更與優異推
賞其知通應辦無遺闕每歲各減一年磨勘如不及全
年計日推賞 嘉定十五年七月二十二日臣僚言銅
錢寔少楮券寔輕不可不慮夫錢者本也楮者末也中
興之初分鑄於虔饒二州除椿留外歲鮮緡錢四十九
萬今總九路為一司歲額近有十五萬乃累政積壓至
五十六年之錢猶未起發尚何望其佐國之經費乎彼
司提點之職者亦非不欲課額登足積弊相仍難以頓
革非上之出令有以申嚴之則人心未易聽從夫其為

弊固多端而關於利病之大者有三焉一曰鉅銷滲漏
之多二曰本錢支遣不敷三曰官屬體統不一夫銅為
有限而用之者無窮勢家器具商賈般載散之外境安
得而不耗此鉅銷滲漏之弊也坑冶本錢朝廷於諸郡
科撥歲總十九萬緡而州郡馴習拖欠每歲纔及十三
四萬故工役之費卒不能給此本錢支遣不敷之弊也
國家張官置吏有長有屬使之作統相維叶力裨贊而
治司所總之路既廣故有檢踏布於江浙湖廣間分司
以董之顧乃闕到之官任滿解職與治司邈不相關其
貪者殘貪本錢繆者虧折銅課不卹也所謂相維裨贊
之意何在此體統不一之弊也乞申飭有司檢照累降

指揮嚴漏洩之禁官民之家不得以銅為器玩每郡專
委通判檢察其料撥本錢去處亦專委通判拘催如額
解發違許治司奏聞分司檢踏官並要赴治司銓量然
後之任如此則三者之獎可革而錢楮廢乎可以相權
實正本澄源之策也從之